

FAASOLOGA O MATAUPU

VAEGA	IGOA	ITULAU
I	TALA TOMUA.....	3
II	TAUALUMAGA O LE FONOTAGA A LE PALEMENE FOU.....	6
III	TAUTOGA O LE LOTO FAAMAONI.....	9
IV	SUI FOFOGA FETALAI.....	12
V	FILIFILIGA O LE PALEMIA.....	13
VI	GAGANA.....	15
VII	VAEGA FAAUPUFALAI, NOFOA O SUI USUFONO, AUAU O SUI USUFONO, FAATAGAGA E TOESEA AI.....	16
VIII	TAITAI FONO I LE FONO AOA.....	19
IX	TAUAOFIAGA, FESILAFAGA MA FONOTAGA.....	21
X	TIUTE O LE FAILAUTUSI.....	24
XI	LIPOTI FAAMAONIA.....	27
XII	O LE FAAILOGA O LE PULE.....	28
XIII	O LĒ E LEOINA LE FONO.....	29
XIV	FAATULAGAINA O GALUEGA.....	30
XV	PEPA.....	33
XVI	TALOSAGA.....	37
XVII	FESILI AGAI I MINISITA MA ISI USUFONO.....	40
XVIII	FAAMATALAGA A MINISITA.....	44
XIX	FAAMALAMALAMAGA A LE TAGATA LAVA IA.....	45
XX	LAFO FAATU MA TOE TEUTEUGA.....	46
XXI	FAAALIGA MAI LE TAITAI O LE MAOTA.....	52
XXII	MATAUPU TUUSAO I LE O LE AO O LE MALO.....	53
XXIII	TULAFONO E PUIPUI AI LE FEFAAALIAIGA O TAOFI.....	54
XXIV	TULAFONO E PUIPUI AI LE NOFO FILEMU.....	62
XXV	VAEVAEINA O TAOFI O LE FONO AOA (PALOTA TAUVALAAU).....	65
XXVI	TULAFONO TAU FAAOFI.....	67
XXVII	TULAFONO TAU FAAOFI E AAFIA AI TAGATA TAITOATASI.....	78
XXVIII	KOMITI O LE FONO AOA ATOA.....	80
XXIX	TALA FAATATAU O TUPE MA TAUALUMAGA TAU TUPE.....	84
XXX	TUPE FOAI FAA-MEAALOFI MA LAFOGA.....	89
XXXI	FAATONUGA I KOMITI.....	91
XXXII	KOMITI FAA-PALEMENE.....	92
XXXIII	KOMISI FAA-PALEMENE MA KOMITI FAA-PALEMENE.....	101
XXXIV	SUI USUFONO MA TAGATA ESE.....	106
XXXV	TULAGA ALOAIA MA AMIO TAUALOA.....	107
XXXVI	FAASALALAUINA I LE EA O TAUALUMAGA.....	111
XXXVII	PULEA MA LE FAAFOEINA.....	112
XXXVIII	TAIMI FAATAPULAAINA O LAUGA.....	114
XXXIX	TULAFONO TUMAU.....	116
XL	MEA UA SOLOIA.....	117

TULAFONO TUMAU

VAEGA I TALA TOMUA

1. E Le Faatapulaaina Aia Tatau a le Fono Aoao Faitulafono:

E leai lava se aiaiga i lenei Tulafono Tumau e tatau ona faaitiitia pe noatia pe mafai i so o se auala le faaitiitia po o le noatia le aia tatau, tulaga aloaia, puipuia o tulaga aloaia ma pule o lo o umia ma faaaogaina e le Fono Aoao Faitulafono, po o le umia ma le faatinoina o na pule.

2. I Tulaga e le i Aiaia, e Faia i ai le Faaiuga a le Fofoga Fetalai:

I tulaga uma e le i aiaia i totonu o nei Tulafono Tumau o le a faia e le Fofoga Fetalai le faaiuga e taitaia i tulafono ma le faaaogaina o faiga aloaia talafeagai o le Maota o le Palemene o Niu Sila ma isi Palemene o Faavae i Faiga Faa-Palemene a le Malo o Peretania o lo o faamamaluina pe afai e mafai ona faaaogaina ia aiaiga i tualumaga a lenei Fono Aoao Faitulafono.

3. Faamatalaga:

O nei Tulafono Tumau, ae vagana ai e le ogatasi ma mataupu:

“Fono Aoao” o lona uiga o le Fono Aoao Faitulafono ua faavaeina e tusa ai ma tuutuuga o le Faavae;

“Taitaifono” o lona uiga o le Taitaifono o se Komiti o le Fono Aoao Atoa, se Komiti Faa-Palemene ma e aofia ai le Sui Taitaifono, sui usufono ua tauaveina galuega faa-Taitaifono faapea ma se Taitaifono le tumau;

“Failautusi” o lona uiga o le Failautusi o le Fono Aoao Faitulafono po o, pe afai o lo o avanoa lea Tofiga po o pe afai ua toesea le Failautusi, o lona uiga o le Sui Failautusi o le Fono Aoao Faitulafono po o se tagata e tofia e le Fofoga Fetalai ina ia tauaveina galuega faa-Failautusi o le Fono Aoao Faitulafono, ma e aofia ai so o se tagata na tuuina atu i ai e le Failautusi na te faatinoina so o se matafaioi po o le faatinoina o so o se pule a le Failautusi i lalo o nei Tulafono Tumau;

- “Faavae”** o lona uiga o le Faavae o le Malo Tutoatasi o Samoa;
- “Sui Taitaifono”** e aofia ai Le ua tauaveina galuega faa-Sui Taitaifono;
- “Sui Failautusi”** o lona uiga o le Sui Failautusi o le Fono Aoao, po o pe afai o lo o faia e ia tiute o le Failautusi, po o; pe afai o lo o toesea o ia, po o o lo o avanoa le Tofiga, o le tagata o lo o ona faia mo lea taimi ia tiute o le Sui Failautusi e tusa ma nei Tulafono Tumau po o e tusa ai ma le faatonuga a le Fofoga Fetalai;
- “Sui Fofoga Fetalai”** e aofia ai Lē ua tauaveina galuega faa-Sui Fofoga Fetalai;
- “Taitai o le Maota”** o lona uiga o le Taitai o le vaega faaupufai o pulea le Malo, e pei ona faaaliga i le Tulafono Tumau 21(2)(b);
- “Maliega Autasi”** po o **“Maliega Autasi a le Fono Aoao”** o lona uiga o le faatagaga ua tuuina atu e aunoa ma se leo e faatuiese i ai;
- “Fono Aoao Faitulafono”** e mafai ona faasino i le ‘Maota’ po o le ‘Fono Aoao’;
- “Fonotaga”** o lona uiga so o se fonotaga po o ni fonotaga a le Fono Aoao e amataina pe a oo ina ua fonotaga muamua ina ua valaauina i so o se taimi ma e faamutaina pe a oo ina ua tolopo le Fono Aoao *seia i se aso* po o le faaiuga o le Tauaofiaga;
- “Sui Usufono”** o lona uiga o se sui usufono o le Fono Aoao Faitulafono o Samoa, ma e taua foi o se Sui Usufono o le Palemene;
- “Faaaliga o fesili”** o lona uiga o se faaaliga na tuuina atu e tusa ai ma le Tulafono Tumau 59;
- “Faaaliga o lafo faatu”** o lona uiga o se faaaliga ua tuuina atu i lalo o le Tulafono Tumau 65;
- “O Le Ao o le Malo”** o lona uiga o Le Ao o le Malo o lo o umia le tofi e tusa ai ma aiaiga o le Vaega III o le Faavae;
- “Galuega o le Aso”** o lona uiga o se Tulafono Tau Faaofi po o se isi mataupu ua filifilia pe faatonuina e le Fono Aoao ina ia iloiloina pe tagofia i se aso faapitoa po o se taimi faapitoa;
- “Pepa”** o lona uiga so o se pepa, lipoti, tala o le tupe, faamaumauga o tupe toe faafoi, faamatalaga po o isi lava pepa e masani ona faataatia i le Laulau-a-Fono i le taimi o le “Tuuina atu o Pepa a le Palemene”;

“Komisi Faa-Palemene” e faasino i le Komisi ua faavaeina i le Tulafono Tumau 170;

“Komiti Faa-Palemene” o lona uiga o se Komiti ua tofia i lalo o le Vaega XXXIII;

“Pepa a le Palemene” e aofia ai Lipoti Faale tausaga, Fuafuaga Autasi, Faamatalaga o Sini o le Faalapotopotoga, Faamatalaga o Faamoemoega, ma isi;

“Tulafono Tau Faaofi a Sui Usufono Taitoatasi” o lona uiga o se Tulafono Tau Faaofi a tagata lautele ua faaofiina e se sui usufono e le o se Minisita;

“O Lē e leoina le Fono” o lona uiga so o se tagata ofisa ua tofia e le Fofoga Fetalai e avea ma Lē e leoina le Fono Aoao, ma e aofia ai so o se tagata e faatinoina matafaioi po o le faatinoina o pule a Lē e leoina le Fono i lalo o le faatonuga a le Fofoga Fetalai;

“Taaofiaga” o lona uiga o Fonotaga a le Fono Aoao Faitulafono e amataina pe a oo ina ua fesilafai muamua le Fono Aoao ina ua uma ona faavaeina e tusa ma le Tulafono Faavae ua taua i luga, po o ina ua tuanai lona faatuuaina po o le faataapeina i so o se taimi, po o le uluai Fonotaga a le Fono Aoao e valaauina i tausaga taitasi ma e faamutaina pe a oo ina ua faatuua po o ua faataapeina le Fono Aoao e aunoa ma le faatuuaina po o ona ua tolopoina *seia i se aso* le Fonotaga mulimuli a le Fono Aoao i tausaga taitasi;

“Fofoga Fetalai” e ese mai i le Vaega II ma le Vaega XXXVII o nei Tulafono Tumau, e aofia ai le Sui Fofoga Fetalai ma Lē ua tauaveina galuega faa-Fofoga Fetalai; ma, e tusa ai ma le faafoeina o felafolafoaiga i totonu o le Fono Aoao, e aofia ai se Fofoga Fetalai le tumau;

“Aso galue” o lona uiga o so o se aso o le vaiaso e ese mai ai i lo se Aso Toonai, se Aso Sa ma so o se isi lava aso ua faamamaluina e avea ma aso malolo mo tagata uma;

“Tusia” ma **“i se faiga tusitusia”** o lona uiga ia tusia i le lima, tusia i le laau lomitusi, faia se ata (kopi), po o le lomina pe na o se vaega o le tasi ma na o se vaega po o le sili atu o isi mea.

VAEGA II
TAUALUMAGA O LE FONOTAGA
A LE PALEMENE FOU

4. Tatalaina Aloaia o Tauaofiaga a le Palemene Fou:

I le aso muamua o le fonotaga a se Palemene fou, o le Failautusi o le a tatau ona ia:

- (a) fofogaina le tatalo;
- (b) faitauina le Poloaiga; ma
- (c) faailoa i le Maota e faapea, ua finagalo O Le Ao o le Malo ina ia faamaonia e le Fono Aoa le Fofoga Fetalai ma le Sui Fofoga Fetalai e tusa ai ma le Mataupu 49 ma le 50 o le Faavae.

5. Faamaoniga o le Fofoga Fetalai ma le Sui Fofoga Fetalai:

- (1) Mo le faamoemoe o le faamaoniga o le Fofoga Fetalai ma le Sui Fofoga Fetalai, o le Failautusi o le a avea ma Taitaifono.
- (2) O le Failautusi o le a ia faitauina le Faasilasilaga mai le vaega faaupufai po o vaega faaupufai ua latou mauaina le vaega toatele o nofoa i totonu o le Fono Aoa Faitulafono o taua ai:
 - (a) le igoa o le vaega faaupufai po o vaega faaupufai ma igoa o Sui Usufono o le Palemene o auai;
 - (b) le igoa o le Fofoga Fetalai ma le Sui Fofoga Fetalai ua faatuina mai; ma
 - (c) le igoa o le Taitai ma le Sui Taitai.
- (3) O le taimi lava ua fofogaina atu ai le igoa o se sui usufono, e tatau i le sui usufono ona tulai e faamaonia ai, ma o le a faitauina e le Sui Failautusi, ma afai ua faamaonia, ona tapa lea e le Failautusi le tagata ina ia alala i lona nofoa.
- (4) O le a logoina loa lava e le Failautusi le Maota, e faapea o tagata o taua suafa i le Faaaliga, ua maea ona tofia aloaia e avea ma Fofoga Fetalai ma le Sui Fofoga Fetalai ma e leai se felafolafoaiga e faatagaina i lea taimi atoa.

- (5) O le Palemia e faatuina le lafo mo le faataatia ese o taualumaga, ina ia oo atu i le O Le Ao o le Malo, ma o le Failautusi o le a ia faataatia ese taualumaga.

6. Faatautoina o le Fofoga Fetalai:

- (1) E tatau i le Failautusi ona:
- (a) fofogaina le igoa o le Fofoga Fetalai ua Tofia ina ia tulai; ma
 - (b) talosagaina sui usufono e 2 na sainia le pepa o filifiliga o le Fofoga Fetalai, ina ia faafeao atu le Fofoga Fetalai i le Laulau a le Failautusi mo le faia o le Tautoga o le Loto Faamaoni.
- (2) A maea ona faia o le Tautoga o le Loto Faamaoni, o le a faataatia e Lē e leoina le Maota le faailoga o le Pule i luga o le Laulau, e faaalua ai se tagi i tulaga aloaia Faa-Palemene ma le avanoa tuusao i le O Le Ao o le Malo.

7. Faatautoina o Sui Usufono:

- (1) E tatau i sui usufono uma ona laulaututu a o faitauina le Tulafono Laitiiti o Amio Taualoa Faa-Palemene o i le Tulafono Tumau 15.
- (2) O le a fofogaina e le Failautusi igoa o sui usufono i le faasologa o le pi faitau faa-Peretania, ma i se vaega i taimi taitasi, ma o sea vaega o le a tatau ona agai atu i le Laulau a le Failautusi mo le faia o le Tautoga o le Loto Faamaoni, o i le Tulafono Tumau 14.

8. Faatautoina o le Palemia ma le Kapeneta:

- (1) O le a faia e le Palemia le Tautoga o le Loto Faamaoni i le Laulau a le Failautusi, ona faagasolo lea i le tolaulauina o Sui Usufono o le Kapeneta ma a latou matafaioi faatulagaina.
- (2) O le a faia e Sui Usufono o le Kapeneta le Tautoga o le Loto Faamaoni i le Laulau a le Failautusi.

9. Saunoaga mai le O Le Ao o le Malo:

E tatau i le O Le Ao o le Malo ona fofogaina Lana Saunoaga, a maea ona faataatia lea e le Fofoga Fetalai se ata o le Saunoaga i luga o le Laulau-a-Fono.

10. Tagata Ese i le Tatalaina Aloaia o Tauaofiaga:

E lē faatagaina se tagata ese i totonu o le Maota, a o faagasolo le tatalaina aloaia o tauaofiaga.

11. Faatagisia e le Fofoga Fetalai Aia Tumaoti o Tulaga Aloaia o le Fono Aoao:

I luga o le faamaonia mai e le O Le Ao o le Malo, o le filifiliga o le Fofoga Fetalai e le Fono Aoao, o le a avea loa le Fofoga Fetalai ma sui o le Fono Aoao e faataatia se tagi mo tulaga aloaia uma, ma e faapitoa i le saolotoga e tautala ai i totonu o felafolafoaiga faapea le avanoa tuusao i le O Le Ao o le Malo i so o se taimi lava e ono manaomia ai, ma se faiga e sili ona lelei e mafai ona faatino ai ana tualumaga uma.

12. Lipoti a le Fofoga Fetalai o Lona Oo Atu i le O Le Ao o le Malo:

Ina ua toe amatalia tualumaga a le Fono Aoao, e tatau i le Fofoga Fetalai ona lipoti atu lona oo atu i le O Le Ao o le Malo mo le faamaonia o le filifiliga a le Fono Aoao mo le Fofoga Fetalai ma lipoti atu le faaiuga a le O Le Ao o le Malo. E tatau foi i le Fofoga Fetalai ona faasilasila i le Fono Aoao e faapea sa faia e Ia le Tautoga o le Loto Faamaoni ma sa faataatia ai se tagi e avea ai ma sui o le Fono Aoao i ona tulaga aloaia uma, ma lipoti atu le finagalo o le O Le Ao o le Malo e uiga i lea tagi.

13. Avanoa i le Tofi Fofoga Fetalai:

- (1) Afai e avanoa le tofi Fofoga Fetalai, o lea avanoa e le faatupulaia i se faataapeina o le Fono Aoao Faitulafono, e tatau i le Failautusi ona lipoti atu le avanoa i le Fono Aoao i le isi ana fonu e sosoo ai. O le a tatau i le Fono Aoao ona sagai atu loa i le filifilia o se Fofoga Fetalai fou i le auala e pei ona faatonuina muamua iinei e nei Tulafono Tumau, a maea lea e tatau ona tolopo seia aulia le aso fonu e sosoo ai.
- (2) I le oo atu o se Fofoga Fetalai ua filifilia i lalo o aiaiga o lenei Tulafono Tumau i le O Le Ao o le Malo mo le faamaonia o lona filifiliga, o le a le tatau i le Fofoga Fetalai ona toe faatagisia tulaga aloaia o le Fono Aoao.

VAEGA III

TAUTOGA O LE LOTO FAAMAONI

14. Tautoga o le Loto Faamaoni:

- (1) O le a faia le Tautoga i luma o le Fono Aoao e le Fofoga Fetalai i sui usufono taitasi, o Ia lea o le a na faataunuuina lea lava tautoga, i le avanoa muamua e tatau ai ina ua tuanai le filifilia o Ia i le Fono Aoao.
- (2) E leai se Sui Usufono o le Palemene o le a tatau ona fonon pe palota ai i se Fonotaga, ae vagana mo aiaiga o le Vaega II, seia oo ina ua faia ma faataunuuina e ia le Tautoga o le Loto Faamaoni.
- (3) O upu o le Tautoga o le Loto Faamaoni e faapea:

TAUTOGA O LE LOTO FAAMAONI

“O Au o, ou te tauto i le Atua e Ona le Malosi uma lava, o le a Ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a Ou faataunuuina ma le tatau ai ma le faamaoni ou tiute e avea ai o se Sui Usufono o le Palemene o Samoa. Ia fesoasoani mai le Atua ia te au.”

15. Tulafono Laitiiti o Amio Tauloa Faa-Palemene:

FAAMATALAGA O FAAMOEMOEGA:

O le matafaioi patino a Sui Usufono uma o le Palemene o le tausiona lea o tulaga aupito i sili ona maualuga o uiga taualoa, e puipuia ma faatumauiina ai le mamalu o le Palemene ma faia ai taumafaiga uma e faatumauiina ai aiaiga autu o le Faavae.

O aiaiga autu ua taua ua faamoemoe e tuuina atu ai ni taiala i, ma ni tulaga i Sui Usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

O AIAIGA AUTU:

(1) Faamaoni i le atunuu ma ona tagata:

O sui usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa; ana faalapotopotoga ma ona tagata.

(2) Faaaloalo i Tulafono:

E tatau i sui usufono uma ona tausisia tulafono o Samoa ma puipuia aiaiga autu o lo o i totonu o le Faavae.

(3) Faaaloalo i Tagata uma:

E tatau i sui usufono uma ona faaaloalo i isi sui usufono, tagata lautele ma ofisa maufofi o le Malo faapea foi ma le galue i tulaga mamalu, faamaoni, le le faaituau; aemaise le faia o le amiotonu i taimi uma.

(4) Faatinoga Lelei o Pule:

E tatau i sui usufono uma ona:

- (a) faatulaga a latou mataupu totino;
- (b) faaaoga so o se faamatalaga ma faamatalaga uma na maua mai i o latou tofi faale-Malo; ma
- (c) faatinoina o so o se malosi po o pule na maua mai i o latou Tofi faale-Malo,

mo na o le lelei o tagata lautele ma pe a fai e tulai mai o so o se tulaga talafeagai ma se tulaga moni e feteenai ai aia, pe i tulaga tau tupe a le sui usufono lava ia, tupe faaletulafono po o se aia a le sui usufono e tatau ona manaomia e faasilasilaina atu ma le faia o so o se laasaga e aveese ai sea feteenaiga po o le le auai atu i lena feutagaiga tau pisinisi.

Manaoga Faapitoa mo Minisita ma Isi Tagata o lo o Umia Tofi faale-Malo:

O sui usufono uma o lo o umia tofi faa-palemene o so o se ituaiga ua manaomia e usitaia atoatoa aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuuina atu

o se malosi o so o se ituaiga, po o le a lava, e tusa ai i se mataupu o le a maua ai e le sui usufono so o se faaopoopoga i ana meatotino po o se faamanuiaga.

FAASALAGA:

O le solia o lenei Tulafono Laitiiti o le a ono tagofia e le Komiti o Tulaga Aloaia ma Amio Taualoa po o e pei ona o le a fuafuaina e le Palemene.

VAEGA IV SUI FOFOGA FETALAI

16. Filifiliga o le Sui Fofoga Fetalai:

O le Filifiliga o le Sui Fofoga Fetalai o le a tatau ona faatinoina i le auala lava lea na tagofia ai le filifilia o le Fofoga Fetalai.

17. Avanoa o le tofi Sui Fofoga Fetalai:

Afai e tulai mai se avanoa i le tofiga Sui Fofoga Fetalai, o le a tatau loa ona filifilia se Sui Fofoga Fetalai fou i le auala lava lea na tagofia ai le filifilia o le Fofoga Fetalai.

18. Malosiaga o le Sui Fofoga Fetalai:

Afai e toesea le Fofoga Fetalai, e mafai e le Sui Fofoga Fetalai ona faia tiute ma faatino le pule a le Fofoga Fetalai e faasino i tualumaga uma o le Fono Aoao a o faagasolo se fonotaga po o se tolopoina o le Fono Aoao ma so o se vaitaimi e le o fonoa le Palemene.

VAEGA V

FILIFILIGA O LE PALEMIA

19. **Filifiliga o le Palemia:**

- (1) I so o se taimi e aliai mai ai se avanoa i le tofi Palemia (e ese ai na i lo se avanoa e aliai mai a o lo o faataapeina le Fono Aoao Faitulafono) o le a tatau i le Fono Aoao i totonu o le 24 itula talu ona avanoa le tofi po o le 3 aso talu ona faafoiina Faasilasilaga Tau Palota i luga o se tusi faamaonia a le Failautusi ona tuuina atu i le O Le Ao o le Malo le Sui Usufono o le Palemene o ia lea ua mafuli i ai le faatuatuaga o sui usufono mo aiaiga o se tofiga e tusa ai ma le parakalafa (a) o le fuaiupu (2) o le Mataupu 32 o le Faavae:

Mo manaoga o lenei Tulafono, e ao i le Failautusi ona faaoga Faamatalaga Faamauina a sui usufono o lo o tausia e tusa ai ma le Tulafono Tumau 40 (mo avanoa e le i faatupulaia i se faataapeina o le Fono Aoao Faitulafono), po o mai Faamaumauga o Faiga Filifiliga o Faiga Palota e tausia e le Komesina o Faiga Palota, (mo avanoa e faatupulaia ina ua faataape le Fono Aoao Faitulafono) a ia fai fuafua i le tapaina o faamaoniga aloaia mai sui usufono taitasi pe a manaomia.

- (2) Afai e leai se sui usufono e mafuli i ai le faatuatuaga o sui usufono e tusa ai ma aiaiga o le parakalafa (1) o lenei Tulafono, o le a filifilia loa se Palemia i luga o se palota:
- (a) mo le faamoemoe o le palotaina o se Palemia, o le a avea le Failautusi ma Taitaifono;
 - (b) so o se sui usufono ua maea ona faamautinoaina e faapea, o le sui usufono ua faatuina, ua naunau e galue pe afai e filifilia, e mafai ona faailoa i le Failautusi se isi sui usufono, ina ia avea ma Palemia, ma faatuina "E faapea (ua taua le igoa o le sui usufono) ia filifilia e avea ma Palemia". E tatau ona faaluaina le lafo faatu, ae peitai, o le a le tatau ona faatagaina se felafolafoaiga;
 - (c) afai ua na o le toatasi le tagata ua faapea ona faatuina mai, o le a faailoa manino e le Failautusi ua faapea ona filifilia o ia;
 - (d) afai e sili atu i lo le toatasi le tagata ua faapea ona faatuina mai e tatau i le Failautusi, i le maea ai ona taina o le logo e pei ona faia i se palota tauvalaau, ona poloaiina le lokaina o faitotoa, ma e

tatau ona taua igoa o sui usufono ua faatutuina mai mo le filifiliga;

- (e) mo le faamoemoe o se palota, e tatau i sui usufono taitasi, i le maea ai ona tapa e le Failautusi i le faasologa o le pi faitau faa-Peretania, ona maua mai le Failautusi se pepa palota, ma faagasolo atu ai i le laulau i tua atu o le nofoa o le Fofoga Fetalai, e faia ai lana palota;
 - (f) i le maea ai ona faailoa le palota a le sui usufono, e tatau ona gaugau le pepa palota ina ia le mafai ona iloaina le igoa ua tusia ai, ma tuuina i totonu o le pusa palota i luga o le laulau o faiga palota. O pepa palota o le a tatau ona faitauina i le laulau e le Failautusi ma ni tagata se toalua ua filifilia e avea ma failautusi o faiga palota, e sui usufono o lo o auai;
 - (g) afai e sili atu i lo le toalua sui ua faatutu mai ma i le palota muamua, e leai se sui faatu ua na mauaina le tele o palota na i lo le aofaiga atoa o palota ua mauaina e isi sui faatutu, o le sui faatu ua na mauaina le numera aupito laitiiti o palota e tatau ona faataatia ese mai le filifiliga, ma toe faagasolo ai le palota, o le sui faatu, o ia lea ua na mauaina le numera aupito laitiiti o palota i palota taitasi, ia faataatia ese seia oo ina mauaina e le sui faatu e toatasi le tele o palota na i lo sui faatutu o lo o totoe po o le aofaiga atoa o palota a sui faatutu o lo o totoe, i le a lava le tulaga e tulai mai;
 - (h) a o faitauina pepa palota, e tatau ona tuuina i totonu o se pusa, ma pe afai ua faaalua manino se tagata ua filifilia e avea ma Palemia, o le a tatau ona faamauiina le pusa, i luma o le Fono Aoa ma ia teuina i le pui-puigamalu a le Failautusi mo le masina e tasi faale-kalena, a maea lea ona tatau ai lea i le Failautusi ona susunuina o pepa palota ma faamaonia i le Fono Aoa e faapea ua maea ona faatinoina o lenei galuega.
- (3) I so o se taimi e aliali mai ai se avanoa a o lo o faataape le Fono Aoa Faitulafono, o le a tauave e le Sui Palemia na tofiaina i lalo o le Mataupu 32(2)(ba) o le Faavae, ia tiute ma faatino pule a le Palemia, seia faamuta lona tofiga e le O Le Ao o le Malo, e tusa ai ma le Mataupu 33(1) o le Faavae.

VAEGA VI
GAGANA

20. Gagana:

O tualumaga a le Maota Fono o le a faia lava ma taitaiina i le gagana Samoa ma le gagana Peretania.

VAEGA VII
VAEGA FAAUPUFAL, NOFOA O SUI USUFONO,
AUAI O SUI USUFONO, FAATAGAGA E TOESEA AI

21. Aloaia o Vaega Faaupufai:

- (1) I le amataga o Palemene taitasi, o so o se vaega tuufaatasi o sui usufono e le itiiti ifo i le toavalu (8) o le a aloaia o se vaega faaupufai i totonu o le Palemene i le faailoa atu e lona taitai i le Fofoga Fetalai:
 A ia fai fuafua i le maea faamauina o lea vaega faaupufai e le Komesina o Faiga Palota e tusa ai ma le fuaiupu 15A o le Tulafono o Faiga Palota 1963.
- (2) E ao i le vaega faaupufai ona tuuina atu i le Fofoga Fetalai:
 - (a) le igoa o le vaega faaupufai;
 - (b) le igoa o le taitai ma le sui taitai;
 - (c) igoa o Sui Usufono o le Palemene e auai i le vaega faaupufai:
 A ia fai fuafua i le faailoa atu o mataupu o lo o faamaoti i le (1) ma le (2) o lenei Tulafono a o le i faia Tautoga o le Loto Faamaoni a sui usufono.
- (3) E ao ona tuuina atu i le Fofoga Fetalai so o se suiga o mataupu o lo o faamaoti i le (2) o lenei Tulafono.
- (4) E tatau ona faailoa atu i le Fofoga Fetalai se tuufaatasia o ni vaega faaupufai se lua pe sili atu foi ae peitai o vaega faaupufai taitasi e aafia i lea tuufaatasiga e tatau ona tumau le tumaoti mo manaoga o Tulafono Tumau.
- (5) O le a faamuta le aloaia o se vaega faaupufai i totonu o le Palemene pe afai e pa'ū le aofaiga o ona Sui Usufono o le Palemene i lalo ifo o le toavalu (8).
- (6) Mo faamoemoega tau palemene:
 - (a) o le a aloaia o se sui usufono tutoatasi seia muta le Paeaiga, so o se sui usufono o ia lea ua faia le Tautoga o le Loto Faamaoni a o le i faailoa atu i le Fofoga Fetalai se vaega faaupufai e pei ona manaomia i lalo o le (2)(c) o lenei Tulafono;

- (b) o le a aloaia o se sui usufono tutoatasi mo le vaitaimi o totoe o le Paeaiga, so o se sui usufono o ia lea ua tuua le vaega faaupufai na muai faailoa ai i lalo o le (2)(c) o lenei Tulafono.
- (7) I le vaitaimi ina ua maea le Faiga Palota Aoao a o le i filifilia se Fofoga Fetalai, e mafai ona faailoa atu i le Failautusi o le Fono Aoao Faitulafono ia mataupu ua faamaoti i le (1) ma le (2) o lenei Tulafono.

22. Taitai o le Itu Agai:

O le a agavaa le Taitai o le vaega faaupufai o lo o silia le fuainumera o ona sui ae le o nofoia le Malo po o tuufaatasia ma le Malo ia aloaia o le Taitai o le Itu Agai.

23. Nofoa o Sui Usufono:

- (1) I se mafai faatino e mafai ai, o le a nofoia e vaega faaupufai taitasi nofoaga tuufaatasi, a ia faia e le Fofoga Fetalai se faaiuga o se feeseeseaiga e tulai mai i nofoa e nofoia.
- (2) E ao i sui usufono ona saunoa i nofoa ua lautogia i ai.
- (3) O nofoaga lautogia i Minisita ma le Sui Fofoga Fetalai o le a le faailogaina taitasi.

24. Sui Usufono ia Auai i Galuega a le Fono Aoao:

- (1) E leai se sui usufono e tatau ona toesea mai le Fono Aoao mo ni aso fono sosoo se 3 e aunoa ma le tuuina atu o se faatagaga e toesea ai mai le Fofoga Fetalai.
- (2) So o se sui usufono ua toesea mai le Fono Aoao e solia ai lenei Tulafono Tumau, o le a faaleaogaina mai le umia o lona nofoa.
- (3) I le noatia ma le fai fuafua i lenei Tulafono, o se sui usufono o le a taua e faapea ua toesea pe afai ua ia le nofoia lona nofoa mo le itiiti ifo i le 2 itula sosoo i so o se aso fono.
- (4) Afai e fono le Fono Aoao mo le itiiti ifo i le 3 itula i so o se aso e tasi, o le a taua se sui usufono e faapea ua toesea pe afai ua ia le nofoia lona nofoa mo se vaitaimi e tusa o le vaeluaga o le taimi na fono ai le Fono Aoao i lena aso.

25. Faatagaga e Toesea ai:

- (1) I le noatia ma le fai fuafua i le Tulafono Tumau 24 o le faatagaga e toesea ai mo so o se sui usufono e mafai ona tuuina atu e le Fofoga Fetalai.
- (2) E mafai ona tuuina atu le faatagaga e toesea ai i luga o mafuaaga e faapea o le sui usufono ua toesea mai le Fono Aoa o se gasegase po o isi faalavelave faaleaiga tau i le tagata lava ia po o i luga o le mafuaaga e faapea, o le toesea o le sui usufono ua faamaonia ina ia mafai ai e le sui usufono ona auai atu i isi galuega tau i le Malo po o galuega tau le itumalo faaalaalafaga pe e i totonu o Samoa po o atunuu i fafo.
- (3) So o se sui usufono ua tuuina atu i ai le faatagaga e toesea ai, o le a le toe aia i lea faatagaga pe afai na auai o ia i galuega a le Fono Aoa o le i muta lea faatagaga.
- (4) O se sui usufono ua le toe aia i le faatagaga e toesea ai i lalo o le (3) o lenei Tulafono o le a taua e faapea ua toesea o ia mai le Fono Aoa pe afai ua le mafai e Ia ona nofoia lona nofoa i le auala ua faatonuina i lalo o le Tulafono Tumau 24.

VAEGA VIII

TAITAIFONO I LE FONO AOA

26. Taitaifono i le Fono Aoao:

So o se vaitaimi e i ai se avanoa i le Tofi o le Fofoga Fetalai o le a galue ai le Failautusi e avea ma Taitaifono seia oo ina ua filifilia le Fofoga Fetalai ma ua faia ma faataunuuna le Tautoga o le Loto Faamaoni.

27. Toesea o le Fofoga Fetalai ma le Sui Fofoga Fetalai:

- (1) A oo ina ua faasilasilaina le toesea o le Fofoga Fetalai e le Failautusi, o le a nofoia loa e le Sui Fofoga Fetalai le Nofoa.
- (2) Afai i so o se taimi lava e toesea faatasi ai le Fofoga Fetalai ma le Sui Fofoga Fetalai po o pe afai ua toesea le Fofoga Fetalai ae leai se Sui Fofoga Fetalai, i le maea ona faasilasila e le Failautusi, e mafai e le Fono Aoao i luga o se lafo faatu a se Minisita ona valaauina so o se sui usufono e tauaveina le Nofoa e avea o se tasi e tauaveina galuega faa-Fofoga Fetalai i le taimi e toesea ai lea Fofoga Fetalai ma le Sui Fofoga Fetalai.
- (3) E ese mai ai i le (1), e mafai e le Fono Aoao, i luga o se faaiuga ona tofia se sui usufono e tauaveina galuega faa-Fofoga Fetalai po o galuega faa-Sui Fofoga Fetalai i le vaitaimi e toesea ai le Fofoga Fetalai po o le Sui Fofoga Fetalai. O se sui usufono ua tauaveina galuega faa-Fofoga Fetalai po o galuega faa-Sui Fofoga Fetalai ua tofia i sea faaiuga, e mafai e ia i le taimi e faaauauina ai le tofiga ona faia tiute ma faatino pule uma lava a le Fofoga Fetalai po o le Sui Fofoga Fetalai e faasino i tualumaga uma a le Fono Aoao i le taimi o fono ma le tolopoina o le Fono Aoao ma le taimi e le o fonoa le Palemene.

28. E mafai e le Sui Fofoga Fetalai ona tauaveina le Nofoa pe a talosagaina:

I so o se taimi lava a o faagasolo le fonotaga a le Fono Aoao aloaia, e mafai ona tauaveina e le Sui Fofoga Fetalai le Nofoa i luga o le talosaga a le Fofoga Fetalai e avea ai ma Fofoga Fetalai le tumau e aunoa ma se faasilasilaga aloaia.

29. Gaoioiga a le Sui Fofoga Fetalai ma sui e tauaveina galuega faa-Fofoga Fetalai:

I le nofoia o le Nofoa e le Sui Fofoga Fetalai po o se sui usufono ua tauaveina galuega faa-Fofoga Fetalai e tusa ai ma nei Tulafono Tumau po o le faatinoina o tiute ma pule uma lava a le Fofoga Fetalai, o galuega uma e faia ma taualumaga ua faatino i totonu po o le faia e le Fono Aoao po o e le Sui Fofoga Fetalai po o Lē ua tauaveina galuega faa-Fofoga Fetalai o le a faaaogaina ma aloaia e pei ai lava o lo o nofoia e le Fofoga Fetalai le Nofoa pe sa faatino tiute po o pule uma lava po o le a lava le tulaga e i ai.

VAEGA IX

TAUAOFIAGA, FESILAFIAGA MA FONOTAGA

30. Tauaofiaga ma Fonotaga:

- (1) O le a usua Tauaofiaga a le Fono Aoao Faitulafono i le faiga ua faatonuina i le Mataupu 52 o le Faavae ma o le a faatuu ma faataape i le faiga ua faatonuina i le Mataupu 63 o le Faavae.
- (2) I le faagasolo o so o se Tauaofiaga e tasi, e tatau ona faagasolo Aso Fono taitasi a le Fono Aoao Faitulafono e tusa ai ma le Polokalame Faaletausaga o Fonotaga lea ua taliaina e le Fono Aoao e pei ona faatonuina i le Tulafono Tumau 170 ma e mafai ona tolopo i aso ua faataoto mai i le polokalame o fonotaga.
- (3) I le vaitaimi a o lo o tolopo le Fono Aoao e tusa ai ma le Polokalame o Fonotaga a ua silafia e le Palemia e tatau ona fono le Fono Aoao i luma mai o le aso na tolopo i ai ona o se tulaga e faaono aafia ai le manuia lautele o le atunuu e mafai e le Palemia ona ia fautuaina le O Le Ao o le Malo ina ia taloina le Fono Aoao, i le maea ai ona feutagai ma taitai o isi vaega faaupufai ma logoina le Fofoga Fetalai e faapea e tatau ona fono le Fono Aoao i se aso i luma mai.

31. Faasilasilaga o Fonotaga:

- (1) A o lumanai le amataina o se Fonotaga fou, o le a auina atu e le Failautusi i sui sufono taitasi e le itiiti ifo i lo le sefulu ma le fa (14) aso se faasilasilaga tusia e uiga i le valaauina o le Fono Aoao:
Ae peitai e mafai e le O Le Ao o le Malo ona valaauina se Fonotaga pe a i ai ni mataupu e tutupu faafuasei, i se faasilasilaga e puupuu aso e pei ona o le a manaomia ai, o itu faapea e aliali mai o le a auina atu ai faasilasilaga i sui usufono i ni tusi po o nisi lava auala o le a mautinoa ai ua maua e sui usufono lea faasilasilaga.
- (2) Afai o le a toe tauaofia le Fono Aoao ina ua tuanai se tolopoina e sili atu i lo le sefulu ma le fa (14) aso, o le a auina atu lava e le Failautusi i sui usufono taitasi se faasilasilaga tusia o le aso ua atofaina mo le Fonotaga o lo o lumanai ai ma o le a faapipii faatasi atu ai, pe afai e mafaia, se ata o le Pepa o Galuega.

32. Fonotaga:

- (1) O fonotaga taitasi i le Maota o le a faitauina e faapea o itula e 4 o taualumaga faaauau, aua faamoemoega mo totogi.
- (2) O fonotaga faaauau i lea lava aso e tasi, o le a faitauina e avea o se fonotaga e ese ai.
- (3) O le a lē tatau ona agavaa se sui usufono mo le alauni o fonotaga, pe afai ua lē mafai e le sui usufono ona nofoia lona nofoa, mo se taimi a itiiti mai o le afa o le vaitaimi e fono ai le Fono Aoao.
- (4) I le noatia ma le fai fuafua i aiaiga o le Tulafono Tumau 30, e tatau i le Maota ona fono mai le Aso Lua i le Aso Faraile o vaiaso taitasi uma o fonotaga, ae faalagolago i galuega ua i luma o le Maota.

33. Tolopoina ona o Mataupu Faanatinati e Taua mo Tagata Uma:

- (1) O se Lafo Faatu e faapea “Ia tolopoina nei le Fono Aoao” mo le itu i le iloiloaina o se mataupu iloga faanatinati e taua mo tagata uma e faatoa mafai ona faatu mai ina ua mavae le tuuina atu o Pepa Faa-Palemene ma Lipoti ma a o le i tagofia le isi galuega o le aso o lo o aupito mai.
- (2) O se sui usufono o lo o ona fuafuaina le faatuina o se lafo faapena, o le a na tuuina atu se Faasilasilaga:
 - (a) o le mataupu autu ma se faamatalaga ootoo tusitusia o le mataupu ua fuafuaina ina ia faatalanoaina i le Fofoga Fetalai, a itiiti mai le taimi o le tasi (1) le itula, a o le i amatalia le fonotaga a le Fono Aoao; ma
 - (b) igoa o sui usufono e finagalo e saunoa i le mataupu.
- (3) Afai ua i ai i le taofi o le Fofoga Fetalai o le mataupu ua faatatauina ina ia talanoaina o se tasi o mataupu ua talafeagai ma lenei Tulafono Tumau, o le a faitauina loa e le Fofoga Fetalai le faamatalaga tusia i le Fono Aoao ma o le a tapa sui usufono o ē ua latou faamaonia le iloiloga o le mataupu ua faatatauina, ina ia tutulai mai i o latou nofoaga.
- (4) O tulafono faafoe nei mo saunoaga:
 - (a) o lē faatuina le lafo ma le Minisita na saunoa muamua e mafai ona saunoa mo le lima (5) minute;
 - (b) e tuuina atu le avanoa muamua i sui usufono e toalima (5) na muamua, o latou igoa sa tuuina atu i le (2)(b);

- (c) o le felafolafoaiga o le a patino lona talafeagai i le mataupu faapitoa na laga;
- (d) e mafai e so o se isi lava sui usufono ona saunoa mo le lima (5) minute;
- (e) o le a i ai i le Malo le aia tatau e tali atu ai pe afai lava e manaomia; ma
- (f) i le noatia ma le fai fuafua i se faatonuga a le Fofoga Fetalai, e lē tatau ona sili atu i le 60 minute, le aofaiga atoa o le taimi o faatalatalanoaga o se mataupu faanatinati e taua mo tagata uma.

34. Numera o Sui Usufono e Tatau ona Auai ona Mafai lea ona Usuia se Fono:

- (1) E leai se galuega e faia i so o se fonotaga pe afai ua i ai se faalavelave ua faatuina mai e so o se Sui Usufono o le Palemene o lo o auai faapea o le numera o sui usufono o lo o i ai (e ese ai le Fofoga Fetalai po o se isi sui usufono o lo o taitaifono) ua itiiti ifo i lo le tasi le afa o le aofai atoa o Sui Usufono o le Palemene, e le aofia ai ni nofoaga avanoa.
- (2) Afai e faaali atu i le Fofoga Fetalai e faapea ua le i atoa le numera o sui usufono e tatau ona auai ona mafai lea ona fai se fono, o le a na faatonuina loa sui usufono ina ia valaauina, ma afai e te'a minute e lima (5) ae le i atoa lava le numera o sui usufono e tatau ona auai ona mafai lea ona fai se fono, o le a na tolopoina loa le Fono Aoa e aunoa ma le tuuina atu o se fesili.
- (3) Afai e aliali mai e le o atoa le numera o sui usufono e tatau ona auai ona mafai lea ona fai se fono i le tulaga faa-Komiti o le Fono Aoa Atoa, o le a faatonuina loa e le Taitaifono ina ia valaauina sui usufono, ma afai e tea minute e lima ae le i atoa lava le numera o sui usufono e tatau ona auai ona mafai lea ona fai se fono, o le a toe see mai loa i le tulaga o le Fono Aoa ma o le a faitauina ai loa e le Fofoga Fetalai le aofaiga o sui usufono o le Fono Aoa. Afai e auai i lea taimi le numera o sui usufono e tatau ona auai ona mafai lea ona fai se fono, o le a toe see atu loa le Fono Aoa i lona tulaga faa-Komiti ae peitai, afai e le i auai lava le numera o sui usufono e tatau ona auai ona mafai lea ona fai se fono, o le a tolopoina loa le Fono Aoa e pei ona aiaia i totonu o le (2) o le Tulafono lenei.

VAEGA X

TIUTE O LE FAILAUTUSI

35. Galuega a le Fono Aoao:

I fonotaga uma a le Fono Aoao (ae vagana ai le aso muamua o le fono a le Palemene fou) e tatau ai i le Fono Aoao ona faagasolo ana galuega i le faasologa e pei ona faatulagaina i totonu o le Tulafono Tumau 45.

36. Pepa o le Faasologa o Galuega, Tulafono Tau Faaofi ma Pepa a le Palemene ia Saunia ma Tufatufaina:

- (1) O le a tatau ona mauaina i luga o le tuatusi faakomepiuta a le Palemene, se ata faataitai o le Pepa o le Faasologa o Galuega, i le 7 aso a o le i usua le fonotaga, o lo o faaalua ai:
 - (a) galuega o le a faataatia i luma o le Fono Aoao;
 - (b) le faasologa o le a faagasolo ai galuega o taua i le (a); ma
 - (c) Tulafono Tau Faaofi ma Pepa a le Palemene o le a faataatia i le laulau-a-fono ma faagasolo.
- (2) O mataupu uma faanatinati, e ao ona tauaaoina e le Failautusi, a itiiti mai o le 3 aso faigaluega a o lumanai ai le aso fono ua faamoemoe e faataatia ai i le laulau-a-fono ma faagasolo.
- (3) O le Pepa o le Faasologa o Galuega ua maea tapena, afai e i ai so o se suiga e faia mulimuli ane, o le a mafai ona maua i tuatusi faakomepiuta, i se taimi vave lava e mafai ai, a o le i tauaofia le Fono Aoao.
- (4) E ao i le Failautusi ona ia tuuina i luga o le tuatusi faakomepiuta a le Palemene, o ata i le Gagana Peretania o Tulafono Tau Faaofi ua faamaonia e le Kapeneta, i le taimi na te tauaaoina ai, mo le faataatiaina i le laulau-a-fono, ae faapena foi i Lipoti a Komiti ma Tali a le Malo.
- (5) E tatau ona tufatufa atu i sui usufono ata o Tulafono Tau Faaofi ma Lipoti a Komiti ua maea ona faaliliuina i se taimi vave lava e talafeagai ai a o lumanai ai fonotaga a le Fono Aoao po o le Komiti o le Fono Aoao Atoa.

37. Tusi o le Faasologa o Galuega:

O le a tausia e le Falautusi se tusi o le a taua o le Tusi o le Faasologa o Galuega o le a na tusia ai i totonu mataupu uma ua faamoemoeina mo le talanoaina i Fonotaga taitasi. O le a avanoa le Tusi o le Faasologa o Galuega i le asiasia e sui usufono i itula uma e tatau ai.

38. Tausiga o Tusi o Lafo ma Tualumaga ma Faamatalaga Faamauina:

O le a i le Failautusi le tausiga o Tusi o Lafo ma Tualumaga o le Fono Aoao ma Faamatalaga Faamauina ma pepa uma ma faamaumauga o so o se mea ua tuuina atu i po o e patino i le Fono Aoao, ma o le a le mafai e le Failautusi ona aveesea pe na te faatagaina le aveesea mai o so o se tasi o ia Tusi o Lafo ma Faamaumauga, faamatalaga faamauina, pepa po o faamaumauga mai le Fono Aoao po o Ofisa o le Fono Aoao e aunoa ma se poloaiga a le Fono Aoao po o se maliega po o se poloaiga a le Fofoga Fetalai.

39. Tusi o Lafo ma Tualumaga a le Fono Aoao:

- (1) O le a faamauina e le Failautusi tualumaga uma a le Fono Aoao, ma o le a avea ai ma Tusi o Lafo ma Tualumaga a le Fono Aoao.
- (2) O Tusi o Lafo ma Tualumaga a le Fono Aoao mo tauaofiaga taitasi o le Fono Aoao o le a tufatufaina i sui usufono uma i le gagana Samoa ma afai e talosagaina i le gagana Peretania e le itiiti ifo i le masina e tasi (1), a o le i amataina le tauaofiaga e sosoo ane ai.

40. Pule a le Failautusi e Lafoaia ai Faamatalaga Faamauina Tuai:

O le a i le Failautusi le pule i le faaiuga o tauaofiaga taitasi e faatamaia ai po o le lafoaia o faamaumauga a le Fono Aoao ua taua i lalo:

- (a) talosaga sa tuuina atu i le Fono Aoao i le 20 tausaga ua mavae; ma
- (b) o faamatalaga faamauina ua sili atu i le 5 tausaga -
 - (i) Pepa sa faataatia i luga o le Laulau-a-Fono ua uma ona lomina i totonu o Pepa Faapipii o Tusi o Lafo ma Tualumaga a le Fono Aoao;

- (ii) Faamaumauga a le Failautusi ma isi faaaliga (e aofia ai faaaliga o lafo) na faia i le Laulau ma o lo o faamalamalamaina i totonu o Tusi o Lafo ma Tualumaga a le Fono Aoao;
- (iii) Tusiga o faasologa o suafa mo palota tauvalaau;
- (iv) Tala ootoo o tualumaga ma pepa a Komiti Faa-Palemene o lo o faaaliga mai i lomiga i totonu o Pepa Faapipii o Tusi o Lafo ma Tualumaga a le Fono Aoao;
- (v) Lipoti a Komiti Faa-Palemene ua uma ona lomina i totonu o Tusi o Lafo ma Tualumaga a le Fono Aoao po o Pepa Faapipii;
- (vi) Faamaumauga o ata o Pepa o Faasologa o Galuega faatasi ma faamaumauga muamua a le Failautusi;
- (vii) Malelega mai le O Le Ao o le Malo ua uma ona lomina i totonu o Tusi o Lafo ma Tualumaga a le Fono Aoao;
- (viii) Faamaumauga o tusiga ma isi tusi ua le toe manaomia.

41. Faamatalaga Faamauina o Sui Usufono:

O le a tausia se faamatalaga faamauina o Sui Usufono o le Palemene e le Failautusi, le faamatalaga faamauina lea o le a tusia ai igoa o sui usufono taitasi, le Vaega Faaupufai, le aso na filifilia ai o Ia, le aso na nofoia ai e Ia lona nofoaga, ma, ina ua faaiuina le avea o Ia o se sui usufono, le aso ma le mafuaaga o lea itu.

VAEGA XI

LIPOTI FAAMAONIA

42. Lipoti Faamaonia:

- (1) O le a saunia i lalo o le taitaiga a le Failautusi se Lipoti Faamaonia o taualumaga o le Fono Aoao, le lipoti lea o le a tatau lava ona ia toeitiiti tutusa lelei i le tulaga aupito sili e mafai ma upu uma e faia i totonu o le fono i gagana e lua o le faa-Samoa ma le faa-Peretania.
- (2) O le a tatau ona lomia faasalalau le Lipoti Faamaonia i luga o le tuatusi faakomepiuta a le Palemene po o, i sea faiga e mafai ona faatonuina e le Fofoga Fetalai, ma e ao ona faaoo atu ata i sui taitoatasi e ala i faiga faaeletoroni po o se isi auala, i se taimi vave lava e mafai ai ona faatino i le faaiuga o Fonotaga taitasi.
- (3) E tatau ona faaoo atu ata o faamaumauga o saunoaga a sui usufono taitoatasi ia te i latou e faaogāina ai faiga faaeletoroni po o i se isi auala mo faasaoga a o le i lomia faasalalau; ma afai e lē toe faafoiina mai e le sui usufono lea ata i le Failautusi i totonu o le fa (4) aso mai le aso na faaoo atu ai, e mafai ona lomia loa le saunoaga e aunoa ma faasaoga.
- (4) Afai e faafinau se sui usufono i le sao o le faamatalaga faamauina o so o se lauga pe taumafai o Ia na te faia so o se suiga ogaoga i le faamatalaga faamauina, o le a faia lava e le Fofoga Fetalai le faaiuga e faasino i lea itu ma o le a faatonuina le faasalalauina o le lauga ma lana faatonuga, le faaiuga lea o le a faali atu i le sui usufono ma o le a mausali.
- (5) E tatau ona tufatufaina atu le Lipoti Aloaia o Tauaofiaga taitasi a le Fono Aoao Faitulafono i faiga faaeletoroni po o, i se isi auala i Sui Usufono uma o le Palemene i le gagana Samoa ma, afai e talosagaina, i le gagana Peretania e lē itiiti mai ma le tasi (1) le masina a o lumanai le amataga o le isi tauaofiaga e sosoo ane ai.

VAEGA XII

O LE FAAILOGA O LE PULE

43. O le Faailoga o le Pule:

- (1) O le a avea le Faailoga o le Pule ma faailoga tino mai o le pule a le Fono Aoao ua faaeina atu e ia i le Fofoga Fetalai.
- (2) O le a taatia le Faailoga o le Pule i luga o le Laulau i le faagasologa o Fonotaga uma a le Fono Aoao, ae peitai, a oo ina ua i ai le Fono Aoao i lona tulaga faa-Komiti, o le a aveeseina loa le Faailoga o le Pule mai le Laulau ma tuuina i ona lalo ifo.
- (3) A oo ina ua faataapeina le Fono Aoao o le a faafoi atu loa le Faailoga o le Pule i le puipuiga malu a le O Le Ao o le Malo.

VAEGA XIII
O LĒ E LEOINA LE FONO

44. O Lē e Leoina le Fono:

E mafai e le Fofoga Fetalai ona ia tofia se tagata e ia te ia le tofi o Lē e leoina le Fono.

VAEGA XIV

FAATULAGAINA O GALUEGA

45. Faasologa o Galuega:

(1) O galuega mo aso taitasi o le a faatulagaina lava i totonu o le Pepa o Galuega ma o le a faia lava i so o se taimi e mafai ai i le Pepa o Galuega ma o le a faia lava i so o se taimi e mafai ai i le faasologa ua tuuina atu i lalo:

- (a) Ulufale aloaia mai o le Fofoga Fetalai;
- (b) Tatalo;
- (c) Faatautoina o sui usufono fou;
- (d) Faasilasilaga mai le Taitai o le Maota;
- (e) Isi faasilasilaga a le Fofoga Fetalai;
- (f) Saunoaga o maliu;
- (g) Tuuina atu o Pepa ma Lipoti Faa-Palemene;
- (h) Faamatalaga a le Tagata Lava Ia;
- (i) Fesili mo Tali;
- (j) Faamatalaga Faa-Minisita;
- (k) Mataupu faanatinati mo tagata uma;
- (l) Lafo faatu a Minisita ma Taitaifono o Komiti Faa-Palemene;
- (m) Talosaga;
- (n) Lafo faatu mo Tulafono Tau Faaofi Faanatinati;
- (o) Faitauina o Tulafono Tau Faaofi a le Malo;
- (p) Iloiloga o Lipoti a Komiti Faa-Palemene e uiga i Tulafono Tau Faaofi;
- (q) (Lafo Faatu) Galuega a le Malo ma Galuega o le Aso;
- (r) Lafo faatu mo le tolopoina o le Fono Aoao:

Ia aiaia ai e faapea ua faaagaaga itula mulimuli o se aso fonu mo felafolafoaiga o mataupu e taua mo le Itumalo faaalaalafaga; lea e:

- (a) ao ai i se sui usufono ona tapa le faamaoniga a le Fofoga Fetalai a o lumanai ai le fonotaga; ma
- (b) e mafai ona saunoa le sui usufono mo le 10 minute; ma
- (c) e mafai e ni sui usufono se toalua ona saunoa mo le tai 5 minute e lagolago ai; ma

- (d) e i ai le aia tatau a le Malo e tali atu ai e aunoa ma se felafolafoaiga.
- (2) Mo faamoemoega o le (1)(n):
 - (a) e mafai e le Taitai o le Maota ona faatu se lafo mo se Tulafono Tau Faaofi Faanatinati a le Malo; ma
 - (b) e mafai ona faatuina se lafo mo so o se isi lava Tulafono Tau Faaofi Faanatinati e le sui usufono o lo o ia talosagaina; ma
 - (c) e faatapulaa i le tolusefulu (30) minute so o se felafolafoaiga e faia i le 'tulaga faanatinati' o se Tulafono Tau Faaofi, o i le (a) po o le (b).

46. Faatulagaina o Galuega:

- (1) A o faagasolo se vaiaso o fonotaga, e mafai e le Malo ona faatulaga ana galuega i sea faasologa e manatu o ia ua talafeagai ai ma e tatau ona ave le faamuamua i galuega a le Malo i lo galuega a Sui Usufono Taitoatasi vagana ai le aso fono lona tolu o le vaiaso o fonotaga.
- (2) O galuega a Sui Usufono Taitoatasi e faasino faapitoa lava i Tulafono Tau Faaofi a Sui Usufono Taitoatasi.

47. E Mafai ona Toe Faaauau Galuega:

- (1) O se lafo e toe faaaauau ai galuega i le tauaofiaga e sosoo ai o le a mafai ona faatu e le Taitai o le Maota e aunoa ma se faaaliga.
- (2) Ina ua faamaonia e le Palemene le toe faaaauau o galuega i le tauaofiaga e sosoo ai, o lea galuega o le a toe faaaauau i le tulaga sa tulai ai i le tauaofiaga ua tuanai.

48. Galuega o le Aso:

- (1) O Galuega o le Aso Tau le Malo o le a tuuina atu i ai le avanoa muamua o Galuega uma o le Aso ma Faaaliga Tau le Malo o Lafo Faatu i lo isi Faaaliga uma o Lafo Faatu i fonotaga taitasi uma a le Fono Aoao, vagana ai aso fono lona tolu taitasi uma e tuuina atu ai le avanoa muamua i Faaaliga o Lafo Faatu a Sui Usufono Taitoatasi i lo Faaaliga uma o Lafo Faatu Tau le Malo.

- (2) O Galuega o le Aso ma Faaaliga o Lafo Faatu o le a tagofia i le faasologa o lo o faatutu mai ai i le Pepa o le Faasologa o Galuega, peitai o le a i ai i le Malo le aia tatau e tuuina ai Galuega o le Aso Tau le Malo ma Faaaliga o Lafo Faatu Tau le Malo i le Pepa o Galuega i le faasologa o le a tagofia ai ia mataupu.
- (3) O Galuega o le Aso e le i oo i ai a o lumanai le faaiuga o se fonotaga po o le atofaina mo se aso e lē fono ai le Fono Aoa, o le a faatulagaina loa mo le isi fonotaga a le Fono Aoa.

VAEGA XV

PEPA

49. **Tuuina Atu o Pepa:**

- (1) E mafai e se Minisita ona tuuina atu Pepa i le Fono Aoao e auala i le tauaaoina atu i le Failautusi e se Minisita a o le i fono le Fono Aoao i so o se aso fono. O Pepa e tauaaoina atu i le Failautusi o le a avea e faapea ua faataatia i luga o le Laulau-a-Fono i le taimi lava e fono ai le Fono Aoao.
- (2) O le a tolaulauina e le Failautusi i le Fono Aoao le faasologa o ia pepa i le taimi o le Tuuina atu o Pepa.
- (3) E ese mai ai i so o se isi aiaiga i lenei Tulafono Tumau, e mafai foi e le Fofoga Fetalai ona tuuina atu ni pepa i le Fono Aoao i le taimi o le Tuuina atu o Pepa.
- (4) O so o se pepa ua faatalosagaina e se sui usufono ina ia tuuina atu i le Fono Aoao e faatoa mafai ona tuuina mai e ala i se iugafono a le Fono Aoao.
- (5) E tatau ona faamauina i luga o le faasologa o le Pepa o Galuega pepa uma e tuuina atu i le Fono Aoao.
- (6) E tatau i le Failautusi ona faavasega Pepa ma tufatufa atu i le Komiti Faa-Palemene aupito talafeagai ua tofia i lalo o le Tulafono Tumau 144.

50. **Ta'ua o Faamatalaga Mai Pepa Aloaia:**

I so o se taimi e ta'ua ai e se Minisita se faamatalaga mai se pepa aloaia e faatatau i mataupu e aafia ai tagata lautele e mafai e se sui usufono, i luga o se mea e fia faasao ona tapa le Minisita, ina ia faataatia le pepa aloaia i luga o le Laulau-a-Fono. E ao loa i le Minisita ona faataatia i luga o le Laulau-a-Fono le pepa aloaia vagana ai o se mataupu puipuia.

51. **Lipoti a Ofisa o le Palemene:**

O so o se Lipoti Faaletausaga po o isi lipoti e tuuina atu i le Ofisa o le Fono Aoao Faitulafono mai le Komesina o Sulufaiga, le Pule ma Suetusi Aoao ma

le Ofisa o le Failautusi o le Fono Aoao Faitulafono, e tatau ona tuuina atu i le Komiti o Tulafono Tumau, Faiga Palota, Talosaga ma Tofiga Faale-Faavae mo iloiloga.

52. Tuuina atu o Lipoti a Komiti Faa-Palemene e uiga i Tulafono Tau Faaofi, Talosaga ma Fesili o Tulaga Aloaia:

- (1) E tatau i Komiti Faa-Palemene taitasi ua tuuina atu i ai se Lipoti Faaletausaga, ona lipoti atu i le Fono Aoao i totonu o le 2 masina mai le aso na tuuina atu i ai le pepa i lalo o le Tulafono Tumau 49.
- (2) E tatau i Komiti Faa-Palemene taitasi na tuuina i ai se Tulafono Tau Faaofi, talosaga po o se fesili o tulaga aloaia, ona lipoti atu i le Fono Aoao i totonu o le tolu (3) masina mai le aso na tuuina atu ai.
- (3) O le a faatatauina e faapea ua tuuina atu se Lipoti a se Komiti Faa-Palemene e ala i le faaooina atu i le Failautusi, i so o se aso faigaluega.
- (4) O le a faatatauina e faapea ua lomia faasalalau i lalo o le pule faataga a le Fono Aoao Faitulafono se Lipoti i le taimi lava e tuuina atu ai.
- (5) E tatau i le Failautusi ona faitauina le faasologa o Lipoti i le taimi atofaina mo le Tuuina atu o Lipoti a Komiti Faa-Palemene.

53. Iloiloga o Pepa:

- (1) O le a faatulagaina i luga o le Pepa o Galuega ia Pepa na faataatia i luga o le Laulau-a-Fono e tusa ai ma se lafo i le faasologa na faataatia ai i lalo o le ulutala "Iloiloga o Pepa".
- (2) A oo ina faasilasilaina le "Iloiloga o Pepa" e le Fofoga Fetalai o le a fofogaina atu le Igoa ma le Numera o Pepa taitasi ma tapaina le sui usufono na faatuina le lafo mo le faataatiaina o lea pepa ina ia saunua muamua.

54. Iloiloga o Lipoti a Komiti:

- (1) O le a faatulagaina Lipoti a Komiti Faa-Palemene ua tuuina atu i luga o Pepa o Galuega o le aso fono e sosoo ai i le faasologa na tuuina atu ai i lalo o le ulutala "Iloiloga o Lipoti a Komiti Faa-Palemene."

- (2) A oo ina faasilasilaina le “Iloiloga o Lipoti a Komiti Faa-Palemene” e le Fofoga Fetalai o le a fofogaina atu le Igoa ma le Numera o lipoti taitasi, ma e tatau i le Taitaifono o le Komiti e ona le Lipoti ona faatu le lafo, “Ina ia faautagia le Lipoti”. I le toesea o le Taitaifono, e tatau i le Sui Taitaifono po o se isi sui usufono o le Komiti ona faatu le lafo.
- (3) E fuafua e Komiti a latou iloiloga ma teuteuga o Tulafono Tau Faaofi.
- (4) E fautuaina e le Komiti le Minisita e fitoitonu i ai e uiga i teuteuga ua faia e le Komiti i se Tulafono Tau Faaofi i le 3 vaiaso a o lumanai ai ona faataatia i luga o le laulau-a-fono a le Fono Aoao.
- (5) Afai e manao le Minisita e laga se mataupu i totonu o teuteuga a le Komiti ua fautuaina i se Tulafono Tau Faaofi, e mafai e le Minisita ona feutagai ma le Komiti i totonu o le fitu (7) aso talu ona ia taulimaina le fautuaga i lalo o le (4).
- (6) Afai e tutumau vaega faaupufai e lua i o latou manatu e tatau ona faia le faaiuga o le mataupu i totonu o le Maota i le taimi e faataatia ai le Lipoti a le Komiti ma le iloiloga auiliili o le Tulafono Tau Faaofi.

55. Tali a le Malo i Lipoti a Komiti Faa-Palemene e uiga i Lipoti Faaletausaga:

- (1) O le a tatau i le Malo, ia le silia le onosefulu (60) aso i le maea ai ona tuuina atu e le Failautusi se Lipoti a se Komiti, ona tali atu i lipoti uma a le Komiti.
- (2) O le a tatau ona faailoa sao atu i tali a le Malo fautuaga a le Komiti ma faamautuina ai le tulaga o le Malo i so o se mataupu na laga.
- (3) I le taulimaina ai o Tali a le Malo, o le a tatau i le Failautusi i se taimi vave lava e mafai ai ona tufatufa atu tali a le Malo i sui usufono uma, ma faatulaga se fonotaga a le Komiti o le Fono Aoao Atoa i totonu o le sefulu ma le fa (14) aso.
- (4) Afai e manatu se sui usufono e manao e laga so o se mataupu mai Tali a le Malo, e ao i lea sui usufono ona ia fautuaina le Failautusi e ala i se faiga tusitusia o lea mataupu i le 7 aso mai le fonotaga a le Komiti o le

Fono Aoao Atoa. O le a tuuina atu lea mataupu e le Failautusi i le Minisita talafeagai i le 5 aso mai le fonotaga a le Komiti o le Fono Aoao Atoa, ma e mafai e le Minisita ona tali tuufofoga atu i totonu o le Komiti o le Fono Aoao Atoa.

- (5) Afai e leai ni mataupu e laga e sui usufono, i le maea ai o le tali a le Minisita, o le a tatau loa i le Minisita e fitoitonu i ai ona talia le lipoti a le Komiti ma faatu se lafo mo le faamaonia ai e le Komiti o le Fono Aoao Atoa o Tali a le Malo.
- (6) Afai e finagalo se sui usufono, ua fautuaina le Failautusi e pei ona i ai i le (4), e tapa se faamalamalamaga o so o se vaega o le tali a se Minisita, e mafai e le Fofoga Fetalai ona tuuina atu le avanoa ia te ia e faia ai o se fesili tuufofoga se tasi (1), ma faatonuina le Minisita ina ia tali atu i ai.
- (7) O fesili tuufofoga taitasi ma tali e faatapulaa i le 10 minute.
- (8) Afai ua lē faamalieina le sui usufono e pei ona i ai i le (6) i le tali a le Minisita, e mafai e le sui usufono ona laga so o se mataupu talafeagai e faaogāina ai le Taimi o Fesili ma o le tali a le Minisita o le a faapea ona mausali.

56. Iloiloga o Lipoti a Komiti Faa-Palemene i Tulafono Tau Faaofi:

- (1) O Komiti Faa-Palemene taitasi ua tuuina atu i ai se Tulafono Tau Faaofi mo le iloiloga o le a tatau ona iloilo ina le Tulafono Tau Faaofi ma lipoti atu i le Fono Aoao i totonu o le tolu (3) masina.
- (2) E mafai e le Komiti i luga o se lafo faatu e faatagaina ai e le Fono Aoao ona faaauau ana iloiloga, ina ia mafai ai e le Komiti ona lipoti atu ana sailiiliga i le fonotaga e sosoo ai.
- (3) A maea ona tuuina atu le Lipoti a se Komiti Faa-Palemene i se Tulafono Tau Faaofi, o le a faatulaga loa le Igoa o le Tulafono Tau Faaofi ma iloilo ina i lalo o Galuega Tau le Malo i lona faamatalaga - Iloiloga o le Lipoti a le Komiti Faa-Palemene.

VAEGA XVI TALOSAGA

57. Talosaga:

- (1) Na o se sui usufono na te mafai ona tuuina atu se Talosaga i le Fono Aoao, o ia lea o le a tusia lona suafa i le amataga o sea lava talosaga.
- (2) O se sui usufono na te tuuina atu se Talosaga o le a faapitoa lava sana faamatalaga puupuu i vaega o tagata e sau ai sea talosaga, le aofai o e o lo o saina ai o latou suafa ma tuuaiga matuia o aofia ai i totonu, ma le faitauina mai o le manao o sea Talosaga.
- (3) E mafai e so o se sui usufono ona faatu se lafo ina ia faitauina le Talosaga. E leai se fefaaaliaiga o taofi o le a faatagaina i sea lafo faatu ma afai e faaluaina o le a tuuina atu loa lava le fesili. Afai ua finagalo malilie i le lafo faatu o le a faitauina loa e le Failautusi le Talosaga.
- (4) O le a faatonuina Talosaga uma, e aunoa ma le tuuina atu o le Fesili, ina ia faataatia i luga o le Laulau-a-Fono. O ia Talosaga o le a tuuina atu i se Komiti Faa-Palemene ia tofia e le Fono Aoao.
- (5) E leai se sui usufono e mafai ona na tuuina atu i le Fono Aoao se Talosaga na saina e ia lava, vagana o lo o avea ma sui o se faalapotopotoga faitele ua faamaonia faaletulafono.
- (6) E leai se Talosaga o le a tuuina atu i le Fono Aoao vagana ona ua uma ona faamaonia e le Failautusi ua tusa ai ma tulafono e puipui ai ua taua i lalo -
 - (i) e tatau i Talosaga taitasi uma ona ia sao lelei ona faatuatusi mai i le Fono Aoao i le agaga faaaloalo, le gagana mamalu ma le logoleleia ma e tatau ona faaiuina i se talosaga ia faaali mai ai le tulaga aoao o le mea o lo o avea ma sini a lē ua Talosaga;
 - (ii) e tatau i Talosaga taitasi uma ona ia saina e le itiiti mai i lo le tagata e toatasi i luga o pepa taitasi uma o lo o tusia ai le Talosaga;
 - (iii) afai ua saina suafa i ni pepa e ese ai i lo le pepa o lo o i ai le Talosaga lava ia, o le a tatau i ia pepa ona ia faaalua ai i o latou luga le manaoga o le Talosaga;

- (iv) o le a le faitauina ni suafa ua sainia po o ni faailoga, ae vagana, i le itu i suafa ua sainia, ona ua faia i le tusilima a le tagata lava ia o lo o saina ai, ma i le itu i faailoga, ua i ai nisi e molimau ai, seia vagana i ia itu uma e lua ona ua sosoo atu ai ma tuatusi o tagata o lo o saina ai po o lo o faia se faailoga. E tatau i suafa faapena e sainia ona ia tusia ai i luga o le pepa, ae le o le faapipii ane i ai po o se tasi lava faiga e ese ai ua faapipii ane i pepa taitasi o lo o tusia ai le Talosaga lava ia;
 - (v) o le Talosaga a se Faalapotopotoga Tuufaatasi o le a tatau lava ona ia pipii i ai lana faamaufaailoga e masani ai, pe afai e i ai sana faamaufaailoga;
 - (vi) o Talosaga taitasi uma o le a tusia i le gagana Samoa po o le gagana Peretania, ma ia aumai ai faatasi ma se faaliliuga;
 - (vii) e leai ni tusi, faamatalaga tauto, po o nisi pepa e mafai ona faapipii i se Talosaga;
 - (viii) e leai ni mea e titina ese po o ni fevaseaiga e mafai ona faia i totonu o so o se Talosaga;
 - (ix) e leai se faamatalaga e faasino i so o se fefaaaliaiga o taofi i totonu o le Fono Aoa o le a taua i se Talosaga.
- (7) Vagana ona ua i ai le maliega o le O Le Ao o le Malo, o le a le tauaaoina e le Fono Aoa so o se Talosaga o lo o faatagisia mai ai se tupe foai faameaalofa a le Malo, a o Talosaga o lo o faatoga mai ai mo le faatagaina atu faameaalofa o ni tupe i se Tulafono Tau Faaofi e mafai ona tauaaoina e aunoa ma le maliega o le O Le Ao o le Malo.
- (8) O le a le iloiloina e le Fono Aoa po o le Komiti o Tulafono Tumau, Faiga Palota, Talosaga ma Tofiga Faale-Faavae so o se Talosaga e faasino i so o se mataupu o lo o i ai se vaifofo faale-faamasinoga e mafai ona fai i ai ae e le i i ai se talosaga na faia mo lea itu.
- (9) O le faiga o le a tusia ai se Talosaga i le Fono Aoa o le a faapenei:

“I LE FONO AOA O FAITULAFONO A SAMOA:

“O le Talosaga Faamaulalo a [ia tusia iinei suafa po o faamatalaga e uiga i le ua po o e ua talosaga].”

“UA FAAALIA AI:

“E faapea [ia faamatala iinei le mataupu po o uiga ua oo i ai e fia aumaia ina ia silafia e le Fono Aoa]. O le mea lea ua faatoga atu ai le ua talosaga (po o e ua talosaga) e faapea [ia faamatala iinei le mea tonu o lo o avea ma sini faapitoa o le talosaga a le ua talosaga po o le aano moni o le fesoasoani o lo o faatagisia]. Ma ua faatoga atu ai le po o e ua talosaga atu, e pei o se tiute e noatia ai i so o se talosaga faapenei ma nisi mea.”

“Suafa faatasi ai ma faatuatusi mulimuli ane ai.”

VAEGA XVII

FESILI AGAI I MINISITA MA ISI USUFONO

58. Mataupu Autu o Fesili:

- (1) E mafai ona tuuina atu ni fesili i Minisita e faasino i:
 - (a) Mataupu e aofia i a latou galuega faale-Malo; po o
 - (b) Tulafono Tau Faaofi, lafo faatu po o nisi mataupu e aafia ai tagata uma e fesootai ma le galuega a le Fono Aoa o lo o ia i latou ona tauaveina.
- (2) E mafai foi ona tuuina atu ni fesili i isi sui usufono e faasino i se Tulafono Tau Faaofi, lafo faatu po o se tasi lava mataupu e aafia ai tagata uma e fesootai ma le galuega a le Fono Aoa o lo o i ia sui usufono ona tauaveina.

59. Faaaliga o Fesili:

- (1) Faaaliga o fesili (faamaoti mai ai pe se tali tuufofoga pe se tali tusitusia e manaomia) o le a tusitusia ma faaoo atu e sui usufono i le Failautusi.
- (2) O Faaaliga o fesili mo tali tuufofoga o le a faaoo atu i le 2 aso a o lumanai ai le aso e manaomia ai le tali.
- (3) O le a faatulagaina e le Failautusi i luga o le Pepa o Galuega ia faaaliga o fesili mo tali tuufofoga na faaoo atu i le taimi faatonuina.
- (4) O Faaaliga o fesili mo tali tusitusia o le a faaoo atu ao lumanai le lua (2) o aso e manaomia ai le tali.

60. Fesili Faanatinati:

- (1) E ese mai ai i le Tulafono Tumau 59 so o se sui usufono e manaomia le fia faia o se fesili faanatinati faatatau i mataupu e taua mo tagata lautele, e tatau ona ia tuuina atu i le Failautusi se ata o sea fesili ua faatu mai ma faailogaina "fesili faanatinati" ma e ao foi ona tuuina atu se ata i le Minisita o ia lea ua faamoemoe e saunoa i sea fesili i le le itiiti ifo i le 1 le aso a o le i oo i le aso e manaomia ai le tali.

- (2) A maea ona tuuina atu fesili mo tali tuufofoga i Minisita, e ao i le Fofoga Fetalai (pe afai ua manatu le Fofoga Fetalai o le fesili ua faatuina o se fesili e taua mo tagata lautele ua tatau ona tali i le taimi lava lea) ona fofogaina le faamoemoe o le fesili i le Fono Aoao, ina ia mafai ai e se sui usufono ona agai atu loa e faia sea fesili.

61. Mea e Aofia i Totonu o Fesili:

- (1) O le a tatau ona ogatasi Fesili taitasi uma ma tulafono e puipui ai ua tuuina atu i lalo:
- (a) e le tatau ona aofia i se Fesili ni igoa o tagata po o ni faamatalaga e le matua tatau ai e fai ma mea e le malamalama ai le fesili;
 - (b) e le tatau ona aofia i se Fesili ni faamatalaga e le o nofo sauni le sui usufono o lo o faia le fesili na te faamaonia;
 - (c) e le tatau ona aofia i se Fesili se finauga, mafaufauga taumate, taofi, faamatalaga uiga, fuaitau faasalaese e faamatala ai le uiga o se tagata po o ni faamatalaga finauvale i se mea faatauva, fuaitau faaviivii ae pepelo po o ni faamatalaga faatupu faalavelave;
 - (d) e le tatau ona faasino se Fesili i fefaaaliaiga o taofi po o ni tali i Fesili sa faia i lea lava tauaofiaga;
 - (e) e le tatau ona faasino se Fesili i taualumaga i totonu o se Komiti Faa-Palemene e le i oo ina tuuina atu sana lipoti i le Fono Aoao;
 - (f) e le tatau i se Fesili ona sailia ai se faamatalaga e uiga i so o se mataupu e faalilolilo i lona tino mai;
 - (g) e le tatau ona faaatagia i se Fesili se faaiuga a se faamasinoga tau le tulafono ma e leai se Fesili e tatau ona faia e faatatau i so o se mataupu ua i luma o le Faamasinoga *ae le i faia i ai se faaiuga*;
 - (h) e le tatau ona faia se Fesili ina ia maua ai se faaaliga o se taofi, le teuteuga o se mataupu faaletulafono e le i tino po o le tali i se manatu faatu e puipui ai;
 - (i) e le tatau ona faia se Fesili e faasino i uiga po o le amio a so o se tagata ae vagana i lona tulaga faale-tofi po o le galuega;
 - (j) e le tatau ona faia se Fesili e sailia ai se faamatalaga ua uma ona i ai i totonu o tusi faasalalau faale-Malo po o tusi e masani ona faatepa i ai i se mea e fia iloa; ma

- (k) o se Fesili ua uma ona tuuina atu se tali atoatoa o le a le tatau ona toe faia i le faagasologa o se fonotaga lava e tasi.
- (2) Afai ua i ai i le taofi o le Fofoga Fetalai ua solia pe faaleagaina i so o se Fesili na tuuina atu ai e se sui usufono se faaaliga i le Failautusi po ua sailia ai e se sui usufono le faatagaina ina ia na faia e aunoa ma se faaaliga, so o se tuutuuga o lenei Tulafono, e mafai e ia ona na faatonuina e faapea:
 - (a) ia lomia le fesili po o le fesiligia faatasi ai ma se suiga e mafai e ia ona na faatonuina; po o le
 - (b) logoina o le sui usufono e aafia ai e faapea ua le mafai ona faaulufale mai o le Fesili.

62. Faiga Tau i le Fesiligia ma le Taliga o Fesili:

- (1) O lenei Tulafono Tumau e faaaogā i fesili e faanatinati le tali pe lei foi.
- (2) Afai e manaomia e se sui usufono se tali tusitusia i lana fesili, e ao i lea sui usufono ona tuuina atu se fesili tusitusia i le Minisita e talafeagai ai, faatasi ai ma se ata ua faatoai atu i le Failautusi, i totonu o le 48 itula a o lumanai ai le fonotaga.
- (3) E mafai e le Minisita:
 - (a) ona tuuina atu se tali tusitusia i le Failautusi i totonu o le 24 itula a o lumanai ai le fonotaga, ma e ao ona faailoa e le Failautusi lenei tulaga i totonu o Pepa o Galuega; po o
 - (b) i le lē maua ai o se tali tusitusia, ia tuuina atu se tali tuufofoga i le Maota.
- (4) I le itu i le (3)(a) e mafai e le sui usufono e i ai se fesili e aunoa ma se faaaliga, ona faaleo se fesili tuufofoga e tasi (1), ma e mafai i le pule faitalia a le Fofoga Fetalai, ona faaleo se isi fesili faaopoopo e tasi (1), ma o le tali tuufofoga a le Minisita e faaiuina ai le mataupu e aunoa ma nisi felafolafoaiga. O fesili tuufofoga ma fesili faaopoopo e tatau ona talafeagai i le tali a le Minisita e pei ona i ai i le (3)(a).
- (5) E mafai e le Fofoga Fetalai ona faia le faaiuga i luga o itu taualoa o le tali atu, ma e mafai ona faatonuina le Minisita ina ia tuuina atu se tali talafeagai i totonu o se taimi talafeagai pe afai ua lē mafai e le Minisita ona tuuina atu se tali i lea lava fonotaga.

- (6) E mafai ona faatulagaina se aofaiga o le taimi e 60 minute i se fonotaga mo fesili.
- (7) O le tali a le Minisita o lo o i le (3), pe tusinga pe tuufofoga, e tatau ona tuusao ma agatonu i le mataupu o le fesili, ma e lē tatau ona aofia ai:
 - (a) faamatalaga ma igoa o so o se tagata vagana ai ua matua tatau ai ona manaomia i le tali o le fesili;
 - (b) o finauga, mafaufauga taumate, fuaitau faasala ese e faamatala ai se uiga o se tagata, faamatalaga finauvale i se mea faatauva, fuaitau faaviivii ae le moni po o ni faamatalaga tau faavalea;
 - (c) o lafoga tau faaleaga e faasino i le Fono Aoao po o so o se sui usufono po o so o se uiga le migao po o uiga e le tusa ai ma tulaga mamalu o le Palemene; po o
 - (d) toe laga o Felafolafoaiga sa faia i totonu o le tauaofiaga o lo o faagasolo, o taualumaga i totonu o Komiti Faa-Palemene e le tatalaina i tagata lautele e le i lipotiina atu i le Fono Aoao, po o i se mataupu o lo o faatali se faaiuga a le faamasinoga ae vagana ai o sea faamatalaga ua matua tatau lava ona faia i le tali o le fesili.

VAEGA XVIII

FAAMATALAGA A MINISITA

63. Faamatalaga a Minisita:

- (1) E mafai ona faia faamatalaga i so o se taimi e Minisita e uiga i le faaiuga ma le tulaga o le Malo i so o se mataupu.
- (2) E mafai ona faalavelavea le fefaaaliaiga o taofi i so o se mataupu o lo o i luma o le Fono Aoao ina ua faatagaina e le Fofoga Fetalai ina ia mafai ai ona faia se Faamatalaga a se Minisita.
- (3) E leai se fefaaaliaiga o taofi i se Faamatalaga a se Minisita o le a faatagaina i le taimi lava e fai ai, ae mafai e so o se sui usufono ona ia faatu se lafo ina ia lomia sea Faamatalaga ma faataatia i luga o le Laulau-a-Fono e avea o se Pepa mo le Iloiloina.
- (4) Afai e manaomia e se sui usufono se faamalamalamaga e faatatau i le Faamatalaga a Minisita, e mafai e le sui usufono ona fesili a o faagasolo le Taimi o Fesili.
- (5) Afai o i ai se mataupu e aafia ai se itumalo faaalaalafaga o manaomia ai se tali faanatinati e mafai e le sui usufono ona talosaga i le Fofoga Fetalai mo se avanoa i mataupu faanatinati tau i itumalo faaalaalafaga i le iuga o lea lava aso fono.

VAEGA XIX

FAAMALAMALAMAGA A LE TAGATA LAVA IA

64. Faamalamalamaga a le Tagata Lava Ia:

- (1) Ina ua finagalo malilie i ai le Fono Aoao ma ua faatagaina e le Fofoga Fetalai, e mafai e se sui usufono i le taimi atofaina mo Faamalamalamaga Tau le Tagata Lava Ia e tusa ma tuutuuga o le Tulafono Tumau 45 (Faasologa o Galuega) ona faamalamalama mataupu e faasino i le tagata lava ia e ui lava ina e le o i ai se Mataupu i luma o le Fono Aoao, ae peitai, o ia mataupu o le a le faia i ai se fefaaaliaiga o taofi ma o le a faapitoa le tautalaga a le sui usufono lava ia i le faamamaina po o le puipuiga o lana amio. O le a muamua lava ona tuuina atu fuaitau o le faamatalaga ua faamoemoeina i le Fofoga Fetalai.
- (2) O itu e fia faasao i le tulaga sao o Tala Otooto e mafai foi ona lagaina i le taimi atofaina mo Faamalamalamaga Tau le Tagata Lava Ia.

VAEGA XX

LAFO FAATU MA TOE TEUTEUGA

65. Faaaliga o Lafo Faatu:

Vagana ona ua ese ai se faiga ua faatonuina e so o se tasi o nei tulafono, o le a tuuina atu le faaaliga o so o se lafo faatu ua faamoemoeina e faia ae vagana ai lafo faatu ua faaaliga i lalo:

- (a) se lafo faatu e faasino i se mataupu tau le tulaga aloaia;
- (b) se lafo faatu mo le tolopoina o le Fono Aoao po o se fefaaaliaiga o taofi;
- (c) se lafo faatu ia faitauina se talosaga po o le tuuina atu i se Komiti Faa-Palemene;
- (d) se lafo faatu e toe teuteu ai se lafo faatu e leai se faaaliga e manaomia ai po ua talanoaina ina ua tuanai itula e luasefulu ma le fa (24) talu ona tuuina mai le faaaliga;
- (e) se lafo faatu ina ia le toe saga faafogaina se sui usufono;
- (f) se lafo faatu mo le tuueseina o se sui usufono e tusa ma le Tulafono Tumau 92 (Tulaga Sagatonu i totonu o le Fono Aoao);
- (g) se lafo faatu mo le tuuina atu o se Tulafono Tau Faaofi i se Komiti Faa-Palemene;
- (h) se lafo faatu ina ia see atu le Fono Aoao i lona tulaga faa-Komiti e iloiloaina ai se Tulafono Tau Faaofi;
- (i) se lafo faatu ina ia lipoti atu le tulaga ua oo i ai le faagasologa o le galuega;
- (j) se lafo faatu mo so o se Faitauina o se Tulafono Tau Faaofi;
- (k) se lafo faatu mo le toe faauiese mai i tua o se Tulafono Tau Faaofi;
- (l) i le pule faitalia a le Fofoga Fetalai po o le Taitaifono i le tulaga faa-Komiti, se lafo faatu mo le toe teuteuina o se sese tau le karama po o le lomitusi po o se tasi lava ituaiga o toe teuteuga laiti;
- (m) se lafo faatu mo le tuumuli ese o tagata ese;
- (n) se lafo faatu mo le filifiliga o se sui usufono e tusa ma le Tulafono Tumau 26 (Taitaifono i le Fono Aoao).

- (o) so o se lafo faatu e taliaina e le Fofoga Fetalai lona tulaga faanatinati;
- (p) se lafo faatu ina ia lomina se Faamatalaga faa-Minisita ma faataatia i luga o le Laulau-a-Fono e avea o se Pepa mo le Iloiloina; po o
- (q) se lafo e tuuina ai i luma galuega.

66. Faiga Tau le Tuuina Mai o Faaaliga:

- (1) O le a faaooina mai faaaliga uma i le tuuina atu i le Laulau-a-Fono pe a oo ina tauaofia le Fono Aoao po o le faaooina atu i le Ofisa o le Failautusi ina ia mafai ai ona tauaaoina i totonu o itula ua fuafuaina mo lea itu.
- (2) O le a sainia faaaliga uma e le sui usufono o lo o faatuina le lafo po o le lafo toe teuteu.
- (3) O faaaliga taitasi uma o le a tuuina atu i le Fofoga Fetalai, o ia lea o le a ia faatonuina lea faaaliga ina ia lomina i ona uluai tuutuuga po o le faatasi ai ma ni toe teuteuga e pei o le a ia faatonuina, po o le toe faafoi atu lea o faaaliga i le sui usufono na ia tuuina mai e faapea e le mafai ona faaulufaleina.
- (4) O lafo faatu po o toe teuteuga i Tulafono Tau Faaofi ua maua e le Failautusi o le a tatau lava ona ia lomina ma tufatufaina atu e ia tusa lava po o ni mataupu e le manaomia ai se faaaliga, ma, o le itu i toe teuteuga i Tulafono Tau Faaofi, o le a tatau lava ona faatatauina, i le tulaga e mafai ona fai ai i le faasologa o le a faatutu mai ai ia toe teuteuga.
- (5) E leai se faaaliga tuufofoga e tatau ona tuuina mai i totonu o le Fono Aoao ae peitai e mafai e se sui usufono ona ia logoina le Fono e tusa ma sona faamoemoe na te lagaina se mataupu i le taimi e tolopoina ai.

67. Umi o le Taimi o le Faaaliga Manaomia:

- (1) Vagana ona e pei ona aiaia i le parakalafa aupito mai o lo o sosoo ai, e leai se lafo faatu o le a tatau ona talanoaina seia oo ina ua tuanai le tolu (3) o aso pe a itiiti mai (e le aofia ai so o se Aso Sa po o se aso malolo o tagata uma) talu ona tuuina atu le faaaliga e pei ona fuafuaina i totonu o le Tulafono Tumau 65 (Faaaliga o Lafo Faatu).

- (2) O se lafo faatu e manaomia ai se faaaliga ma ua faatuina e se Minisita, po o se lafo faatu e toe teuteu ai se lafo faatu e manaomia ai se faaaliga po o se lafo faatu mo le toe teuteuina o se Tulafono Tau Faaofi, e mafai ona talanoaina ina ua atoa le luasefulu ma le fa (24) itula talu ona tuuina mai le faaaliga:

Ae peitai a oo ina ua talanoaina se lafo faatu a ua tuanai le luasefulu ma le fa (24) itula ona tuuina mai o le faaaliga, e mafai ona faatuina mai ni lafo e toe teuteu ai e aunoa ma se faaaliga.

68. E Mafai ona Toe Sua Tuutuuga o se Faaaliga:

Ina ua mavae atu o se Faaaliga o se Lafo Faatu, e mafai ona toe sua tuutuuga o lea Lafo Faatu e le sui usufono, o ia lea o le a tuuina atu i le Failautusi se Faaaliga ua toe teuteuina. O le a tuuina atu e le Failautusi sea Faaaliga toe teuteuina i le Fofoga Fetalai o ia lea o le a ia faatonuina ina ia lomia le Faaaliga i lona tulaga toe teuteuina po o le toe faafoi atu i le sui usufono na ia tuuina mai, ua le talia.

69. Tulaga Faasolo Aloaia o Lafo Faatu:

O le a i ai le tulaga faasolo aloaia o Lafo Faatu i aso taitasi o fonotaga e tusa ma le faagasologa o lo o maua ai e le Failautusi ni Faaaliga ma faamauina i le Pepa o Galuega:

Ae vagana ai e faapea ua faatagaina e le Fofoga Fetalai ma faatasi ai ma le maliega a le sui usufono o ia lea e ana le lafo faatu o le a iloiloaina, e mafai ona toe sua le faasologa aloaia o Pepa o Galuega.

70. Ia Faaluaina Lafo Faatu:

- (1) Vagana ona ua ese ai se tasi faiga ua matua aiaia i totonu o so o se tasi o Tulafono nei, e tatau lava ona faaluaina so o se lafo faatu, ae vagana ona ua fai i le tulaga faa-Komiti o le Fono Aoao Atoa, ma afai e le faaluaina o le a le talanoaina pe tusia foi i Tala Ootoo.
- (2) E mafai i se na ia faatuina so o se lafo ona saunoa i uiga autu ma itu taua o lana lafo faatu a o le i faatuina aloaia peitai afai e le faaluaina o le a tafea loa lava.

71. Toe Faauiese o Lafo Faatu ma Lafo Toe Teuteu:

- (1) E mafai e se sui usufono ua ia faatuina se lafo po o se lafo toe teuteu ona toe faauiese i tua sea lafo faatu po o se lafo toe teuteu ae afai ua uma ona faaluaina le lafo faatu e faatoa mafai ona ia toe faauiese i tua ina ua tuuina atu i ai le faatagaga a le Fono Aoao.
- (2) O se lafo faatu po o se lafo toe teuteu ua faia i ai se isi lafo toe teuteu e le mafai ona toe faauiese seia vagana ona ua uma ona tagofia po ua toe faauiese le lafo toe teuteu lea na faatu mulimuli.

72. Lafo Faatu e Toe Teuteu ai Tulafono Tumau:

O le faaaliga o so o se lafo faatu mo le toe teuteuina o so o se tasi o Tulafono nei o le a tatau lava ona auina mai faatasi ma se ata faataitai o toe teuteuga ua faamoemoeina. A oo ina ua faatuina le lafo ma ua faaluaina o le a tuuina atu loa lava le fesili. O le a le faatagaina se fefaaaliaiga o taofi i sea lafo faatu. Afai ua malilie i le lafo faatu o le a tuuina atu loa i le Komiti o Tulafono Tumau, Faiga Palota, Talosaga ma Tofiga Faale-Faavae le toe teuteuga ua faatu mai ma e leai nisi taualumaga o le a faia i ai seia oo ina ua tuuina mai se lipoti a le Komiti o Tulafono Tumau, Faiga Palota, Talosaga ma Tofiga Faale-Faavae e uiga i lea lava mataupu.

73. Tuuina Atu o le Fesili:

- (1) O le a faaaliga e le Fofoga Fetalai lona taofi ina ua tuuina atu le fesili po ua manumalo le "Ioe" po o le "Leai" ma, vagana ona ua malilie i ai le vaega toaititi, o le a faaiuina le Mataupu i se Palota Tauvalaau.
- (2) O le tuuina atu o se Fesili e faaiuina i le Faamaonia po o le le Faamaonia i le toatele o leo, "Ioe" po o le "Leai".
- (3) E mafai e le Fofoga Fetalai ona vaevaeina se mataupu lavelave ina ia taofia ai so o se fenuniaiga o mafaufauga.

74. Lafo Toe Teuteu:

- (1) E le mafai ona fuafuaina se lafo toe teuteu ina ia faia i ni upu ua faafinagaloina e le Fono Aoao o le a faatu mai e avea ma vaega o se Mataupu po ua faaofi atu i ai po ua faaopoopoina i se Mataupu, vagana ona o le faaopoopoina o isi upu i ai.

- (2) O se lafo toe teuteu na faatu mai o le a muamua ona faamaapeina a o le i mafai ona faatuina se isi lafo toe teuteu i le uluai Mataupu.
- (3) E mafai ona faatu mai ni lafo toe teuteu i se lafo toe teuteu na faatu pe a oo i se Mataupu e fesiligia ai po o le a malie le Fono Aoao i sea lafo toe teuteu.

75. Faiga Tau le Tuuina Atu o Fesili e Faasino i Lafo Toe Teuteu:

- (1) I luga o so o se lafo toe teuteu ina ia tuuese so o se upu o se lafo faatu, o le fesili o le a faatuina atu e le Fofoga Fetalai o le a faapenei, "Ia tuueseina ia upu mai le mataupu".
- (2) I luga o so o se lafo toe teuteu ina ia faaofi ni upu i totonu po o le faaopoopoina o ni upu i le faaiuga o se lafo faatu, o le fesili o le a faatuina atu e le Fofoga Fetalai o le a faapenei; "Ia faaofi i ai ia upu (po o le faaopoopoina)".
- (3) I luga o se lafo toe teuteu ina ia tuuese ni upu ma faaofi po o le faaopoopo i ai ni upu e sui ai, o le a muamua ona faatuina se fesili e faapea, "Ia tuueseina ia upu mai le mataupu", ma afai ua malilie i le mataupu, o le fesili o le a faatuina atu e faapenei, "Ia faaofi atu i ai ia upu (po o le faaopoopoina)". Afai e le faamaonia le fesili muamua, e leai se tasi toe teuteuga e mafai ona faatuina i upu ua faapea ona tonu i le Fono Aoao o le a le tatau ona tuueseina.
- (4) Afai e logoina le Fofoga Fetalai a o le i tuuina atu se fesili ina ia tuueseina ni upu e faapea ua manao le sui usufono na te faatuina se lafo toe teuteu ina ia tuuese na o ni vaega o ia upu, ma afai ua i ai i lona taofi o le toe teuteuga ua faamoemoeina na faapea ona logoina ai o ia o lo o tele ina avea o se toe teuteuga fou, o le a tuuina atu e ia, pe afai e mafaia, le fesili ina ia tuueseina upu i se tulaga o le a mafai ai ona faatuina le lafo toe teuteu mulimuli ane.
- (5) A oo ina lua pe sili atu ni lafo toe teuteu ua faamoemoeina e faatu i le lafo faatu lava e tasi, o le a valaau atu le Fofoga Fetalai i e na faatuina ia lafo toe teuteu i le faasologa o a latou lafo toe teuteu e faasino i upu ma le aano o le lafo faatu, po o afai foi e i ai se mea e faaletonu, o le a faia lava i se faasologa e pei ona o le a tonu ia te ia:

Peitai e leai se lafo toe teuteu e mafai ona faatuina e faasino i so o se upu ua uma ona tonu i le Fono Aoa e le tatau ona tuueseina mai le mataupu.

- (6) Afai e faatuina se toe teuteuga i se lafo toe teuteu ua faamoemoe le Fofoga Fetalai e tuuina atu ai le fesili, o le lafo toe teuteu ua taua mulimuli o le a tagofia lava e peiseai o le uluai lafo faatu seia oo lava ina ua uma ona tagofia lafo toe teuteu uma na fai i ai.
- (7) Ina ua uma ona faia o lafo toe teuteu, o le a tuuina atu e le Fofoga Fetalai le fesili i le Mataupu autu e pei ona toe teuteuina.
- (8) Ina ua uma ona faatutu mai lafo toe teuteu ae le i faia, o le a tuuina atu e le Fofoga Fetalai le fesili i le uluai Mataupu e pei ona faatuina mai.

VAEGA XXI
FAAALIGA MAI LE TAITAI O LE MAOTA

76. Faaaliga Mai le Taitai o le Maota:

- (1) O le a faitauina atu loa lava e le Fofoga Fetalai ina ua uma le Tatalo po o le taimi lava ua maea ona faatautoina ai so o se sui usufono fou i le Fono Aoao so o se Faaaliga e faatuatusi mai i le Fono Aoao e le Taitai o le Maota.
- (2) E tatau i le Fofoga Fetalai ona faasilasila muamua so o se Faaaliga mai le Taitai o le Maota e faatagaina ai le faatatauina o tupe mo le faamoemoe o se lafo toe teuteu i se Tulafono Tau Faaofi o le Faatatauina o Tupe e manaomia i lalo o le Tulafono Tumau 135(6) a o le i faatuina lea lafo.
- (3) O le a tatau i le Fofoga Fetalai, ae vagana ona o lo o iloilo ina i lea taimi se Faaaliga na oo mai muamua, ona faitauina atu loa lava le Faaaliga i le Fono Aoao, ma afai e tatau ai, o le a atofaina se taimi mo le iloiloga o lea lava faaaliga, po o afai e leai se toe iloiloga e tatau ai, e mafai ona tuuina atu loa le Faaaliga i luga o le Laulau-a-Fono.

VAEGA XXII

MATAUPU TUUSAO I LE O LE AO O LE MALO

77. Mataupu Tuusao i le O Le Ao o le Malo:

- (1) O mataupu tuusao a le Fono Aoao i le O Le Ao o le Malo o le a tatau ona faaoo atu e le Fofoga Fetalai.
- (2) O le tali a le O Le Ao o le Malo i so o se mataupu tuusao a le Fono Aoao Faitulafono, o le a tatau ona lipoti atu e le Fofoga Fetalai i le Fono Aoao.

VAEGA XXIII

TULAFONO E PUIPUI AI LE FEFAAALIAIGA O TAOFI

78. Taimi ma le Faiga o Tautalaga:

- (1) O se sui usufono e manao e saunoa pe fetalai o le a tatau ona tulai ae i lona nofoaga ma faalagi le Taitaifono:

A ia fai fuafua i le tuuina atu o le faatagaga lautele i se sui usufono e le mafai ona tulai ona o le le atoatoa o le malosi o le tino ia alala pea i lona nofoa, ma o lea faatagaga e aofia ai Tulafono Tumau uma o lo o faatonuina ai le tutulalai o sui usufono.

- (2) Afai e toalua pe sili atu sui usufono e tutulalai ae i le taimi lava e tasi, o le a filifilia e le Fofoga Fetalai po o le Taitaifono se tasi o i latou o le a saunoa muamua.

- (3) O le a tatau ona taua se Minisita i le tauina atu o le tofi o lo o ia te ia, e pei o le Palemia, Minisita o Aoga.

- (3a) O le a le tatau ona taua le sui usufono i lona igoa a o le igoa o lona itumalo faaalaalafaga.

- (4) I le itu e taugamalie ai, e mafai ona taua so o se sui usufono o le *Sui Usufono Mamalu* :

Ae o le a le avea lenei Tulafono o se mea e faatagaina ai le faaaogaina o le fuaitau *Mamalu* e faasino i se sui usufono i so o se tasi faaupuga po o fafo atu o le Maota Fono, ae le aofia ai le itu i Minisita ma le Fofoga Fetalai.

- (5) E leai se sui usufono o le a tatau ona saunoa pe fetalai e sili atu i lo le faatasi i so o se mataupu ae vagana:

- (a) i le tulaga faa-Komiti; po o
 (b) i se faamalamalamaga, e pei ona fuafuaina i totonu o le parakalafa e sosoo ai o lo o aupito mai; po o
 (c) i le itu i le na ia faatuina se lafo faatu auliuli e manao e fai sana tali:

Ae vagana ona afai o le a fesili i so o se taimi le Fofoga Fetalai po o ai na te faaluaina se lafo faatu po o se lafo toe teuteu, e mafai e se sui usufono ona ia faia lea mea i le tulai ae i lona nofoaga ma ifo mai

e faaalua ai lona maliega e aunoa ma le tautala, ma o le a faapea lava ona taofia pea e lea sui usufono ia te ia lea aia tatau e saunoa ai e pei ona semanu e ia te ia pe a na fai e faaluaina e se tasi lava sui usufono sea lafo faatu po o se lafo toe teuteu, ae na te le mafai ona teuteu i lea lava lafo faatu e tasi po o se lafo toe teuteu.

- (6) O se sui usufono ua uma ona saunoa i se mataupu e mafai ona toe saunoa mo le itu tau le faamalamalamaina o se vaega taua o lana lauga ua le malamalama po o le faamamaina ma puipuia lana amio po o lona uiga pe afai ua faitioina e faapea ua sese, ae le tatau ona na faaofi mai se mataupu fou.
- (7) E mafai e se tasi na te faatuina se lafo faatu po o se lafo toe teuteu ona saunoa e lagolago ai se mea, ae leai se fefaaaliaiga o taofi o le a faatagaina seia oo ina ua faaluaina le lafo faatu po o le lafo toe teuteu.
- (8) E leai se sui usufono e mafai ona saunoa e faatatau i so o se mataupu a ua uma ona faaiuina lea mataupu i se fesili na tuuina atu e le Fofoga Fetalai po o le Taitaifono, o lona uiga, ina ua uma ona tuuina mai siufofoga o Ioe ma Leai e faatatau i lea mataupu.
- (9) E le tatau i se sui usufono ona faitauina lana lauga, ae mafai ona ia faitauina ni faamatalaga ootoo mai ni pepa tusia po o ni pepa lolomi e lagolago ai lana finauga ma e mafai ona faafouina ona mafauauga i le silasila i ni ana faamatalaga ootoo.
- (10) O se sui usufono ua uma ona saunoa pe fetalai i se mataupu e mafai ona toe saunoa pe fetalai i so o se mataupu fou e ono laga, ae le mafai ona toe tautala i le mataupu lava e tasi vagana ai i le tulaga faa-Komiti o le Fono Aoao Atoa.
- (11) O se sui usufono ua uma ona saunoa pe fetalai i le mataupu autu e le mafai ona toe saunoa pe fetalai agai i ai a o fai sana tautalaga i se toe teuteuga, vagana o sea teuteuga e aafia ai le iloiloga ma le faaiuga o le mataupu autu.
- (12) A oo ina ua faatuina se lafo toe teuteu, o le a faapito lava le fefaaaliaiga o taofi i le lafo toe teuteu, vagana o le uiga moni o lea lafo toe teuteu e aafia ai le iloiloga ma le faaiuga o le mataupu autu, o se tulaga faapea ua avanoa ai le mataupu autu ma le lafo toe teuteu mo le talanoaina.

(13) Na o le na ia faatu se Lafo o le a faatagaina i ai se aia e tali atu ai, ma o le a faapitoa le tali i mataupu na laga i le fefaaaliaiga o taofi; ma i mataupu uma lava, o le tali a Le na ia faatu le lafo i le amataga o le a tapunia ai le fefaaaliaiga o taofi.

79. Sui Usufono e Tuua o Latou Nofoa:

O se sui usufono e ui ane i le va o le Nofoa o le Fofoga Fetalai ma so o se sui usufono o lo o tautala, ia na faia lea mea i se auala e le faalavelaveina ai le vaai a le Fofoga Fetalai i le sui usufono o lo o tautala, ma e leai se sui usufono e mafai ona ui i le va o le Nofoa ma le Laulau.

80. O Sui Usufono e Alala i Lalo:

O sui usufono taitasi pe a fai ua i totonu o le Maota Fono e tatau ona alaala i lalo (seia vagana ai pe a fai e tulai e saunoa i fefaaaliaiga o taofi po o le auai atu i se palota tauvalaau) ma e le tatau i so o se taimi ona tu i totonu o so o se alaui po o ni auala savali.

81. Sui Usufono ia Laulaututu seia Afio ese atu le Fofoga Fetalai ma le Maota:

I le faaiuga o Fonotaga taitasi o le a tatau ona laulaututu i luga sui usufono seia afio ese atu le Fofoga Fetalai mai totonu o le Maota.

82. Faalavelave pe Faauilavea:

- (1) Afai e faalavelave se sui usufono i se sui usufono o lo o saunoa, o le a tatau loa i le sui usufono o saunoa ona toe alaala ifo i lona nofoa.
- (2) E ao i se sui usufono o lo o faalavelave ona talosagaina le faatagaga mai le Fofoga Fetalai ma taua ai le uiga o le faalavelave, e pei o se mea e fia faasao, o se mea e fia faamalamalama, po o le sailia o se faamalamalamaga.
- (3) O faauilavea mulimuli ane o le a tatau ona faia agai i le sui usufono o lo o saunoa ae le o sui usufono o faauilavea ina ia tali atu i ai le sui usufono o lo o saunoa pe afai e talosagaina e le Fofoga Fetalai.

- (4) O le a i ai i le Fofoga Fetalai le pule faitalia e faataga ai pe teena ai le faauilavea a se sui usufono e faavae i luga o tulaga aloaia ma le talafeagai o le faauilavea.

83. Mea e Aofia i Lauga:

- (1) O le a le tatau ona faia se faamatalaga e faasino i so o se mataupu o lo o faatali se iuga faa-faamasinoga e fai i ai, i se auala atonu, ua i ai le taofi o le Fofoga Fetalai po o le Taitaifono, e faaleagaina ai aia tatau a vaega e aafia i sea mataupu.
- (2) O le a le tatau ona faaaogaina ni upu faatupu faalavelave, upu faauigalua taufaifai po o ni upu mataga po o le faia o ni uiga le sao e faasino i so o se tasi sui usufono po o le faia o ni faamatalaga faasala ese e faatatau i se tasi tagata.
- (3) O le a le tatau ona faaaogaina le suafa O Le Ao o le Malo ina ia faatosina ai le Fono Aoao.
- (4) O le a le tatau ona taumafai ina ia toe iloilo ina so o se mataupu faapitoa ua uma ona maua i ai se faaiuga a le Fono Aoao i le Fonotaga o lo o faia i lea lava taimi, ae vagana se lafo faatu auliuli mo le soloia po o le faaleaogaina o se mea.
- (5) E le tatau ona lagaina le itu i le amio a le O Le Ao o le Malo, le Fofoga Fetalai, Minisita, sui usufono ma Alii Faamasino po o nisi lava tagata o lo o feagai ma le pulea ma le tausiga o le amiotonu, ae vagana ona faia i luga o se lafo faatu auliuli, ma, i so o se lafo toe teuteu, fesili i se Minisita po o se sui usufono, po o ni faamatalaga i se fefaaliaiga o taofi e faatatau i se lafo faatu i le feagai ai mo so o se tasi lava mataupu, so o se faamatalaga e faasino i le amio a se ua taua i luga o le a avea lava o se faiga le tatau.
- (6) O le a pau i se sui usufono le itu i le sao o ni faamatalaga ua taua e ia faapea e moni ia faamatalaga ma e mafai ona manaomia o ia ina ia na faamaonia ni faamatalaga faapea, po o le toe faauiese o faamatalaga na taua e ia.

83A. Talosaga mo Tali:

- (1) E mafai e so o se tagata (e le o se sui usufono), o ia lea sa taua lona igoa i totonu o le Fono Aoao, po o i so o se i si auala e mafai ai ona iloagofie vave ai ona faia se talosaga i le Fofoga Fetalai i se faiga tusitusia:
 - (a) e talosagaina ai lona aafia po o ua tauvlea lona tulaga tauleleia talu ai le taua o lona igoa;
 - (b) tuuina atu se tali i le fuaitau faasino ia te ia; ma
 - (c) talosaga ina ia faamauina le tali i totonu o faamaumauga a le Palemene.
- (2) E ao ona faia se talosaga i totonu o le 30 aso talu le faia o le fuaitau faasino i lea tagata.
- (3) E ao ona maoti ma ia talafeagai atoatoa so o se tali i le fuaitau sa faia. E le tatau ona aafia ai so o se faiga faatupu vevesi.

83B. Iloiloga a le Fofoga Fetalai:

- (1) E tatau i le Fofoga Fetalai ona iloilo pe tatau ai i tulaga uma ua aliaie mai i le mataupu ona faamauina le tali i totonu o faamaumauga.
- (2) I lea iloiloga:
 - (a) e mafai e le Fofoga Fetalai ona feutagai ma le tagata sa faia le talosaga faapea ma le sui usufono lea sa taua le igoa o lea tagata i totonu o le Fono Aoao;
 - (b) e tatau i le Fofoga Fetalai ona amanaia le tulaga lautele e mafai ona oo i ai le aafiaga po o le faaleagaina o le tulaga tauleleia o le tagata o lo o talosaga ona o lea fuaitau faasino ia te ia.
- (3) E le tatau i le Fofoga Fetalai ona iloilo ina pe faamasinoina le moni o le fuaitau sa faia i totonu o le Fono Aoao po o le tali e faasaga i lea fuaitau.

83C. Faaiuga a le Fofoga Fetalai:

- (1) Afai ua faia e le Fofoga Fetalai le faaiuga e faapea e le faamauina le tali i totonu o faamaumauga a le Palemene, e ao ona Ia logoina le tagata ua aafia ai e faapea o le a leai se isi gaoioiga e toe faia.

- (2) O le a tuuina atu i le Fono Aoa mo le lomua faasalalau e ala i le poloaiga a le Fono Aoa se tali ua faatatauina e le Fofoga Fetalai ina ia faamauina i totonu o faamaumauga a le Palemene.
- (3) E mafai e le Fofoga Fetalai ona faia se faaiuga e faapea e tatau ona faamauina i totonu o faamaumauga a le Palemene se tali ina ua uma ona teuteu e le tagata le tali i se faiga ua faamaonia e le Fofoga Fetalai.

84. O Mataupu ia Faasino Tonu i ai Fefaaaliaiga o Taofi:

- (1) O le fefaaaliaiga o taofi i luga o so o se lafo faatu, Tulafono Tau Faaofi po o se lafo toe teuteu o le a tatau lava ona ia faasino tonu i sea lafo faatu, Tulafono Tau Faaofi po o se lafo toe teuteu, ae vagana le itu i se lafo faatu mo le tolopoina o le Fono Aoa e tusa ma tuutuuga o le Tulafono Tumau 32 (Fonotaga) ma le Tulafono Tumau 33 (Tolopoina ona o Mataupu Faanatinati e Taua mo Tagata Uma).
- (2) Afai e faatu mai i se lafo toe teuteu ina ia tuuese ni upu ma toe faaofi ni upu e sui ai, e mafai ona aofia ai upu uma ua faatu mai ina ia tuueseina ma upu ua faatu mai ina ia faaofi i le fefaaaliaiga o taofi i luga o le mataupu muamua na faatu mai i le lafo toe teuteu.
- (3) I luga o se lafo toe teuteu e faatu mai ai le tuueseina o ni upu po o le faaofiina po o le faaopoopoina o ni upu, o le a tatau lava ona faapitoa le fefaaaliaiga o taofi i le tuueseina po o le faaofiina po o le toe faaopoopoina o ni upu faapena, i se itu o le a aliali mai ai faapea.

85. Lafo Faatu ina ia Le Toe Faafogaina se Sui Usufono:

Afai ua faaaogaina e se sui usufono ni upu matuia ma ina ua faatonu atu ae le usitai i le toe aveese mai pe faamalamalama mai ia upu ma tuuina mai sana faatoesega i le tulaga e malie i ai le Fofoga Fetalai po o le Taitaifono, e mafai e so o se sui usufono ina ua malie i ai le Fofoga Fetalai po o le Taitaifono ona ia faatu se lafo ina ia le toe saga faafogaina le sui usufono ua ia faaaogaina ni upu matuia, ma o le a tuuina atu loa lava le fesili e faatatau i lea lafo faatu e aunoa ma se toe teuteuga po o se fefaaaliaiga o taofi e faia i ai.

86. Vave Tautalagia o se Mataupu e le i Oo ina Tagofia:

- (1) O le a le o se mea tatau ona vave tautalagia o se Tulafono Tau Faaofi i le iloiloga o se lafo faatu e faasino i le mataupu autu o le Tulafono Tau Faaofi i se aso a o lumanai le aso atofaina mo le iloiloga o lea Tulafono Tau Faaofi.
- (2) O le a le o se mea tatau ona vave tautalagia se Tulafono Tau Faaofi po o se lafo faatu i se talanoaga e faatatau i se lafo toe teuteu po o se lafo faatu mo le tolopoina o le Fono Aoa.
- (3) I le fuafuaina pe mata ua le tatau ai se fefaaaliaiga o taofi ona ua vave tautalagia se mataupu e le i oo ina tagofia, o le a tatau lava ona silafia e le Nofoa pe mata e ono mafai ona aumaia le mataupu ua vave tautalagia i luma o le Fono Aoa i totonu o se taimi e tatau ai.

87. Tapunia o le Fefaaaliaiga o Taofi:

- (1) Ina ua uma ona faatu atu se mataupu, e mafai e se sui usufono ona faatu mai "Ia tuuina mai nei loa le fesili", ma seia vagana ona o le a aliali atu i le Fofoga Fetalai po o le Taitaifono, o le a avea se lafo faatu faapena o se faaleaga i tulafono e puipui ai le Fono Aoa po o se soliga o aia tatau a le vaega toaitiiti o tagata, o le a tuuina atu loa i luma le fesili e faapea "Ia tuuina mai nei loa le fesili" ma maua ai le tonu e aunoa ma se lafo toe teuteu po o se fefaaaliaiga o taofi.
- (2) A oo ina ua talia ma faamaonia le lafo "Ia tuuina mai nei loa le fesili", ma ua faapea lava ona maua ai le tonu o le mataupu, e mafai e so o se sui usufono ona ia faaalua e faapea ia tuuina mai nei loa so o se tasi fesili ua uma ona faatuina mai e le Nofoa, ma afai e tuuina atu i ai le maliega o le Nofoa, o le a tuuina atu loa lea fesili ma maua ai le tonu e aunoa ma se toe teuteuga po o se fefaaaliaiga o taofi.
- (3) A oo ina ua iloilo se Fuaiupu o se Tulafono Tau Faaofi, e mafai ona faatu se lafo e faapea o le fesili po o le a faatu mai ni upu o le Fuaiupu ua faamanino i totonu o le lafo faatu e avea ma vaega o le Fuaiupu, po o le faatu mai le Fuaiupu e avea ma vaega o, po o le faaopoopo atu i, le Tulafono Tau Faaofi, ia tuuina mai nei loa, ma afai e tuuina atu i ai le maliega o le Nofoa, o le a tuuina mai loa lea fesili ma maua ai le tonu e aunoa ma se toe teuteuga po o se fefaaaliaiga o taofi.

- (4) E ui lava i tuutuuga o le Tulafono Tumau 26 (Taitaifono i le Fono Aoao) o le a faatoa faamamaluina le Tulafono lenei i le taimi o lo o taitai ai le Fofoga Fetalai i le Fono Aoao po o le Taitaifono i le tulaga faa-Komiti o le Fono Aoao Atoa.
- (5) O le a le tatau ona faatatauina e faapea ua talia ma faamaonia se fesili mo le tapunia o se fefaaaliaiga o taofi, tusa lava po ua manumalo le Ioe, ae vagana ona ua aliali mai i fuainumera e faaalua manino mai le Nofoa, e le itiiti ifo i lo le toa luasefulu (20) sui usufono na palota e lagolagoina le lafo faatu.

88. Tolopoina o le Fefaaaliaiga o Taofi:

- (1) E mafai i luga o se lafo faatu ona tolopoina se Fefaaaliaiga o Taofi i se itula mulimuli ane o lea lava aso po o le tolopo i se tasi lava aso. O le tuuina atu o le fesili mo le tolopoina o le fefaaaliaiga o taofi o le a tuuina atu loa lava ma faaiuina e aunoa ma se toe teuteuga po o se fefaaaliaiga o taofi.
- (2) O le sui usufono e ana le lafo faatu o le a tolopoina ai le fefaaaliaiga o taofi o le a maua e ia le avanoa pe afai na te tapa le aia tatau e tautala ai muamua i le toe amataina o le fefaaaliaiga o taofi.
- (3) Afai e le faamaonia le lafo faatu mo le tolopoina o le fefaaaliaiga o taofi i so o se mataupu, o le sui usufono na ia faatu le lafo mo sea tolopoina e mafai ona fai sana tautalaga i le Fono Aoao i se taimi mulimuli ane ai o le fefaaaliaiga o taofi.

89. Faamutaina o le Fefaaaliaiga o Taofi:

- (1) E mafai e le Fono Aoao ona tuu se tapulaa tau le fefaaaliaiga o taofi i so o se lafo faatu i le tuuina atu o se taimi faatapulaaina mo sea fefaaaliaiga o taofi po o le faatapulaaina o le taimi e fai ai tautalaga a sui usufono i sea fefaaaliaiga o taofi po o le faatau faia o ia mea uma e lua. O le fefaaaliaiga o taofi i so o sea lafo faatu, afai e le i tuuina mai le fesili ma faaiuina, o le a tafea lava ina ua taunuu i le mutaaga o le taimi faatapulaaina po o le toe tolopoina o le fonotaga.
- (2) O le fefaaaliaiga o taofi i se lafo faatu a se sui usufono o le a le silia i le 2 itula o talanoaina ma e tafea ina ua oo ina tolopoina le fonotaga.

VAEGA XXIV
TULAFONO E PUIPUI AI LE NOFO FILEMU

90. Ia Fifilemu i le Taimi e Saunoa ai le Fofoga Fetalai:

- (1) A oo ina saunoa atu le Fofoga Fetalai po o le Taitaifono i le Fono Aoao o le a tatau loa ona alaala filemu tagata uma i totonu ma alaala i lalo i lona nofoa.
- (2) A oo ina saunoa atu le Fofoga Fetalai po o le Taitaifono i le Fono Aoao o le a tatau loa ona alaala filemu tagata uma i totonu o le Fono Aoao.

91. O le Faaiuga a le Nofoa e Mausali:

O le a i le Fofoga Fetalai i le Fono Aoao ma le Taitaifono i so o se Komiti, so o se tasi o i laua e aafia ai, le tausiga ma le faamamaluina o le nofo filemu i totonu o le Fono Aoao ma totonu o le Komiti faapea foi tulafono e puipui ai le fefaaaliaiga o taofi, ma o a laua faaiuga i so o se mataupu e fia faasaoina o le a le faaavanoaina e fai i ai se talosaga ma o le a le toe iloiloaina e le Fono Aoao ae vagana ona ua faia se lafo faatu auliuli ina ua uma ona tuuina mai se faaaliga.

92. Tulaga Sagatonu i Totonu o le Fono Aoao:

- (1) So o se sui usufono e laa ese mai Tulafono nei, e mafai ona vave faasagatonuina loa e le Fofoga Fetalai po o le Taitaifono, po o le faia e so o se tasi lava sui usufono e tulai ae i se mataupu e fia faasao e pei ona faamatalaina e le Tulafono Tumau 82 (Faalavelave pe Faauilavea).
- (2) E mafai e le Fofoga Fetalai po o le Taitaifono, ina ua uma ona faasino atu i le Fono Aoao po o le Komiti o le Fono Aoao Atoa le amio a se sui usufono, o ia lea ua agai atu pea ina sipa ese lana tautalaga po ua ia saga taua pea i se uiga faasoesea lana lava finauga po o finauga na faaaogaina e isi sui usufono i le fefaaaliaiga o taofi, ona faatonuina le sui usufono ina ia faamuta lana lauga.
- (3) O le a poloaiina e le Fofoga Fetalai po o le Taitaifono ni sui usufono ua tino mai le leaga atoatoa o a latou amio ina ia vave tuumuli ese loa mai le Fono Aoao i le vaega o lo o totoe o le Fonotaga i lea aso, ma o le a tatau loa ona gaoioi Le na te leoina le Fono e faatatau i poloaiga e maua e ia mai le Nofoa e tusa ma tuutuuga o lenei parakalafa. Ae afai

ua faatatauina e le Fofoga Fetalai po o le Taitaifono i so o se taimi ua le lava ana pulega e tusa ai ma uluai aiaiga o lenei parakalafa, e mafai e ia ona tau atu le suafa o lea sui usufono po o ni sui usufono, o le itu lea o le a tausisia ai le tualumaga lava e tasi e pei ona faamaotiina i totonu o (4) e oo i le (8) o le Tulafono lenei.

- (4) A oo ina ua tauina atu le igoa o se sui usufono e le Fofoga Fetalai po o le Taitaifono ina ua faatoa uma ona faia le solitulafono tau le le amanaia o le pule a le Nofoa, po o le saga finafinau pea ma faalavelave ma le loto i ai i le galuega a le Fono Aoa o le faaleaga ma faaoga sese tulafono e puipui ai a le Fono Aoa po o se tasi lava faiga e ese ai, o lona uiga la, afai ua faia le solitulafono e sea sui usufono i totonu o le Fono Aoa o le a faatuina loa ma faaluaina se lafo faatu e ni Minisita se toalua (2) e faapea "Ia tuueseina lea sui usufono mai le galuega a le Fono Aoa", ma o le a tuuina atu loa lava e le Fofoga Fetalai le fesili e faatatau i lea lafo faatu, e leai se lafo toe teuteu, se tolopoina po o se fefaaaliaiga o taofi e faatagaina i ai; ma, afai ua faia le solitulafono i totonu o se Komiti o le Fono Aoa Atoa, o le a faataatia ese loa e le Taitaifono tualumaga a le Komiti ma lipoti atu le tulaga ua oo i ai i le Fono Aoa; ma o le a tuuina atu loa lava e le Fofoga Fetalai lea lava fesili ina ua uma ona faia le lafo faatu, e leai se toe teuteuga, leai se tolopoina po o se fefaaaliaiga o taofi e faatagaina i ai, e peiseai na faia le solitulafono i totonu o le Fono Aoa lava ia.
- (5) Afai e tuueseina se sui usufono e tusa ma lenei Tulafono, o lona tuueseina i le taimi muamua i so o se Tauaofiaga o le a mo le vaega o lo o totoe o lea aso fono; o lona lua o taimi i so o se Tauaofiaga mo le 7 aso, e aofia ai le aso e tuueseina ai, ma o lona tolu o taimi po o so o se taimi mulimuli ane i le faagasologa o lea lava Tauaofiaga mo le 28 aso e aofia ai le aso na tuueseina ai.
- (6) E le sili atu i lo le toatasi (1) le sui usufono e tataua ona tauina atu lona suafa i le taimi lava e tasi, ae vagana ona ua toalua (2) po o le sili atu ni sui usufono, o lo o auai faatasi, ua latou faalemanaia faatasi le pule a le Nofoa.

- (7) Afai e musu se sui usufono, po o le toalua (2) po o le sili atu o sui usufono ua auaafaatasi, i latou ia ua tuueseina i lalo o lenei Tulafono mai le galuega a le Fono Aoao, ia usiusitai i le faatonuga a le Fofoga Fetalai ina ua samania taitoatasi i latou e tusa ma poloaiga a le Fofoga Fetalai e Le na te Leoina le Fono ina ia usiusitai i sea faatonuga, o le a faaali atu loa e le Fofoga Fetalai i le Fono Aoao le mea moni e faapea ua tatau ona faaaogaina le faiga fai faamalosi ina ia faamalosia ai le usiusitai mai i lana faatonuga; ma o le sui usufono po o ni sui usufono na tauina e ia o latou igoa ua le usitai i lana faatonuga o le a faapea loa lava e aunoa ma le tuuina atu o se tasi fesili ona tuueseina mai le galuega a le Fono Aoao i le vaega o lo o totoe o le Fonotaga.
- (8) E leai se mea o i totonu o lenei Tulafono o le a tatau ona faatatauina e taofia ai le Fono Aoao mai le sagai atu e faia se laasaga faasaga i so o se sui usufono mo so o se solitulafono ua faalia i inei i so o se tasi lava auala ua manatu le Fono Aoao e tatau ai, pe, mai le faia o se laasaga faasaga ia te ia mo so o se solitulafono e le o faaalua manino i inei.
- (9) E mafai e le Fofoga Fetalai po o le Taitaifono, tusa lava po ua ia faia e tusa ma le (3) po o le (4) o lenei Tulafono, ona ia faatonuina ni laasaga ia faia e pei ona manaomia ina ia faamamaluina ai lenei Tulafono.
- (10) O sui usufono ua poloaiina ina ia tuumuli ese e tusa ma le (3) o lenei Tulafono po o e ua tuueseina mai le galuega a le Fono Aoao e tusa ma le (4) o lenei Tulafono o le a tatau ona tuumuli ese loa mai tuaoi o le Maota Fono.
- (11) O le itu i se uiga faapisapisao faigata e aliali mai i totonu o le Fono Aoao, e mafai e le Fofoga Fetalai, pe afai ua ia manatu ua tatau ai ona faia lea itu, ona na tolopoina le Fono Aoao e aunoa ma le tuuina atu o se fesili e taofia ma faamanava ai le fonotaga mo se vaitaimi o le a tauina mai e ia.
- (12) O le taofia mai le galuega a le Fono Aoao o le a le faaavanoaina ai se sui usufono mai le galue i so o se Komiti Faa-Palemene na tofia i ai o ia a o le i taofia o ia.

VAEGA XXV
VAEVAEINA O TAOFI O LE FONO AOA O
(PALOTA TAUVALAAU)

93. Palota a Sui Usufono:

- (1) O le a tatau ona faaiuina mataupu uma i le mea e mafuli i ai le tele o palota a sui usufono uma o lo o auai.
- (2) O le a leai se palota a le Fofoga Fetalai, po o le Sui Fofoga Fetalai (po o se isi Sui Usufono o le Palemene a o taitaifono o ia i se fonotaga a le Fono Aoa o Faitulafono ina ua toesea le Fofoga Fetalai), po o i tulaga faa-Komiti, o le a leai se palota a le Taitaifono e faia ai se filifiliga, peitai a oo ina ua tutusa palota a itu, o le a i ai ia te ia se palota e saili ai le faaiuga.
- (3) A oo ina ua tuuina atu le fesili e le Fofoga Fetalai po o le Taitaifono i le faaiuga o le fefaaaliaiga o taofi, o le a fuafuaina lava palota i siufofoga, Ioe ma le Leai, ma seia vagana ona ua leai se sui usufono na te faatagisia i lea taimi se palota tauvalaau o le a faasilasilaina atu lava le iuga o le mataupu e le Fofoga Fetalai po o le Taitaifono.
- (4) E mafai e se sui usufono ona palota i se palota tauvalaau e ui lava ina sa le i lagona e ia le tuuina atu o le fesili.
- (5) E ao ina palota se sui usufono e tusa ma lona siufofoga.
- (6) E le mafai e se sui usufono ona palota i so o se mataupu e i ai sana aia tuusao tau tupe ma afai e palota o ia i se mataupu faapena, e mafai ona faaleaogaina lana palota i luga o se lafo faatu. Vagana ai tuutuuga o lenei parakalafa, o sui usufono uma o lo o auai i totonu o tuaoi o le Potu Fono i le taimi e fai ai palota, e tatau lava ona palota i le faiga palota.

94. Taualumaga o Palota Tauvalaau:

- (1) A oo ina ua talosagaina se palota tauvalaau e so o se sui usufono, o le a tapaina e le Fofoga Fetalai le Failautusi ina ia taina le logo i minute e 2 ma valaau i totonu sui usufono. O le a i ai loa i le Failautusi le vaaia ua logoina sui usufono o lo o i le faapaologa faataamilo o le Maota Fono e faapea o le a faia se palota tauvalaau. A tea le 3 minute, o le a

toe tuu atu e le Fofoga Fetalai le fesili i le Fono Aoa po o le Komiti o le Fono Aoa Atoa ma o le a valaau atu i sui usufono e lagolagoina le mataupu ina ia tutulai ae mai o latou nofoaga. O le a valaauina loa e le Failautusi suafa o sui usufono taitasi o lo o tutulai e amata i Minisita ma o le a faamauina a latou palota i se lisi lomina. E mafai e se sui usufono ona toe alala ifo i lona nofoa ina ua uma ona valaauina manino lona suafa e le Failautusi. A oo ina ua maea ona faamauina palota uma o le IOE, o le a valaau atu le Fofoga Fetalai i sui usufono e i le taofi tetee ina ia tutulai ae mai o latou nofoaga, ma o le a uia foi se taualumaga e tutusa ma le taualumaga na faia i e na lagolagoina le mataupu. A maea ona faamauina palota uma a e na lagolagoina ma e na tetee, o le a tuuina atu loa e le Failautusi le lisi o le faiga palota i le Fofoga Fetalai, o ia lea o le a ia faasilasila atu le iuga o le palota.

- (2) O suafa o sui usufono o e na palota i se palota tauvalaau o le a lomina i pepa faamauina o Tala Ootoo ma le Lipoti Aloaia o le Fono Aoa e faaalua maoti ai i latou sa i le taofi e lagolagoina ma i latou sa i le taofi e tetee.
- (3) Afai e faaalua e se sui usufono e faapea ua sese ona faia o lana palota, e mafai e ia, i le taimi lava ina ua uma ona faasilasila atu e le Fofoga Fetalai, ma, a o le i faasilasilaina atu e le Fofoga Fetalai le iuga o le palota, ona talosaga ina ia faasao le faamauina o lana palota.
- (4) O le a faatonuina e le Fofoga Fetalai ina ia faia sona lua o palota tauvalaau ona ua i ai se itu ua fenumiai ai po o ua sese ae vagana ona ua mafai ona toe faasoina.
- (5) Afai ua tauina atu i le Fofoga Fetalai ina ua mavae se palota tauvalaau e faapea ua lipoti sese atu fuainumera o le palota, o le a faatonuina loa le Failautusi ina ia faasao tala ootoo faamauina.
- (6) E mafai e le Fofoga Fetalai ona le talia le toe faia o se palota tauvalaau ua le tata ai ona faatagisia mai.
- (7) E leai se sui usufono o le a faaavanoaina e tautala a o faia se palota tauvalaau vagana se mea e fia faasao, o lea mea fia faasao afai e tuuina mai, o le a faamaapeina loa lava e le Fofoga Fetalai e aunoa ma se fefaaaliaiga o taofi e fai i ai.

VAEGA XXVI TULAFONO TAU FAAOFI

95. **Nisi Tulafono e Uiga i Tulafono Tau Faaofi:**

- (1) E leai se Tulafono Tau Faaofi o le a tuuina atu i le O Le Ao o le Malo mo lana faamaoniga vagana ua uma lona faitauga faatolu.
- (2) O le a tatau i so o se Tulafono Tau Faaofi ona ia tuuina mai faatasi ma se Faamatalaga e Faamalamalama ai ua sainia e le Minisita po o le sui usufono o lo o ona faaofi mai le Tulafono Tau Faaofi, ia faaalua atoatoa ai mea o lo o avea ma sini ma mafuaaga o le Tulafono Tau Faaofi.
- (3) O Tulafono Tau Faaofi uma o le a tatau ona faailoaina i o latou igoa ma o le a vaevaeina i ni Fuaiupu faasolosolo i fuainumera, ma e ao ona i ai ni faamatalaga tomua i Fuaiupu uma e tuuina mai ai se faamatalaga puupuu e tusa ai ma mataupu o lo o aafia ai.
- (4) O mataupu ua i le manatu o le Fofoga Fetalai e leai ni sootaga talafeagai ma isi mataupu taitasi e le tatau ona aiaia e lea lava Tulafono Tau Faaofi e aunoa ma le maliega a le Taitai o le Maota.
- (5) O le a leai se Tulafono Tau Faaofi e aafia ai so o se mataupu mai fafo e pei ona faaulufaleina mai i lona Igoa.

96. **Faaofiina o Tulafono Tau Faaofi a le Malo:**

O Tulafono Tau Faaofi a le Malo e mafai ona faaofiina atu i le Fono Aoao e le Palemia i le avea ai ma Taitai o le Maota.

97. **Faaofi o Tulafono Tau Faaofi a Sui Usufono Taitoatasi:**

- (1) O se Tulafono Tau Faaofi a se Sui Usufono e tatau ona faaofiina i le Fono Aoao i se lafo faatu mo se maliega autasi a le Fono Aoao ia faaofiina le Tulafono Tau Faaofi. O lea lafo o le a tatau ona faatu ua na o aso fono lona tolu.
- (2) O le a le tatau ona tusia i se Tulafono Tau Faaofi a sui usufono taitoatasi ni fuaiupu e aafia ai lafoga po o so o se tiute po o tupe maua a le Malo, po o le soloia po o le suia o totogi.

98. O se Ata Moni o Tulafono Tau Faaofi a Sui Usufono Taitoatasi ia Tuuina Atu i le Failautusi mo le Lomia ma le Tufatufaina:

- (1) E tatau ona faaoo atu i le Failautusi se ata moni o le Tulafono Tau Faaofi a Sui Usufono Taitoatasi e le silia le taimi e pei ona faatonuina i lalo o le Tulafono Tumau 100(4).
- (2) E tatau i le Failautusi ona faia gaoioiga mo le lomía o le Tulafono Tau Faaofi ma ia tufatufaina ata o le Tulafono Tau Faaofi i laulau a sui usufono i le aso o le a faatu ai le lafo mo le maliega autasi a le Fono Aoaoina ia faaofi atu le Tulafono Tau Faaofi.

99. Felafolafoaiga i Luga o le Lafo mo le Maliega Autasi ia Faaofi Atu se Tulafono Tau Faaofi a Sui Usufono Taitoatasi:

- (1) O le a le tatau ona silia i le 2 itula felafolafoaiga i luga o so o se lafo mo le maliega autasi ia faaofi atu so o se Tulafono Tau Faaofi a so o se Sui Usufono Taitoatasi. E le tatau ona sili atu i le 15 minute se saunoaga a le sui usufono e ona le lafo. O saunoaga a sui usufono (e aofia ai le tali i felafolafoaiga a le sui usufono na faatuina le lafo) o le a le sili atu i le 10 minute.
- (2) I le 10 minute a o le i muta le taimi faatagaina mo le felafolafoaiga, e tatau i le Fofoga Fetalai ona faalavelave i le sui usufono o lo o saunoa ma tapa loa le sui usufono e ona le lafo ina ia tali atu i mataupu na laga i le felafolafoaiga.

100. Faaofiina Mai ma le Faitauina Muamua o Tulafono Tau Faaofi:

- (1) Seia vagana ai e pei ona aiaia i totonu o le parakalafa e sosoo ai o lo o lumanai, e leai se Tulafono Tau Faaofi o le a tatau ona faaofiina ae seia vagana ai ona ua uma ona faasalalauina le Igoa Puupuu o le Tulafono Tau Faaofi i le Samoa Gazette po o le Savali po o se nusipepa i totonu o le atunuu po o i le faasalalauina e le Ofisa o Faasalalauga a le Malo ma ia tufatufaina atu, e tusa ai ma le tulaga e ono mafai ona faia, ni ata o sea Tulafono Tau Faaofi i sui usufono a o lumanai ai le amataga o le fonotaga lea o le a faaofiina ai le Tulafono Tau Faaofi po o le faatuina ai le lafo faatu mo le faaofiina.

- (2) I so o se taimi e maua ai e le Failautusi se talosaga mai le Kapeneta mo se Tulafono Tau Faaofi ina ia faanatinati lona faagasologa, e mafai e le Failautusi ona aofia ai ma le Tulafono Tau Faaofi ua taua i totonu o le Pepa o Galuega e aunoa ma le lomia faasalalau muamua po o le tufatufaina atu i sui usufono, ma e ao i le Taitai o le Maota ona faatu le lafo mo le faagasologa faanatinati o sea Tulafono Tau Faaofi, ma o so o se felafolafoaiga i le tulaga faanatinati o le Tulafono Tau Faaofi e faatapulaa lea i le 30 minute.
- (3) E mafai e so o se sui usufono ona ia faatuina mai se lafo mo le faatagaina ona faaofi mai o se Tulafono Tau Faaofi ua uma ona ia tuuina mai ai se faaaliga, ae peitai e mafai ona faaofi mai se Tulafono Tau Faaofi e avea ma Tulafono Tau Faaofi a le Malo, ina ua mavae se faaaliga, e aunoa ma se poloaiga a le Fono Aoao.
- (4) O le faaofiina o se Tulafono Tau Faaofi mo le Malo o le a tuuina atu ai se faaaliga, e le itiiti nai lo le aso e 1 ma ia le itiiti ifo i lo le 7 aso se faaaliga o se lafo faatu mo le faatagaina ina ia faaofi mai so o se tasi lava Tulafono Tau Faaofi.
- (5) A oo ina ua faaofi mai so o se Tulafono Tau Faaofi i totonu o le Fono Aoao, o le a iloilo ina le Fesili "Ia faitauina nei le Tulafono Tau Faaofi i lona faitauga muamua", e aunoa ma se toe teuteuga po o se fefaaaliaiga o taofi e faia i ai. Ina ua faamaonia se lafo faatu, o le a faitauina leo tele mai e le Failautusi le Igoa o le Tulafono Tau Faaofi, ma o le a faatatauina loa lea tulafono ua faitauina i lona faitauga muamua.

101. Faitauina Faalua o Tulafono Tau Faaofi:

- (1) A maea le faitauga muamua o le a faatulaga loa le Tulafono Tau Faaofi mo le faitauga faalua i le aso fonolona lona tolu e mulimuli ane ai: A ia fai fuafua e faapea, o se Tulafono Tau Faaofi ua tuuina atu i lalo o se pepa faamaonia o tulaga faanatinati i lalo o le Tulafono Tumau 99/100(2) e mafai ona faatulaga mo le faitauga faalua i lea lava aso ua faitauina ai le Tulafono Tau Faaofi i lona faitauga muamua.

- (2) Ina ua uma ona faatuina ma faaluaina se lafo faatu “Ia faitauina nei le Tulafono Tau Faaofi i lona faitauga faalua”, e mafai ona faia se fefaaaliaiga o taofi e aofia ai le faavae ma aoga eseese o le Tulafono Tau Faaofi.
- (3) Afai e faamaonia le lafo faatu, o le a faitauina leo tele mai loa e le Failautusi le Igoa o le Tulafono Tau Faaofi, ma o le a faatatauina loa ua faitauina i lona faitauga faalua.
- (4) I le Faitauga Faalua o se Tulafono Tau Faaofi, e mafai ona toe faatuina se toe teuteuga i le fesili, “Ia faitauina nei le Tulafono Tau Faaofi i lona faitauga faalua”, ina ia tuuese le upu “nei” ma faaopoopo i ai i le faaiuga o le fesili, “i le ono masina talu mai le aso lenei”, po o le mafai ona faatuina se toe teuteuga ina ia tuuese upu uma i tua o le upu “Ia” ina ia faaopoopo i ai upu o lo o faaalua ai le aano moni ma le mafuaaga o lo o faavaeina ai le tetee i le Tulafono Tau Faaofi, ae peitai, e tatau lava i ia upu ona matua faasino tonu i le faavae o le Tulafono Tau Faaofi ae le o ona itu auiliili. Afai e malie le Fono Aoao i se toe teuteuga i so o sea tulaga ua taua i luga, o le a faatatauina loa le Faitauga Faalua o le Tulafono Tau Faaofi ua le talia ma faamaonia.

102. Iloiloga o Tulafono Tau Faaofi:

- (1) A maea le faitauga faalua o se Tulafono Tau Faaofi o le a tulai mai loa le Tulafono Tau Faaofi ua tuuina atu i le Komiti Faa-Palemene o le a faasilasilaina e le Fofoga Fetalai.
- (2) E ui lava i le (1) o lenei Tulafono Tumau, e mafai ona iloiloaina auiliili e le Fono Aoao e aunoa ma le tuuina atu i se Komiti Faa-Palemene, se Tulafono Tau Faaofi ua faaofiina i se tusi faamaonia o le tulaga faanatinati i lalo o le Tulafono Tumau 99/100(2), po o se Tulafono Tau Faaofi lea ua faamalieina le Fofoga Fetalai ua manaomia i se tulaga faanatinati mo le manuia o tagata lautele.
- (3) Afai ua tuuina atu se Tulafono Tau Faaofi i se Komiti Faa-Palemene, o le a leai nisi taualumaga e tatau ona toe faia i ai seia oo ina ua tuuina mai e le Komiti Faa-Palemene sana lipoti i le Fono Aoao.

103. Iloiloga Auiliili o Tulafono Tau Faaofi:

- (1) I luga o le poloaiga mo le iloiloga auiliili o se Tulafono Tau Faaofi, o le a le talanoaina faavae o le Tulafono Tau Faaofi e le Fono Aoa o ae na o ona itu auiliili.
- (2) E mafai ona faia teuteuga i se Tulafono Tau Faaofi pe afai o ia teuteuga ua tuuina mai (e aofia ai ma Fuaiupu fou ma Faamatalaga fou) e tausisia tuutuuga ua taua i lalo:
 - (a) e tatau ona talafeagai teuteuga i le mataupu autu o le Tulafono Tau Faaofi ma mataupu autu o fuaiupu e faasino i ai;
 - (b) e le tatau ona le ogatasi ma so o se Fuaiupu ua uma ona i ai le maliega po o so o se faaiuga ua uma ona faamaonia;
 - (c) afai e faasino ia mea i po o le le mafai ona malamalama e aunoa ma se toe teuteuga mulimuli ane po o se faaaliga o se faamatalaga e uiga i se toe teuteuga mulimuli ane, po o se faamatalaga, ae vagana ua faatagaina e le Fofoga Fetalai se tasi faiga e ese ai e ao ina tuuina mai i luma po o pe afai e oo ina ua faatuina le toe teuteuga muamua ina ia mafai ai ona manino ma malamalama le faasologa o teuteuga;
 - (d) afai o se teuteuga e le talafeagai ma le Igoa o le Tulafono Tau Faaofi, o le a tatau ona toe teuteuina loa le Igoa o le Tulafono Tau Faaofi ina ia talafeagai ai;
 - (e) o aiaiga o le Tulafono Tumau 75 (Faiga Tau le Tuuina atu o Fesili e Faasino i Lafo Toe Teuteu) o le a faaaogaina i le iloiloga o teuteuga i Tulafono Tau Faaofi, ma so o se teuteuga e faatu i luga o se isi teuteuga o le a tatau ona tagofia a o le i faia se faaiuga e faatatau i le uluai teuteuga.

104. Tausalumaga mo le Iloiloina Auiliili o Tulafono Tau Faaofi:

- (a) o le a valaaaina auauai e le Fofoga Fetalai le numera o Fuaiupu taitasi ma o le a ia faitauina mai le faamatalaga faaulutala o lo o faafeagai ma Fuaiupu taitasi ma afai e leai se toe teuteuga e faia i ai, o le a tuuina atu loa e le Fofoga Fetalai, ina ua uma ona valaaaina se aofaiga e mafaia o ni Fuaiupu, le fesili e faapea "O Fuaiupu e oo i le e avea ma vaega o le Tulafono Tau Faaofi";

- (b) afai e faaalua e so o se sui usufono, a o valaauina mai Fuaiupu, e faapea e manao o ia na te faatuina se lafo toe teuteu i, po o le faaalua o ni mafauauga e faatatau i se Fuaiupu, o le a tuuina atu loa e le Fofoga Fetalai le fesili i le itu i Fuaiupu uma ua valaauina ae le i oo ina malilie faatasi i ai, ae le aofia ai le Fuaiupu na faaalua e le sui usufono ma o le a iloiloina loa lea lava Fuaiupu;
- (c) ina ua maea ona faapea ona iloiloina le Fuaiupu, ma ua malilie faatasi i ai po o le teena, o le a tuuina atu loa e le Fofoga Fetalai le fesili e faapea “O le fuaiupu (po o le fuaiupu e pei ona toe teuteuina) ia faatu mai e avea ma vaega o le Tulafono Tau Faaofi”;
- (d) o le a taasisia le faasologa ua taua i lalo i le iloiloina auiliili o se Tulafono Tau Faaofi -
- (i) Fuaiupu e pei ona lomua;
 - (ii) Fuaiupu ua toe tolopoina;
 - (iii) Fuaiupu fou (e aofia ai ni fuaiupu ua sui ai isi fuaiupu na le malilie i ai);
 - (iv) Faamatalaga;
 - (v) Faamatalaga Fou;
 - (vi) Faatomuaga;
 - (vii) Teuteuga i le Igoa (pe afai e tatau ai) ma, i le iloiloina o le Tulafono Tau Faaofi ina ua uma ona tagofia le Tulafono Tau Faaofi Atoa o le a tatau ona mulimuli ma taasisi ai i le faasologa ua taua i lalo;
- (e) e mafai ona tolopoina se fuaiupu i totonu o le Tulafono Tau Faaofi e pei ona lomua, ae vagana ona ua faia i ai se toe teuteuga i lea fuaiupu, o le a tuuina atu loa se fesili mai le Nofoa;
- (f) e mafai ona iloiloina ni fuaiupu fou i o latou tulaga e tatau ai i totonu o le Tulafono Tau Faaofi, po o le mafai foi ona faataatia mo le iloiloina ina ua maea ona iloiloina fuaiupu i totonu o le Tulafono Tau Faaofi e pei ona lomua ai;
- (g) ina ua uma ona faitauina le igoa o so o se Fuaiupu fou e le Fofoga Fetalai, o le a faatatauina loa e faapea ua uma ona faitauina muamua le Fuaiupu. O le a faatuina atu loa le fesili e

faapea “Ia faitauina le Fuaiupu i lona faitauga faalua”, ma afai e malilie faatasi i ai, e mafai loa ona faatuina ni lafo toe teuteu i le Fuaiupu fou. O le fesili faaiu e tatau ona faatuina o le a faapenei “Ia faaopoopo le Fuaiupu (po o le Fuaiupu e pei ona toe teuteuina) i le Tulafono Tau Faaofi”;

- (h) o Faamatalaga fou o le a iloiloina ma tagofia i le auala lava e tasi e pei o Fuaiupu fou;
- (i) a oo ina ua malilie le Fono Aoao i se Fuaiupu po o se Faamatalaga fou po o le toe teuteuina ma ua malilie i ai o le a le tatau i le Fono Aoao ona toe amatalia le iloiloga o sea lava mea.

105. Taulumaga i Komiti Faa-Palemene e Uiga i Tulafono Tau Faaofi:

O le a galulue se Komiti Faa-Palemene i se Tulafono Tau Faaofi e faatatau i tuutuuga uma o Tulafono Tumau e faasino i taulumaga i totonu o Komiti Faa-Palemene, ae peitai, a o le i lipotia le Tulafono Tau Faaofi i le Fono Aoao o le a tatau i le Komiti ona ia iloiloina maea le Tulafono Tau Faaofi e pei ona aiaia i parakalafa (a) i le (i) o le Tulafono Tumau 104 (Taulumaga mo le Iloiloina Auiliili o Tulafono Tau Faaofi) ma le (2) o le Tulafono Tumau 103 (Iloiloga Auiliili o Tulafono Tau Faaofi).

106. Saunoaga i le Iloiloga Auiliili o Tulafono Tau Faaofi:

E le tatau ona sili atu i le sefulu ma le lima (15) minute se saunoaga a se sui usufono i so o se taimi e tasi, po o le sili atu i le lua (2) ni saunoaga i le Igoa Puupuu, Fuaiupu po o Faamatalaga o se Tulafono Tau Faaofi po o so o se teuteuga ua faatu i ai:

Ae vagana ai o lenei tulafono o le a le aafia ai -

- (i) o se Minisita po o se sui usufono e Tauaveina se Tulafono Tau Faaofi; po o
- (ii) o se Minisita e Tauaveina se Vaegatupe Faatatauina i le itu tau i le aofai o ana saunoaga.

107. Taulumaga e Uiga i Tulafono Tau Faaofi e Lipotia mai Komiti Faa-Palemene:

- (1) A uma ona lipotia mai se Tulafono Tau Faaofi mai se Komiti Faa-Palemene o le a sagai atu loa le Fono Aoao e iloiloina le Tulafono Tau Faaofi e pei ona lipotia mai le Komiti Faa-Palemene i luga o se lafo faatu e faapea “Ia faamaonia le Lipoti mai le Komiti Faa-Palemene.”
- (2) Afai e faamaonia le lafo e aunoa ma se teuteuga, e mafai e le Fono Aoao ona see atu loa i le iloiloga auiliili o le Tulafono Tau Faaofi.
- (3) I luga o se lafo faatu ina ia faamaonia le Lipoti mai se Komiti Faa-Palemene e uiga i se Tulafono Tau Faaofi, e mafai e so o se sui usufono ona ia faatu se lafo toe teuteu ina ia faaopoopoina i le faaiuga o le lafo upu nei “i le noatia ma le fai fuafua i le iloiloga o le Lipoti e le Fono Aoao” (e tusa lava po o le lipoti atoa pe na o ni vaega o lea Lipoti) ma afai e i ai le maliega a le Fono Aoao i lea lafo faatu o le a iloiloina loa le Lipoti e pei ona faatu mai.

108. Faitauga Faatolu o Tulafono Tau Faaofi:

- (1) Ina ua faia ma faaluaina se lafo faatu e faapea “Ia faitauina nei le Tulafono Tau Faaofi i lona faitauga faatolu”, e mafai ina ua faatagaina e le Fofoga Fetalai, ona faia ni toe teuteuga mo le faasaoina o ni sese po o ni mea na pau i le vaai ae leai se toe teuteuga tele o le a tatau ona faatu mai.
- (2) A oo ina ua tuuina atu le fesili “Ia faitauina nei le Tulafono Tau Faaofi i lona faitauga faatolu”, o le a mafai ma alaga tatau mo so o se sui usufono ona ia faatu mai se toe teuteuga mo le toe faataatia po o se isi itu e ese ai e pei ona fuafuaina e le (4) o le Tulafono Tumau 101 (Faitauina Faalua o Tulafono Tau Faaofi).
- (3) Afai e faamaonia le lafo faatu, o le a faitauina leo tele loa e le Failautusi le Igoa o le Tulafono Tau Faaofi, ma o le a faatatauina loa le Tulafono ua uma ona faitauina faatolu.
- (4) O le a le faia se lafo faatu mo le Faitauga Faatolu o se Tulafono Tau Faaofi i le aso lava lea e lipotia mai ai le Tulafono Tau Faaofi mai se Komiti o le Fono Aoao Atoa po o le aso e faamaonia ai le Lipoti mai se

Komiti Faa-Palemene e faatatau i le Tulafono Tau Faaofi, ae vagana le itu i se Tulafono Tau Faaofi o Tupe Faaagaaga po o le Faatatauina o Tupe po o se Tulafono Tau Faaofi e faasino i ai se tusi faamaoni o le faanatinati na tuuina mai, e tusa ai ma le Tulafono Tumau 100(2).

109. Pasia o Tulafono Tau Faaofi:

A maea le faitauga faatolu, o le a le toe tuuina atu se isi Fesili ma ua tulai mai ai le Tulafono Tau Faaofi ua tea ese atu ma le Palemene.

110. Ia Lomia Manino Tulafono Tau Faaofi ua Faamaonia, ma Tuuina Atu mo le Maliega a le O Le Ao o le Malo:

Ina ua pasia se Tulafono Tau Faaofi o le a lomina sagatonu loa i le faatonuga a le Failautusi, o ia lea na te faamaonia lomiga e lima (5) ma tuuina atu mo le maliega a le O Le Ao o le Malo.

111. Teuteuga Aloaia:

- (1) I le saunia ai o le Tulafono Tau Faaofi mo le maliega a le O Le Ao o le Malo, e mafai e le Failautusi ona lomina teuteuga tusitusia ma faasa'o ni sese tau ofisa po o tau lomiga i so o se vaega o le Tulafono Tau Faaofi.
- (2) Ia faaalua manino uma ia teuteuga tusia ma faasaoga uma i le "Tusi Faamaonia o Teuteuga o le Tulafono Tau Faaofi".

112. Ina ua Uma ona Tuuina Atu le Maliega a le O Le Ao o le Malo:

E tatau i le Failautusi ina ua uma ona tuuina atu le maliega a le O Le Ao o le Malo i se Tulafono Tau Faaofi, ona tuuina atu se tasi o lomiga faamaonia o le Tulafono Tau Faaofi i le Failautusi a le O Le Ao o le Malo, lona lua i le Loia Sili, lona tolu i le Resitara o le Faamasinoga Sili, lona fa i le Minisita e fitoitonu ma le Tulafono Tau Faaofi, ma taofia le lona lima o lomiga.

113. Tulafono Tau Faaofi Fou ua Pasia e Avea ma Tulafono a le Palemene:

- (1) E leai se Tulafono Tau Faaofi o le a avea ma tulafono seia vagana ua tuuina atu i ai le faamaoniga a le O Le Ao o le Malo.

- (2) Afai e tuuina atu se Tulafono Tau Faaofi ua pasia e le Fono Aoao Faitulafono i le O Le Ao o le Malo mo lana Faamaoniga, o le a ia tautinoina, i luga o fautuaga a le Palemia, lona faamaonia o le Tulafono Tau Faaofi po o lona teena foi e le tuuina atu i ai lana faamaoniga i le Tulafono Tau Faaofi.
- (3) O se Tulafono ua faamaonia e le O Le Ao o le Malo e pei ona aiaia nei o le a taua loa o se Tulafono Faavae a le Palemene ma o le a faamamaluina i le aso lava na faamaonia ai, po o so o se tasi lava aso (pe i tua atu po o luma mai o le aso na faamaonia ai) e pei ona faatinoina i lona tulaga i le Tulafono Faavae.
- (4) I le noatia ma le fai fuafua i le (5), e mafai e O Le Ao o le Malo ona le faamaonia se Tulafono Tau Faaofi sa tuuina atu i ai le faamaoniga talu ai, lea e le o i ai tulaga sao atoatoa e pei ona pasia ai e le Maota, i luga o le fautuaga a le Failautusi. E ao i le Failautusi ona vave faamatuu ese le Tulafono Tau Faaofi ua lē faamaonia, ma faagasolo le Tulafono Tau Faaofi moni na pasia e le Maota mo lona faamaoniga.
- (5) O se tulaga e le faamaonia ai o i le (4) e ao ona tausisia ai itu nei:
 - (a) e ao ona tulai mai i totonu o le masina e tasi mai le aso na faamaonia ai;
 - (b) e ao i le Failautusi ona saunia ma sainia se Tusi Faamaonia o Teuteuga e faailoa ai le vaega e lē sao atoatoa o manaomia ai le lē faamaonia o le Tulafono Tau Faaofi, e tutusa ma le Tusi Faamaonia o Teuteuga o i le Tulafono Tumau 111; ma
 - (c) e ao i le Failautusi ona sainia se folafolaga e faapea o se tulaga lē sao atoatoa sa faapea ona le i faamoemoeina, ma e leai ni tulaga faaupufai, tamaoaiga po o se isi faiga e ese ai, faiga faatosina o aafia ai i le fautuaga e lē faamaonia ai.

114. Faauieseina o Tulafono Tau Faaofi:

A o lumanai le amataga o le galuega tau tagata uma po o le amataga o so o se tulaga o se Tulafono Tau Faaofi e mafai e le Minisita po o le sui usufono o lo o pulea se Tulafono Tau Faaofi ona ia faia se lafo faatu e aunoa ma le tau tuuina mai o se faaaliga, mo lona faauieseina ma le aveeseina mai le Pepa o le Faasologa o Galuega.

115. Toe Iloiloina o se Tulafono Tau Faaofi na Tuua:

- (1) A oo ina ua faalavelaveina le faagasologa o le iloiloina o se Tulafono Tau Faaofi ina ua tolopoina *seia se aso* le fonotaga mulimuli i tausaga taitasi po o le faatuuaina (ae le o le faataapeina) e mafai i luga o se lafo faatu ona toe tagofia sea Tulafono Tau Faaofi i le tauaofiaga o le a sosoo ai.
- (2) O le Tulafono Tau Faaofi ua toe tagofia o le a mafai ona faagasolo i le amataga mai i le tulaga sa gata mai ai i le tauaofiaga ua tuanai, ae vagana ai o se isi lafo faatu e tuuina mai.

VAEGA XXVII
TULAFONO TAU FAAOFI E AAFIA
AI TAGATA TAITOATASI

116. Tulafono Tau Faaofi e Aafia ai Tagata Taitoatasi:

- (1) E leai se lafo faatu mo le faaofiina o se Tulafono Tau Faaofi, e ese ai i lo se Tulafono Tau Faaofi a le Malo, ua faamoemoeina e aafia ai pe faamanuiaina ai se tagata faapitoa, sosaiete po o se faalapotopotoga soofaatasi o le a faia vagana ona ua uma ona faasalalauina i le nusipepa faale-Malo o le *Samoa Gazette*, atoa ma se nusipepa o lo o faasalalauina se faaaliga o se faamatalaga o le uiga lautele ma mea o lo o taulai i ai le Tulafono Tau Faaofi, o lona itiiti mai o aso o lea faaaliga o le masina e tasi (1). O Tulafono Tau Faaofi taitasi uma faapea o le a i ai se fuaiupu e puipuia ma faasaoina ai aia tatau a le Malo Tutoatasi o Samoa, faalapotopotoga uma tau upufai o Malo ma faalapotopotoga soofaatasi, atoa ma isi uma lava ae vagana ai i latou e pei ona taua i le Tulafono Tau Faaofi ma e o lo o talosagaina e i latou, pe mai ia te i latou, po o e o i lalo o la latou tausiga.
- (2) O le totogi o le sauniuniga ma le lomina o Tulafono Tau Faaofi uma faapea o le a le avea o se avega e pau atu i le Malo pe afai ua teena le Tulafono Tau Faaofi e le Fono Aoao.
- (3) A oo ina ua uma ona faitauina faalua sea Tulafono Tau Faaofi, o le a tuuina atu loa i le Komiti Faa-Palemene e pei ona faatonuina e le Fofoga Fetalai.
- (4) A oo ina ua uma ona tuuina atu se Tulafono Tau Faaofi i le Komiti Faa-Palemene e pei ona faatonuina e le Fofoga Fetalai e tusa ma le (3) o lenei Tulafono, so o se vaega o ni tagata e aafia i le Tulafono Tau Faaofi e mafai ona faafogaina ni a latou molimau i luma o le Komiti ina ua talosagaina lea itu, tusa lava po o le matua auai atu po o le avea o se tasi (Loia) e fai ma sui faatasi ai ma so o se molimau. E mafai e le Komiti ona faaaoga faamatalaga tuufogoga po o isi lava faamatalaga molimau, e pei ona o le a manatu o ia ua tatau ai.

- (5) O le a le faatagaina i sea Tulafono Tau Faaofi se fuaiupu fou e le talafeagai ma le uiga o le faamatalaga o lo o manaomia e le (1) o lenei Tulafono.
- (6) O le a toe faauiese se Tulafono Tau Faaofi a se Sui Usufono lava ia pe afai e le toe avea o ia ma Sui Usufono o le Palemene po ua avea ma Minisita.
- (7) E mafai e le Malo, ina ua malie i ai le sui usufono o lo o ona pulea le Tulafono Tau Faaofi, ona ia avea e fai ma ana lea Tulafono Tau Faaofi, ae peitai, a o le i avea lea Tulafono Tau Faaofi o se Tulafono Tau Faaofi a le Malo, o le a faailoa atu e le Minisita ua na tausia le Tulafono Tau Faaofi i le Fofoga Fetalai i se tusi e faapea o lea Tulafono Tau Faaofi ua avea e le Malo e fai ma ana ma o le a faasilasila atu loa e le Fofoga Fetalai lea mea i le Fono Aoao.

VAEGA XXVIII
KOMITI O LE FONO AOA O ATOA

117. See atu o le Fono Aoa Atoa i se Tulaga Faa-Komiti:

- (1) O le a tatau ona i ai se Komiti o le Fono Aoa Atoa e iloiloina Lipoti a Komiti e uiga i Lipoti Faaletausaga ma Tali a le Malo i Lipoti nei a Komiti, lea e tatau ona usua ana fonotaga ia Aperila e oo atu ia Iuni, po o isi taimi o le tausaga e pei ona tuuina atu e le Fono Aoa.
- (2) O Lipoti Faaletausaga uma mo tausaga faaletupe e ao ona faataatia i luma o le laulau-a-fono a le Palemene ia Tesema i le maea ai o tausaga faaletupe taitasi e aofia ai pepa aloaia faaopoopo e manaomia.
- (3) E tatau i Komiti Faa-Palemene taitasi uma ia na tuuina atu i ai se Lipoti Faaletausaga e iloiloina ona toe lipoti mai i le Fono Aoa i totonu o le 2 masina mai le aso na tuuina atu i ai.
- (4) O le taimi lava e faataatia ai i luga o le laulau-a-fono a le Palemene se Lipoti a se Komiti e uiga i se Lipoti Faaletausaga, e tatau i le Failautusi ona ia tuuina atu lea Lipoti mo le Tali mai a le Malo i totonu o le 2 masina mai le aso na tuuina atu i ai.
- (5) E tatau i le Komiti o le Fono Aoa Atoa ona iloiloina le Lipoti a le Komiti e uiga i se Lipoti Faaletausaga ma Tali a le Malo.
- (6) E tatau i le Komiti o le Fono Aoa Atoa ona toe lipoti atu i le Fono Aoa e uiga i taunuuga o iloiloiga o Lipoti a Komiti i Lipoti Faaletausaga ma Tali a le Malo e fesootai i ai.

118. Faalava le Faailoga o le Pule (Mace) i Lalo o le Laulau:

O le a faalava le Faailoga o le Pule (Mace) i lalo o le Laulau pe a ua i ai le Fono Aoa i le tulaga faa-Komiti o le Fono Aoa Atoa.

119. Ia Iloilo e le Komiti na o Mataupu e Tuuina Atu i ai:

O le a na o ni mataupu e pei ona o le a tuuina atu i ai e le Fono Aoa e mafai e le Komiti o le Fono Aoa Atoa ona iloiloina.

120. Taimi Faatapulaaina o Lauga:

I le Komiti o le Fono Aoao Atoa e le tataui i se sui usufono ona saunoa i le sili atu i lo le 15 minute i se taimi e tasi (1) po o le sili atu i le lua (2) ni saunoaga i luga o so o se Fesili o lo o i luma o le Komiti:

Ae o le a le tausisia lenei tulafono i se Minisita po o se sui usufono e Tauaveina se lafo po o se isi lava mataupu.

121. E le Manaomia le Faaluaina o se Lafo Faatu:

O se Lafo Faatu po o se lafo toe teuteu e faatuina i le tulaga faa-Komiti o le Fono Aoao Atoa o le a le manaomia ina ia faaluaina.

122. E mafai e Sui Usufono ona Saunoa e sili atu i lo le faa-tasi:

I le tulaga faa-Komiti o le Fono Aoao Atoa e mafai e sui usufono ona saunoa e sili atu i lo le faa-tasi i le Mataupu lava e tasi; ae peitai afai e sili atu i lo le toatasi (1) sui usufono e tutulai a'e e saunoa, o le a tuu atu le avanoa muamua e le Taitaifono i se sui usufono e le i saunoa muamua i le Mataupu lava lea e tasi.

123. Tulaga Vevesi e Aliali mai:

Afai e i ai se tulaga vevesi e aliali mai faafuasei i totonu o le Komiti o le Fono Aoao Atoa o le a faasilasilaina loa e le Fofoga Fetalai po o le Taitaifono ua toe see le Komiti i le tulaga faale Fono Aoao e aunoa ma le tau tuuina atu o le Fesili.

124. E le mafai e le Komiti o le Fono Aoao Atoa ona Tolopo Lana Fonotaga:

E le mafai e se Komiti o le Fono Aoao Atoa ona tolopo sana lava fonotaga po o le iloiloaina o so o se mataupu i se fonotaga o lumanai.

125. Lafo ina ia Lipoti le Faagasologa ua Oo i ai:

(1) E mafai e se sui usufono ona faatu se lafo, "Ina ia Lipoti atu e le Komiti le faagasologa ua oo i ai". I le taliaina e le Fono Aoao o le Lipoti, o le a faatulaga loa le tulafono tau faaofi po o nisi mataupu mo le iloiloaga a le Komiti i le aso fono e sosoo ai.

- (2) E le tatau ona i ai se teuteuga po o se felafolafoaiga i luga o le fesili ina ia lipoti atu le faagasologa ua oo i ai.

126. Lipoti:

- (1) Ina ua uma ona iloiloina e le Komiti o le Fono Aoao Atoa mataupu uma sa tuuina atu i ai, o le a lipoti atu loa ia mataupu e le Taitaifono i le Fono Aoao.
- (2) Afai e le i maea ona iloiloina ia mataupu uma, o le a lipoti atu e le Taitaifono le gasologa alualu i luma ua i ai po o le leai foi o se gasologa e pei ona o le a i ai.

127. Lafo Faatu e Lipoti ai le Faagasologa o Tualumaga ua Oo i ai ma Faatagisia se Avanoa e Toe Fono ai:

E mafai ona faia se Lafo Faatu i le taimi o tualumaga a se Komiti o le Fono Aoao Atoa “Ina ia lipoti atu e le Komiti o le Fono Aoao Atoa le faagasologa ua oo i ai ana tualumaga ma faatagisia se avanoa e toe fono ai” ma o le a tuuina atu loa lava le fesili ma faaiu lea mataupu e aunoa ma se toe teuteuga po o se fefaaaliaiga o taofi e faia i ai.

128. Faautagia o Lipoti:

Afai o le a lipoti atu le Komiti i le Fono Aoao, o le a tuuina atu e le Taitaifono le fesili, “Ina ia faautagia le lipoti”. E le tatau ona i ai se teuteuga po o se felafolafoaiga i luga o le fesili.

129. Tulafono e Puipui ai le Fefaaaliaiga o Taofi ma le Faiga o Galuega i le Tulaga Faa-Komiti:

Vagana ona ua ese ai se fuafuaga a nei Tulafono Tumau, o tulafono lava e puipui ai le tulaga toafilemu i le Fono Aoao, ma le tuuina atu o Fesili, taulimaina o lafo toe teuteu, faiga o palota tauvalaau, ma mo le puipuiga o le fefaaaliaiga o taofi ma le faiga o galuega i lona tulaga aoao o le a faamamaluina i le tulaga faa-Komiti e pei ona faia i le Fono Aoao; ae peitai, o se tulaga vevesi i se Komiti e faatoa mafai ona iloiloina e le Fono Aoao ina ua ia mauaina se lipoti.

130. Pule e Amia ai Tagata, Pepa ma Faamatalaga Faamauina:

E mafai e le Komiti o le Fono Aoao Atoa i luga o se Lafo Faatu ona manaomia so o se matagaluega a le malo e aafia ai ina ia tuuina mai se lipoti e faamatalaina ai so o se Tulafono Tau Faaofi, lafo faatu, po o se tasi lava mataupu e ono mafai ona iloiloina po o le tofia o se sui ina ia oo atu e avea o se molimau mo le itu i le faamatalaina o sea Tulafono Tau Faaofi, lafo faatu, po o se tasi lava mataupu.

VAEGA XXIX
TALA FAATATAU O TUPE MA
TAUALUMAGA TAU TUPE

131. Tala Faatatau o Tupe:

O le a faaofiina mai le Tala Faatatau o Tupe i totonu o le Fono Aoao i se Faaaliga mai le Taitai o le Maota.

132. Tulafono Tau Faaofi o le Faatatauina o Tupe:

- (1) I le faagasologa o tausaga taitasi uma o le a ao ina faaofiina atu i totonu o le Fono Aoao Faitulafono se Tulafono Tau Faaofi o le Faatatauina o Tupe, lea e tatau ona aofia ai tupe alu uma e manaomia e totogi atu mai faaputuga tupe o tupe maua mo galuega uma a le Malo mo le tausaga e sosoo ai. O faamatalaga auiliili uma o nei tupe manaomia e ao ina aofia i totonu o le Tala Faatatau Faataitai o Tupe faapea ma le Faamatalaga Tau Tupe lea o le a faataatia e le Minisita o Tupe i luma o le Fono Aoao pe a uma le faitauina muamua o le Tulafono Tau Faaofi.
- (2) O le Minisita o Tupe o le a faatuina loa le Faitauga Faalua o le Tulafono Tau Faaofi ma faitau le Faamatalaga Tau Tupe.

133. Tuuina atu i le Komiti o Faamatalaga o Tupe a le Malo:

A maea loa ona faatuina o le lafo mo le Faitauga Faalua o le Tulafono Tau Faaofi, ma ua faaluaina, ona tolopo ai loa lea o le Felafolafoaiga e faatatau i ai mo se vaitaimi e le itiiti ifo i le sefulu ma le fa (14) aso ma tuu atu ai loa foi le Tala Faatatau o Tupe mo le iloiloga a le Komiti o Faamatalaga o Tupe a le Malo mo sana lipoti i ai. Afai e toe faaauau le felafolafoaiga, e ao ina saunoa sao lava i le tulaga tau tupe ma le tamaoaiga o Samoa faapea ma le faiga faavae tau tupe a le Malo.

134. Iloiloga Auiliili o le Tulafono Tau Faaofi o le Faatatauina o Tupe ma Tala Faatatau o Tupe:

- (1) Ina ua maea ona faitauina faalua le Tulafono Tau Faaofi o le Faatatauina o Tupe, o le a sagai atu loa le Fono Aoao i le iloiloaina auiliili o le Tulafono Tau Faaofi o le Faatatauina o Tupe ma le Tala Faatatau Faataitai o Tupe ma e tatau ona silasila i le Lipoti a le Komiti o Faamatalaga o Tupe a le Malo a o faagasolo lea iloiloga.
- (2) O le a tatau ona faatapulaaina i le 14 aso mo le iloiloga o le Tulafono Tau Faaofi o le Faatatauina o Tupe ma le tala faatatau faataitai o tupe ma o itula o fonotaga o so o se aso po o aso o le a faatulagaina e le Komisi Faa-Palemene ina ia maea le iloiloga i le taimi manaomia.

135. Iloiloina o Vaegatupe a Matagaluega:

- (1) E mafai e le Komisi Faa-Palemene ona faatulaga le faasologa e iloiloaina ai Vaegatupe a Matagaluega o lo o i totonu o le Tala Faatatau o Tupe faataitai, ma e mafai foi ona latou fuafuaina se tapulaa o le taimi e talanoaina ai se Vaegatupe a so o se Matagaluega e pei ona o le a faaalua e le Komisi Faa-Palemene. Afai o le a faatapulaaina se taimi mo se Vaegatupe a se Matagaluega, ma ua oo atu i le faaiuga o lea taimi, ae le i maea ona tagofia le Vaegatupe a le Matagaluega lena, o le a tuuina atu loa lava e le Fofoga Fetalai i lena taimi so o se fesili e faamaape ai le Vaegatupe a lena Matagaluega. I le aso mulimuli o aso atofaina e tusa ma aiaiga o le (2) o le Tulafono Tumau 134, e ao loa i le Fofoga Fetalai, i le itula e 12.45 i le aoauli pe afai e tuai, ona ia tuuina atu faasolosolo fesili e aunoa ma se toe felafolafoaiga e faia, i Meataitasi uma a Matagaluega e le i maea ona faamaape.
- (2) O le a taofia le iloiloaina o fuaiupu o se Tulafono Tau Faaofi o le Faatatauina o Tupe seia vagana ua uma ona iloilo so o se faamatalaga po o faamatalaga o sea Tulafono Tau Faaofi.
- (3) I le iloiloaina o le faamatalaga muamua, o le a fofogaina auauai e le Fofoga Fetalai le igoa o Matagaluega taitasi ma faatu atu le Fesili e faapea o le vaegatupe e tala mo le Matagaluega o ia avea ma vaega o le faamatalaga.

- (4) E mafai e so o se sui usufono ona faatu se lafo toe teuteu e faaitiitia i le tala se Vaegatupe ua atofaina mo sea Matagaluega. E manaomia, a itiiti mai o le 3 aso e faasilasila ai so o se lafo toe teuteu.
- (5) Afai e tele ni lafo toe teuteu ua faatutu mai mo le faaitiitia o mea taitasi i Vaegatupe a Matagaluega, o le a tagofia lava e tusa ma le faasologa o lo o i ai i le Pepa o Galuega, ma o le a tatau lava ona faamaape taitasi lafo toe teuteu ao le i tagofia le lafo e sosoo ai, ma o le felafolafoaiga i lafo toe teuteu uma ia faasino tonu lava i le mea taitasi lea ua manaoina ia faaitiitia. O lafo toe teuteu ua faatutu mai e ao ina tuuina i totonu o le Pepa o Galuega i le faasologa o fuainumera faatulagaina o mea taitasi ma afai e sili atu i le tasi ni lafo toe teuteu ua faatutu atu i se mea taitasi lava e tasi, o le a tatau ona tuuina atu muamua le fesili i le lafo e aupito tele le vaegatupe o lo o faatu mai ai.
- (6) O se faaopoopoga i se vaegatupe ua atofaina mo so o se meataitasi a se Matagaluega e mafai ona faatuina mai e le Minisita o Tupe, pe afai e muamua ona mauaina ma faaooina mai i luma o le Fono Aoao le faamaoniga a le Taitai o le Maota e tusa ma le Tulafono Tumau 140 (Tupe Foa Faa-Meaalofa ma Lafoga). O le a manaomia aso atoatoa lelei se tolu (3) mo se faaaliga o sea Lafo.
- (7) O le a ao lava ina faamuamua se lafo toe teuteu ina ia faaopoopoina se mea taitasi o lo o faasino i ai se lafo toe teuteu ina ia faaitiitia se Vaegatupe a se Matagaluega ma afai e faamaonia o le a leai se lafo ina ia faaitiitia lena Vaegatupe a se Matagaluega e toe valaauina:
Ae vagana e faapea:
- (a) o sea lafo toe teuteu ina ia faaopoopoina e tatau pe afai e mafai, ona faatuina i le mea taitasi lea ua manaomia e faaopoopoina; ma
- (b) o sea lafo toe teuteu ina ia faaopoopoina se mea taitasi afai e faamaonia o le a le taofia ai le faaitiitia o le Vaegatupe a le Matagaluega e aafia ai, ia itiiti ifo i lo le faaopoopoga lea ua malilie i ai e faatatau i mea taitasi, e ese ai na i lo le mea taitasi lea ua uma ona faaopoopoina.
- (8) Pe a maea ona faamaapeina se toe teuteuga i se mea taitasi, e leai se toe teuteuga po o se felafolafoaiga o le a faatagaina e toe faia i luga o se mea taitasi ua mavae o le Vaegatupe a lea Matagaluega.

- (9) Afai e maea ona faamaapeina lafo toe teuteu uma i totonu o le Pepa o Galuega e faatatau i se Vaegatupe a se Matagaluega, o le a tuuina atu loa e le Fofoga Fetalai le fesili e faaapea o le Vaegatupe (po o le faaitiitia o le vaegatupe ua faaopoopoina) e tala ma o le Vaegatupe a le Matagaluega o ia avea ma vaega o le Faamatalaga.
- (10) I le taimi o le fesili e faapea o le vaegatupe (po o le vaegatupe ua faaitiitia po o ua faaopoopoina) e tala mo le Vaegatupe a le Matagaluega a ia avea ma vaega o le Faamatalaga, e ao ina faasino tonu le felafolafoaiga i le faiga faavae tau lea galuega e aafia i lalo o lea mea taitasi ua faatagisia ai sea vaegatupe faapea ma Tupe Maua ia o lo o tauaveina e lea lava galuega o lo o faasino tonu i ai lea mea taitasi.

136. Lafo Faatu ia Faaumiumi pea se Mataupu:

I le aso ua atofaina o le a faamuta ai tualumaga e faatatau i so o se Tulafono Tau Faaofi o le Faatatauina o Tupe, o le a leai se lafo faatu ina ia faaumiumi pea ia tualumaga, ma o le a le faalavelavea pe toe tolo i tua tualumaga nei e so o se isi lava Tulafono Tumau.

137. Faitauga Faatolu o le Tulafono Tau Faaofi o le Faatatauina o Tupe:

A maea le iloiloga auiliili o le Tulafono Tau Faaofi o le Faatatauina o Tupe, o le a tatau i le Minisita o Tupe ona faatuina loa le lafo mo le faitauga faatolu. E le tatau ona faatagaina se felafolafoaiga i luga o le lafo faatu mo le faitauga faatolu.

138. Tulafono Tau Faaofi o le Faatatauina o Tupe Faaopoopo:

Afai i so o se taimi o le a faaofiina mai ai se Tulafono Tau Faaofi o le Faatatauina o Tupe Faaopoopo i totonu o le Fono Aoa, o le a faaogaina lava i ai aiaiga e afua mai le Tulafono Tumau 132 (Tulafono Tau Faaofi o le Faatatauina o Tupe) seia oo i le Tulafono Tumau 137 (Faitauga Faatolu o le Tulafono Tau Faaofi o le Faatatauina o Tupe) i ona vaega taitasi uma ma tualumaga i so o se Tulafono Tau Faaofi o le Faatatauina o Tupe Faaopoopo.

139. Ia Faamuamua lava le Tulafono Tau Faaofi o le Faatatauina o Tupe:

E ao lava ona faamuamua le Tulafono Tau Faaofi o le Faatatauina o Tupe i lo nisi lava galuega uma a le Maota, ma seia vagana ua maea e ao ina faatulaga i aso taitasi uma o se Galuega mo le Aso i le amataga o le isi aso fono e sosoo ai.

VAEGA XXX
TUPE FOAI FAA-MEAALOFI MA LAFOGA

140. Tupe Foai Faa-Meaalofi ma Lafoga:

- (1) O le a le sagai atu le Fono Aoao e iloiloina so o se Tulafono Tau Faaofi, Lafo Faatu, Talosaga, po o se tasi mataupu ua i ai i le taofi o le Fofoga Fetalai o le a aveeseina ai pe tusia ai i so o se tupe maua a le Malo po o ni faaaputuga tupe tau le Malo pe soloia ai po o le suia ai o le faaaogaina o sea vaegatupe po o le tusia e avea o se aitalafu, po o le tuuina atu, suia po o le soloia o so o se totogi tau laisene, lafoga po o se tiute, ae vagana ona ua faaalua i se tusi le fautuaga po o le maliega a le Taitai o le Maota i sea Tulafono Tau Faaofi, Lafo Faatu, po o se tasi mataupu ua uma ona faaoina atu i le Fofoga Fetalai.
- (2) O le a le sagai atu le Fono Aoao i so o se Tulafono Tau Faaofi po o se Lafo Faatu, ua i ai i le taofi o le Fofoga Fetalai (ina ua maea ona ia fesiligia, pe a finagalo i ai o ia, le fautuaga a le Loia Sili) o le a fai ai so o se suiga i totogi, alauni po o tuutuuga o le galuega a so o se tagata ofisa o le Malo, po o totonu o le Tulafono, tulafono faatonutonu po o le faiga ua masani ai o lo o pulea ai le faatagaina atu o malologa, auala e feui ai po o se laasaga siitia e tatau ona faaaogaina i sea tagata ofisa po o le totogiina atu o penisione, tupe foai faa-meaalofi po o isi lava alauni faapena e tatau ona faia i so o se tagata ofisa po o lona toalua ina ua maliu o ia, lana fanau, tagata e faalagolago ia te ia le tausiga o lo latou soifuaga po o ni ona lava sulii totino, ae vagana ona ua faaalua i se tusi le fautuaga po o le maliega a le Taitai o le Maota i sea Tulafono Tau Faaofi po o se Lafo Faatu ma ua uma ona faaoina atu i le Fofoga Fetalai.
- (3) O le a le sagai atu le Fono Aoao i so o se Tulafono Tau Faaofi po o se Lafo Faatu, ua i ai le taofi o le Fofoga Fetalai (ina ua maea ona ia fesiligia, pe a finagalo i ai o ia, le fautuaga a le Loia Sili) e faasino i, pe aafia ai so o se mataupu, o le avega tauave mo lea mataupu ua tuuina atu i le O Le Ao o le Malo po o so o se mataupu, o lana avega tauave

ua tuuina atu i le Loia Sili, ae vagana ona ua faaalua i se tusi ua faaooina mai i le Fofoga Fetalai i le fautuaga po o le maliega o le Taitai o le Maota i sea Tulafono Tau Faaofi po o se Lafo Faatu.

- (4) O le a le sagai atu le Fono Aoao e iloiloina so o se Lafo Faatu po o se Tulafono Tau Faaofi mo le faatagaina atu o so o se tupe, pe mo le tatalaina atu po o le faamagaloina o so o se tupe o lo o nofo aitalafu ai nisi i le Malo Tutoatasi o Samoa ae vagana totonu o se Komiti o le Fono Aoao Atoa.
- (5) Afai e faia so o se Lafo Faatu i totonu o le Fono Aoao mo so o se fesoasoani a le Malo po o se tupe e tusia i luga o tagata, o le a tuuina atu sea lafo faatu i se Komiti o le Fono Aoao Atoa a o le i pasia so o se iugafono po o se palota a le Fono Aoao e faatatau i lea mataupu.

VAEGA XXXI
FAATONUGA I KOMITI

141. Faatonuga i se Komiti:

O se Faatonuga i se Komiti o le a faalateleina po o le faatapulaaina ai Mataupu/Tuutuuga, e faasino tonu i ai ana Galuega.

142. Tulaga Aloaia o se Faatonuga:

E mafai e se Komiti o le Fono Aoao Atoa po o se Komiti Faa-Palemene ona iloilo ina na o mataupu ua tuuina atu ia te ia e le Fono Aoao, ma a oo ina ua manaomia le Komiti ina ia iloilo ina foi e ia ma isi mataupu, o le a tuuina atu se Faatonuga a le Fono Aoao ina ia mafai ai e le Komiti ona faaofi atu ia mataupu.

143. Ia Faatapulaaina le Fefaaaliaiga o Taofi i se Lafo Faatu mo se Faatonuga:

So o se fefaaaliaiga o taofi i se Lafo Faatu mo se Faatonuga o le a faatapulaaina i le mataupu o lo o faaautu i ai le Lafo ma o le a le faalateleina i mea eseese o lo o avea ma aano moni o le Tulafono Tau Faaofi po o se tasi mataupu o lo o faasino i ai le Faatonuga.

VAEGA XXXII

KOMITI FAA-PALEMENE

144. Tofia o le Komisi Faa-Palemene ma Komiti Faa-Palemene:

E mafai e le Komisi Faa-Palemene ua faavaeina i le Tulafono Tumau 110 ona fautuaina le tofia o Komiti Faa-Palemene ma sui usufono e galulue i Komiti.

145. Ia Le Itiiti Ifo i lo le Toafitu (7) Sui Usufono e Auai i se Komiti:

E leai se Komiti Faa-Palemene o le a itiiti ifo i lo le toafitu (7) sui usufono e auai e aunoa ma le faatagaina mai le Fono Aoao i se Lafo Faatu e fai ai se Faaaliga.

146. Faateteaina ma le Tofia o Sui:

- (1) E mafai i so o se taimi mulimuli ane i luga o se Lafo Faatu e tuuina mai faatasi ma se Faaaliga ona faateaina e le Fono Aoao se sui na tofia i se Komiti Faa-Palemene mai lona auai i lea Komiti ae tofia i ai se tasi sui.
- (2) I le va o ni fonotaga se lua (2) a le Fono Aoao Faitulafono a o faagasolo pea lona vaitaimi, afai e i ai so o se sui usufono o se Komiti na tofia e le Fono Aoao Faitulafono ua toesea o ia e sili atu i lo le tolu fonotaga sosoo a sea Komiti e aunoa ma le Faatagaga e Toesea ai, po ua i ai i le taofi o le Fono Aoao e aunoa ma se mafuaaga tatau, o le a faatatauina loa lena sui usufono ua aveesea lona nofoa i le Komiti ma e mafai ona filifilia se tasi i le avanoa ua faapea ona tulai mai i le fonotaga o lo o lumanai ai a le Fono Aoao.

147. Ia Faapipii ma Faaali Lisi o Suafa o Sui o Komiti:

O le a faapipii ma faaaliga lisi o suafa o Sui o lo o galulue i Komiti Faa-Palemene taitasi i se nofoaga po o ni nofoaga e pei ona o le a faatonuina e le Fofoga Fetalai.

148. Fonotaga a Komiti Faa-Palemene:

- (1) O le a usuia uluai fonu a Komiti Faa-Palemene taitasi i taimi ua fuafuaina e le Fofoga Fetalai.
- (2) E tatau ona usuia fonotaga uma e mulimuli mai ai a se Komiti Faa-Palemene i so o se taimi o le a fuafuaina e le Taitaifono o le Komiti.
- (3) Afai ua leai se Taitaifono po o ua toesea le Taitaifono mai Samoa, e mafai e le Sui Taitaifono ona faatino malosiaga o le Taitaifono e fuafua ai se taimi e fonu ai le Komiti.
- (4) I le toesea faatasi ai o le Taitaifono ma le Sui Taitaifono, o le a fuafuaina e le Fofoga Fetalai se taimi e fonu ai le Komiti.
- (5) E tatau ona faamauina i Tala Ootoo o taualumaga a Komiti suafa o sui usufono e auai i aso taitasi o fonotaga a so o se Komiti Faa-Palemene.

149. Nofoaga o Fonotaga ma Asiasiga:

- (1) E mafai ona fonu se Komiti Faa-Palemene i so o se nofoaga i totonu o Samoa. E ao ona tuuina atu muamua se faatagaga a le Fonu Aoao a o le i fonu se Komiti i se nofoaga i fafo atu o Samoa.
- (2) E mafai e se Komiti Faa-Palemene ona:
 - (a) fonu i fafo atu o nofoaga totino o le Fonu Aoao Faitulafono; po o
 - (b) le faatino o se asiasiga a se Komiti Faa-Palemene, pe afai ua faamaonia e le Fofoga Fetalai le nofoaga o le fonotaga po o le faatupega o le asiasiga.

150. Soakomiti:

- (1) E mafai e Komiti Faa-Palemene ona tofia Soakomiti. So o se Soakomiti e iloiloina se Tulafono Tau Faaofi o le a tatau ona tofia i luga o se maliega a le Komiti e aunoa ma se leo faatuiese.
- (2) E tatau ona faaoga tulafono faafoe o taualumaga a Komiti Faa-Palemene i taualumaga a Soakomiti.

151. Ia Le Fonu le Komiti i le Taimi o le Fonotaga a le Fonu Aoao:

Vagana ona ua ese ai se faatonuga a le Fonu Aoao, e leai se Komiti Faa-Palemene o le a fonu i le taimi o lo o fonu ai le Fonu Aoao.

152. E Filifili e le Komiti Faa-Palemene Lona Taitaifono:

- (1) O Komiti Faa-Palemene taitasi uma, a o le i alo atu i so o se tasi lava mataupu, o le a ia filifilia sona Taitaifono ma se Sui Taitaifono, o laua ia o le a i ai i le tofi i aso uma lava e i ai lea Komiti. A o toesea le Taitaifono ma le Sui Taitaifono o le a filifilia e le Komiti se sui usufono e avea ma Taitaifono *mo se taimi le tumau*.
- (2) O le a i ai i le Taitaifono o se Komiti Faa-Palemene se palota e tusa ma lona lava taofi atoa ma se palota e saili ai se faaiuga.

153. Aofai o Sui Usufono o se Komiti Faa-Palemene e Tatau ona Auai ona Mafai lea ona Fai se Fono:

- (1) O le aofai o sui usufono o se Komiti Faa-Palemene e tatau ona auai ona mafai lea ona fai se fono, o le a tatau ona maua le afa o le aofaiga o ona sui usufono tofia.
- (2) Afai e tea le sefulu ma le lima (15) minute talu mai le taimi na atofaina mo le fonotaga a se Komiti Faa-Palemene ae le i auai le aofai o sui usufono e tatau ona auai ona mafai lea ona fai le fono, o le a tusia loa e le Failautusi o le Komiti i Tala Otooto suafa o sui usufono o lo o auai, o i latou na e mafai loa ona tuumuli e malolo, ma o le a tolopoina loa le Komiti seia oo i lana fonotaga o lo o lumanai o le a valaauina e le Failautusi o le Komiti ae noatia ma fai faatatau i le faatonuga a le Taitaifono.
- (3) Afai e i ai so o se taimi i le faagasologa o le fonotaga a se Komiti Faa-Palemene ua le auai le aofai o sui usufono e tatau ona auai, o le a faamanava loa taualumaga a le Komiti seia oo ina ua atoa le aofai o sui usufono e tatau ona auai ona mafai lea ona fai le fono, ma afai e leai se aofaiga faapena o sui usufono e auai, ma pe afai e leai se aofaiga o sui usufono e tatau ona auai i totonu o se taimi e pei ona ua manatu sui usufono o lo o auai e tatau ai, po ina ua tuanai le sefulu ma le lima (15) minute i so o se itu lava, o le a tolopoina loa le Komiti seia oo i se taimi o lumanai o le a fuafuaina e le Taitaifono.
- (4) Afai e faatolu ona lē usitaia e se sui usufono le tulaga manaomia o le auai i fonotaga a Komiti Faa-Palemene e pei ona aiaia i le (2), o le a lipoti atu lea tulaga e le Taitaifono i le Fofoga Fetalai ma o le a aveesea ai loa lea sui usufono mai i le Komiti Faa-Palemene. Ae afai e faatolu

ona lē usitaia e se Taitaifono le tulaga manaomia o le auai i fonotaga a Komiti Faa-Palemene e pei ona aiaia i le (2), o le a lipoti atu lea tulaga e le Failautusi o le Komiti i le Fofoga Fetalai ma o le a noatia le Fofoga Fetalai e poloaia le Komiti ina ia toe filifilia se isi Taitaifono fou e tusa ai ma le Tulafono Tumau 152.

154. Lafo Faatu po o se Lafo Toe Teuteu e Le Manaomia ina ia Faaluaina:

O se Lafo Faatu po o se lafo toe teuteu e faatuina i se Komiti Faa-Palemene o le a le manaomia ina ia faaluaina.

155. Pule e Amia ai Tagata, Pepa ma Faamatalaga Faamauina:

- (1) O le a i ai i Komiti Faa-Palemene uma le pule e amia ai ni tagata, pepa ma faamatalaga faamauina.
- (2) E mafai e le Taitaifono o se Komiti Faa-Palemene ona talosaga e avea ai ma sui o le Komiti, so o se tagata e auai atu ma tuuina atu faamatalaga molimau i luma o le Komiti, ma o le a tatau ona logoina le tagata ua faapea ona talosagaina e ala i se tusi po o se isi lava faiga talafeagai i le lē itiiti ifo na i lo le 24 itula.
- (3) E mafai e se Komiti ona faatonuina le valaauina o so o se tagata e auai atu mo suesuega ma tuuina atu faamatalaga molimau i luma o le Komiti. E tatau ona sainia e le Taitaifono le tusi e valaau ai lea tagata.
- (4) E mafai e le Taitaifono, i le avea ai ma sui o le Komiti, ona talosagaina le tuuina mai o pepa ma faamatalaga faamauina talafeagai mo ana taualumaga.
- (5) E mafai e se Komiti ona faatonuina le valaauina o so o se tagata e tuuina atu pepa ma faamatalaga faamauina o lo o ia umia, tausia po o lo o i lalo o lana vaavaaiga ia e faapea e talafeagai i taualumaga a le Komiti. E tatau ona sainia e le Taitaifono le tusi e valaau ai lea tagata.
- (6) Pe afai ua le usitaia e so o se tagata le tusi sa valaauina ai ina ia auai atu i luma o se Komiti pe tuuina atu pepa ma faamaumauga o lo o ia umia, tausia, po o lo o i lalo o lana vaavaaiga, e mafai e le Komiti ona lipoti atu lea tulaga i le Fono Aoao.

- (7) O le fua faatatau o le alauni ia totogi atu mo alatupe alu a so o se tagata na oo atu i luma o se Komiti Faa-Palemene e avea ma molimau o le a tutusa lava e pei ona o le a totogi atu i lea tagata pe ana faapea o ia o se molimau o lo o auai i se Faamasinoga tau le Tulafono.

156. E Mafai ona Auai Sui Usufono e le o ni Sui Usufono o le Komiti Faa-Palemene:

- (1) E mafai ona auai atu i tualumaga a Komiti Faa-Palemene ia sui usufono o le Fono Aoa (e le o ni sui usufono o le Komiti Faa-Palemene), ae peitai e le tatau ona auai i faiga filifiliga ma e tatau ona tulai ese mai pe a faia faiga filifiliga a le Komiti ae vagana ai se faaiuga a le Komiti e aunoa ma se leo e faasalaese.
- (2) E mafai e se Komiti Faa-Palemene ona valaau se Minisita e auai atu i fonotaga a le Komiti mo le faamalamalamaina o se Tulafono Tau Faaofi, Tulafono Faatonutonu, Pepa, Lipoti po o se mataupu e fitoitonu ma le Minisita, a o faagasolo ana iloiloga. E mafai e le Minisita a o auai i sea fonotaga, ona auai i tualumaga ae le palota i so o se fesili e tuuina atu i le Komiti.

157. Fesoasoani:

- (1) E mafai e se Komiti Faa-Palemene ona sailia fesoasoani mai tagata e avea ma faufautua i le Komiti ma e mafai ona valaau so o se tagata e auai atu i so o se fonotaga a le Komiti e fesoasoani i ana iloiloga o so o se mataupu.
- (2) O se tagata ua valaauina i lalo o le (1) e lē tatau ona tuuina atu i ai se aia i se mataupu o lo o iloiloaina ma e manaomia le sainia o se “Pepa Faatumu o le Tautinoga o le Leai o ni Aia Feteenai” e uiga i lenei tulaga.

158. Faaulufaleina o Tagata Ese:

E tatau ona tatala avanoa mo tagata lautele i tualumaga a Komiti Faa-Palemene uma a o faagasolo le fofogaina o faamatalaga molimau i se Tulafono Tau Faaofi po o se isi mataupu o lo o suesueina e le Komiti e tusa ai ma aiaiga o lenei Tulafono Tumau:

- (a) e mafai e le Taitaifono ona poloaiina so o se tagata ese ua faia se amio le taupulea ina ia tulai ese ma le fonotaga; ma
- (b) e mafai, i le faatagaga a le Komiti, ona aveese tagata ese uma mai le fonotaga i luga o le manatu e faapea o se vaega po o faamatalaga molimau uma e tuuina atu e tatau ona fofogaina i se tulaga e le faalauaiteleina.

159. Molimau e Tuuina atu i Luma o Komiti Faapitoa:

- (1) O le a tatau ona fuafuaina Komiti Faapitoa ma a latou galuega tauave e le Fono Aoa e ala i se lafo faatu.
- (2) E leai ni tagata ese po o ni sui usufono e le o ni sui o le Komiti o le a faaulufaleina i so o se taimi i se Komiti Faapitoa ae vagana ni molimau ma nisi tagata e tatau ai i taualumaga a sea Komiti.
- (3) O le molimau ua tuuina atu i luma o so o se Komiti Faapitoa po o so o se pepa aloaia ua tuuina atu i sea Komiti, e lē tatau ona faasalalauina pe faailoa atu e so o se sui o le Komiti po o e so o se tasi lava tagata a o le i tuuina atu e le Komiti lana lipoti i le Fono Aoa.

160. E Mafai ona Faamauina ma Lipotia Molimau:

- (1) O le a mafai ona tusia le faamatalaga a so o se molimau ma auina se ata (kopi) i le molimau, pe afai e manaomia. O le a i ai le saolotoga i le molimau i totonu o aso e fitu (7) i le aso na auina atu ai e le Failautusi o le Komiti le ata (kopi) o le faamatalaga ma ni faasaoga ua le sao ona faamauina ma o le a lomina le faamatalaga faatasi ma ni mea na toe faasao e pei ona o le a faamaonia e le Taitaifono.
- (2) E mafai i le faitalia a le Komiti Faa-Palemene ona le talia le faafogaina o so o se faamatalaga e le talafeagai ai po o se faamatalaga a se molimau e malosia ona faatuiese.
- (3) O le faamatalaga na faia i luma o se Komiti Faa-Palemene e mafai i se iugafono a le Komiti ona faamauina ma lipotia atu i le Fono Aoa pe a oo ina tagofia le Lipoti a le Komiti.

161. Ia Faamauina Suafa o Sui Usufono e Suesueina Molimau:

I fesili taitasi uma e fesiligia ai se molimau o lo o suesueina i taualumaga a so o se Komiti Faa-Palemene o le suafa o le sui usufono na te faia sea fesili o le a muai tusia i totonu o tala otooto o faamatalaga molimau pe a oo ina faamauina sea molimau.

162. Ia le Lomia Faasalalau pe Faaalia Faamatalaga Molimau:

O taualumaga, po o molimau na faamauina po o le Lipoti a so o se Komiti Faa-Palemene; po o so o se tuufaatasiga o ia taualumaga, molimau, po o le Lipoti o le a i le tulaga o le matua le faalauaitelina ma ia le lomua faasalalau pe faaalia e so o se sui usufono o le Komiti pe faia e so o se tasi lava tagata, seia oo ina ua tuuina atu le Lipoti a sea Komiti i le Fono Aoa: Ae vagana ai e faapea, e mafai e se tagata ofisa o Galuega a le Malo, o ia lea na tuuina atu faamatalaga molimau i le avea ai ma sui o lana matagaluega ona fesootai atu le autu o sea faamatalaga molimau i isi tagata ofisa o lea matagaluega.

163. Faaalia o Taualumaga po o Faamatalaga a Molimau o le Soliga o le Tulaga Aloaia:

So o se tagata na te faia se solitulafono i le Tulafono Tumau 159 ma le 162 o le a faatatauina lava ua nofosala i se soliga o le tulaga aloaia, ma o le a faapea lava ona fai i ai se faaiuga a le Fono Aoa.

164. Na o Sui o le Komiti e ave i ai Ata Faamaonia o Faamatalaga Molimau:

- (1) Na o sui usufono o le Komiti Faa-Palemene e mafai ona tufatufa atu i ai ni ata faamaonia o faamatalaga molimau na tuuina mai i luma o se Komiti Faa-Palemene.
- (2) O ata faamaonia o faamatalaga molimau e tufaina atu i sui usufono o le Komiti Faa-Palemene o le a le tataua ona faasalalauina pe faailoa atu a o le i tuuina atu e le Komiti Faa-Palemene lana Lipoti i le Fono Aoa.
- (3) So o se sui usufono na te solia lena Tulafono Tumau o le a faatatauina ua ia faia se solitulafono i le Tulafono Tumau 159 ma o le a faapea lava ona faia i ai se faaiuga a le Fono Aoa.

165. Moliaga Faasaga i Sui Usufono:

- (1) E le tatau i se Komiti Faa-Palemene (vagana ai le Komiti o Tulaga Aloaia ma Amio Taualoa) ona sutesue pe faia ni sailiiliga i le amio patino a so o se Sui Usufono o le Palemene seia vagana ua faatonuina maoti e le Fono Aoao.
- (2) Afai e oo mai so o se faamatalaga i luma o se Komiti Faa-Palemene po o ua faia so o se tuuaiga i luma o se Komiti Faa-Palemene (vagana ai le Komiti o Tulaga Aloaia ma Amio Taualoa) o lo o molia ai so o se Sui Usufono o le Palemene i se amio ua sala, e tatau i le Komiti ona logoina atu faamatalaga auiliili o le moliaga i le sui usufono e aafia ai ma tuuina atu i le sui usufono se avanoa e faia ai so o se faamatalaga i le mataupu ae le tatau ona faaauauina gaoioiga i luga o lea faamatalaga po o le tuuaiga e aunoa ma le faatonuina maoti e le Fono Aoao ina ia faia faapea.

166. O le a Tatau i se Komiti ona Lipoti mai i lea Taimi i lea Taimi:

- (1) O le a tatau i se Komiti Faa-Palemene i luga o le iloiloga o se Tulafono Tau Faaofi ona lipoti mai i le Fono Aoao i totonu o le 3 masina mai le aso na tuuina atu ai, vagana ua faatuina se isi taimi ma ua taliaina. O le a tatau i le Lipoti ona faamatala ai taualumaga a Komiti ma iloiloga o molimau, ma tuuina atu le faataua i so o se teuteuga ua fuafuaina.
- (2) O le a tatau i se Komiti Faa-Palemene i luga o le iloiloga o Pepa Faa-Palemene ona lipoti mai i le Fono Aoao i totonu o le lua (2) masina mai le aso na tuuina atu ai, vagana ua faatuina se isi taimi ma ua taliaina. O le a tatau i le Lipoti ona faamatala ai taualumaga a Komiti ma iloiloga o molimau ma fautuaga.
- (3) O le a tatau ona sainia le Lipoti a se Komiti Faa-Palemene e sui uma o le Komiti, ma tuuina atu e le Taitaifono po o se isi sui usufono o le Komiti ua faatagaina e le Taitaifono po o le Komiti e aveia ma o latou sui.
- (4) E ao ona lagolagoina se Lipoti a se Komiti e le vaega toatele o ona sui usufono.

- (5) Afai e le o malie se sui usufono i se vaega po o le Lipoti atoa, e mafai e le Taitaifono ona faatino lana pule faitalia e faatagaina ai so o se tasi (1) po o itu uma nei:
- (a) ia faataga se sui usufono e tuuina atu se lipoti laitiiti ina ia faapipii atu i ai i le Lipoti a le Komiti; po o
 - (b) ua faapea ona faatagaina le Komiti e lolomi i le pito i lalo sui usufono e tetee i manatu o i le Lipoti.
- (6) Afai e finagalo se Komiti Faa-Palemene e tusa ma a latou iloiloga ina ia tuliloa le mataupu e manuia ai le Palemene, e mafai e le Komiti ona faatu se lafo i totonu o le Fono Aoao i la lea tulaga.

167. Taitaiga o Tualumaga a se Komiti Faa-Palemene:

I mataupu e le o faia i ai ni aiaiga i totonu o nei Tulafono Tumau, o le a taitaiina tualumaga a se Komiti Faa-Palemene i le faiga lava e tasi e aupito sili ona vavalalata ma tualumaga a se Komiti o le Fono Aoao Atoa.

168. Ia Faamauina Palota i Tala Otooto:

A tupu mai se eseese o taofi i totonu o so o se Komiti Faa-Palemene, o le Mataupu na faatuina mai ia fai i ai se palota, le igoa o Le na ia faatuina mai, atoa ma palota e faasino i lea mataupu a sui usufono taitasi o lo o auai, o le a faamauina i Tala Otooto o tualumaga a le fono o le Komiti, ma o ia tala otooto o le a lipotia atu i le Fono Aoao i le Lipoti a lea Komiti ina ua poloaiina e le Fono Aoao pe ua faatonuina e le Komiti.

169. Failautusi o Komiti Faa-Palemene:

- (1) O le a tofia e le Failautusi se tagata ofisa mai lona Ofisa ia fai ma Failautusi o Komiti Faa-Palemene uma taitasi.
- (2) O le a auina atu e le Failautusi o se Komiti Faa-Palemene se faaaliga tusia o fonotaga taitasi e faatuatusi i sui usufono taitasi, faatasi ai ma se ata (kopi) o le Pepa o Mataupu o le Fono:
Ae vagana ai i ni mataupu pe afai ua le ono mafai ona auina atu se faaaliga tusia, o le a tatau lava ona tuuina atu se faasilasilaga i so o se tasi lava auala lea o le a matua mautinoa ai e faapea ua maea lelei ona fofogaina sui usufono i ala e tatau ai.

VAEGA XXXIII
KOMISI FAA-PALEMENE MA
KOMITI FAA-PALEMENE

170. Komisi Faa-Palemene:

- (1) O le a i ai se Komisi Faa-Palemene e aofia ai:
 - (a) le Fofoga Fetalai e avea ma Taitaifono;
 - (b) le Sui Fofoga Fetalai e avea ma Sui Taitaifono;
 - (c) le Taitai o le Maota;
 - (d) le Minisita mo le Ofisa o le Fono Aoao Faitulafono;
 - (e) Taitai o vaega faaupufai uma ua aloaia; ma
 - (f) se sui usufono sinia po o sui usufono ua tofia e le Fofoga Fetalai e avea ma sui o vaega faaupufai uma e agaia le Malo.
- (2) O le matafaioi a lea Komisi Faa-Palemene le:
 - (a) fautua atu i le Fono Aoao le tulaga o le avea ma sui auai o Komiti Faa-Palemene;
 - (b) faavasega le tulaga o le avea ma sui auai i Komiti Faa-Palemene e tusa ai o le aofaiga o sui o vaega faaupufai;
 - (c) faamaonia o sui filifilia mai taitai o vaega o sui mo Komiti i le amataga o Palemene taitasi ma i le a lava le taimi e manaomia ai;
 - (d) fuafuaina o tulafono faafoe mo le faasalalauga o taualumaga a le Fono Aoao Faitulafono ma iloiloia so o se mataupu e vevesi ai po o se faasea lea e faatulai mai i se faasalalauga e ala i televise, nusipepa po o leitia;
 - (e) fuafuaina o mataupu e faatatau i le Penisione a le Palemene;
 - (f) fuafuaina o gaoioiga faufautua faa-palemene e lagolago ai; ma
 - (g) fautua atu i le Fono Aoao se Polokalame o fonotaga faaletausaga mo tausaga faale-kalena taitasi lea -
 - (i) e ao ona faia ma faamaonia e le Fono Aoao ia lē silia le fonotaga mulimuli o le tausaga talu ai; ma
 - (ii) i le taliaina e le Fono Aoao o le polokalame o le faatino loa i le noatia ma le fai fuafua i so o se faaiuga a le Fono Aoao i se tulaga e ese mai ai ma o le a i le Fofoga Fetalai foi le faitalia e fetuunai ai le polokalame i luga o le faautautaga

tatau i le noatia ma le fai fuafua i le Mataupu 52 o le Faavae o le Malo Tutoatasi o Samoa.

171. Tulafono Tumau, Mataupu Tau Faiga Palota, Talosaga ma Tofiga Faale-Faavae:

- (1) O le a i ai se komiti e taua o le Komiti o Tulafono Tumau, Mataupu Tau Faiga Palota, Talosaga & Tofiga Faale-Faavae lea o le a aofia ai a itiiti mai e toafitu (7) sui usufono o i latou ia o le a tofia i luga o se lafo faatu i se taimi aupito vave ina ua tuanai le amataga o Palemene taitasi. E tatau ona ausia le aofaiga o sui usufono e mafai ai ona usuia se fonu ina ia mafai ai e le Komiti ona faatino ana taualumaga/galuega. O le a i ai i le Komiti le malosiaga e filifilia ai sona lava Taitaifono ma se Sui Taitaifono.
- (2) O le a avea ma tiute o le Komiti le:
 - (a) iloiloina ma lipoti mai i le Fono Aoao so o se Lipoti Faaletausaga po o nisi Lipoti i le Fono Aoao Faitulafono mai le Komesina o Sulufaiga (Ombudsman), le Pule ma Suetusi Aoao, po o le Ofisa o le Fono Aoao Faitulafono;
 - (b) iloiloina mai lea taimi i lea taimi ma lipoti mai i le Fono Aoao so o se fuafuaga mo teuteuga o na Tulafono Tumau lea e mafai ona tuuina atu i ai i lalo o aiaiga o Tulafono Tumau 72 (Lafo Faatu e Toe Teuteu ai Tulafono Tumau) ma i luga o mataupu uma e faasino i nei Tulafono Tumau lea e mafai ona tuuina atu i ai e le Fono Aoao;
 - (c) faia se iloiloga o Tulafono Tumau i le agai atu i le iuga o Palemene taitasi ma o sea Lipoti e ao ona faamaonia e le Fono Aoao a o le i faataapeina le Palemene;
 - (d) iloiloina o so o se Tulafono Tau Faaofi, Talosaga, Lipoti po o so o se isi mataupu e tuuina atu e le Fono Aoao po o e tusa ai ma nei Tulafono Tumau;
 - (e) faia se iloiloga o le Tulafono o Faiga Palota i le vaitaimi o le 18 masina a o le i muta le Paeaiga a le Palemene ma e tatau ona lipoti atu ma faamaonia e le Fono Aoao lea iloiloga i luma mai o le 12 masina mai le aso e muta ai le Paeaiga;

- (f) suesueina o le faafoega ma tupe alu a le Ofisa o le Komesina o Faiga Palota; ma
- (g) faasoa atu ana galuega i isi Komiti Faa-Palemene e tauaveina pe a manaomia.

172. Komiti o Tupe Maua & Tupe Totogi:

- (1) O le a i ai se Komiti e taua o le Komiti o Tupe Maua & Tupe Totogi e aofia ai sui usufono a itiiti mai e toafitu (7) o i latou ia o le a tofia i luga o se lafo faatu i se taimi aupito vave ina ua tuanai le amataga o Palemene taitasi. E tatau ona ausia le aofaiga o sui usufono e mafai ai ona usuia se fono ina ia mafai ai e le Komiti ona faatino ana taualumaga/galuega. O le a i ai i le Komiti le malosiaga e filifilia ai sona lava Taitaifono ma se Sui Taitaifono.
- (2) O le a avea ma tiute o le Komiti le:
 - (a) iloiloina o so o se Tulafono Tau Faaofi, Talosaga po o nisi mataupu e tuuina atu i ai e le Fono Aoa e tusa ai o nei Tulafono Tumau; ma so o se Tala Faatatau o Tupe po o le toe iloiloga o le faatinoga o galuega faa-minisita ma matagaluega;
 - (b) faasoa atu i so o se Komiti Faa-Palemene na te faatinoina suesuega o so o se Tala Faatatau o Tupe ma so o se iloiloga o le faatinoga o galuega a matagaluega;
 - (c) suesueina o faiga faavae, faafoega ma tupe alu a matagaluega ma faalapotopotoga a le Malo e faasino i tupe a le Malo, inisiua, supaanueta, faaputugatupe mo le lumanai manuia, lafoga, sueina faasuetusi o faamatalaga o tupe a le Malo ma faamatalaga tau tupe a Matagaluega;
 - (d) iloiloga aoao o faafoega tau pulega o tupe i matagaluega uma ma faalapotopotoga a le Malo; ma
 - (e) suesueina ma lipoti atu i faamatalaga o tupe a le Malo.

173. Komiti o le Vaega Tau le Va Fealoai:

- (1) O le a i ai se komiti e taua o le Komiti o le Vaega Tau le Va Fealoai e aofia ai sui usufono a itiiti mai e toafitu (7) o i latou ia o le a tofia i luga o le lafo faatu i se taimi aupito vave ina ua tuanai ai le amataga o Palemene taitasi. E tatau ona ausia le aofaiga o sui usufono e mafai ai

ona usuia se fono, ina ia mafai ai e le Komiti ona faatino ana taualumaga/galuega. O le a i ai i le Komiti le malosiaga e filifilia ai sona lava Taitaifono ma se Sui Taitaifono.

- (2) O le a avea ma tiute o le Komiti:
 - (a) le iloiloina o so o se Tulafono Tau Faaofi, Talosaga po o isi mataupu e tuuina atu e le Fono Aoao po o e tusa ai ma nei Tulafono Tumau; ma
 - (b) le iloiloina o faiga faavae, faafoega ma tupe alu a Matagaluega, faalapotopotoga a le Malo, faalapotopotoga tumaoti ma lala sooupu i totonu o le Vaega o Pulega Tau le Va Fealoai.

174. Komiti o le Vaega Tau le Tamaoaiga:

- (1) O le a i ai se komiti o le a taua o le Komiti o le Vaega Tau le Tamaoaiga, e aofia ai, pe a itiiti mai e toafitu (7) sui usufono, o i latou ia o le a tofia i luga o se lafo faatu, i le tuanai ai o le amataga o Palemene taitasi. E tatau ona ausia le aofaiga o sui usufono e mafai ai ona usuia se fono, ina ia mafai ai e le Komiti ona faatino ana taualumaga/galuega. O le a i ai i le Komiti le malosiaga e filifilia ai lona Taitaifono ma le Sui Taitaifono.
- (2) O le a avea ma tiute o le Komiti:
 - (a) le iloiloina o so o se Tulafono Tau Faaofi, Talosaga po o isi mataupu ua tuuina atu e le Fono Aoao po o e tusa ai ma nei Tulafono Tumau; ma
 - (b) le suesueina o faiga faavae, faafoega ma tupe alu a matagaluega ma faalapotopotoga a le Malo, faalapotopotoga tumaoti ma lala sooupu i totonu o le Vaega o Pulega Tau le Tamaoaiga.

175. Komiti o le Vaega o Atinae Eseese:

- (1) O le a i ai se Komiti o le a taua o le Komiti o le Vaega o Atinae Eseese e aofia ai pe a itiiti mai e toafitu (7) sui usufono o i latou ia o le a tofia i luga o se lafo faatu, i se taimi vave lava e mafai ai pe a tuanai le amataga o Palemene taitasi. E tatau ona ausia le aofaiga o sui usufono e mafai ai ona usuia se fono, ina ia mafai ai e le Komiti ona faatino ana taualumaga/galuega. O le a i ai i le Komiti le malosiaga e filifilia ai so latou Taitaifono ma le Sui Taitaifono.

- (2) O le a avea ma tiute o le Komiti:
 - (a) le iloiloina o so o se Tulafono Tau Faaofi, Talosaga po o isi mataupu e tuuina atu e le Fono Aoao po o e tusa ai ma nei Tulafono Tumau; ma
 - (b) le suesueina o faiga faavae, faafoega ma tupe alu a matagaluega, faalapotopotoga a le Malo, faalapotopotoga tumaoti ma lala soupu, i totonu o le Vaega o Pulega o Atinae Eseese.

VAEGA XXXIV SUI USUFONO MA TAGATA ESE

176. **Faaulufaleina o Tagata Ese i Totonu o le Fono Aoao:**

- (1) E leai se tagata ese o le a faatagaina i totonu o le Fono Aoao e aunoa ma le pule faataga a le Fofoga Fetalai e ui atu lona faataunuuna i Le na te leoina le Fono.
- (2) I se Fonotaga a le Fono Aoao po o totonu o se Komiti o le Fono Aoao Atoa, afai e i ai so o se sui usufono na te tau mai i le Maota Fono po o se Komiti le tatau ai ona aveeseina o ni tagata ese; o le a tuuina atu loa e le Fofoga Fetalai po o le Taitaifono le fesili e faapea, "Ia tatau ona tuumuli ese tagata ese" e aunoa ma le faatagaina o so o se fefaaaliaiga o taofi po o se lafo toe teuteu.
- (3) E mafai e le Fofoga Fetalai po o le Taitaifono i so o se taimi ona ia poloaiina le tuumuli ese o tagata ese mai so o se vaega o le Maota Fono.
- (4) O le Faasalalauina i le ea o taualumaga o le a faamutaina i vaitaimi taitasi uma e tuumuli ese ai tagata ese e tusa ai ma le (2) o lenei Tulafono.
- (5) E leai se sui usufono o le Fono Aoao o le a ia faamoemoeina na te aumaia ni tagata ese i totonu o so o se vaega o le Fono Aoao po o le nofoaga na faatatauina i Sui Usufono o le Palemene a o usua le Fono po o se Komiti o le Fono Aoao Atoa.
- (6) E mafai e le sui o so o se nusipepa po o se tusitala ona ia maua se faatagaga lautele mai le Fofoga Fetalai ina ia auai i Fonotaga a le Fono Aoao:
Ae afai e faasalalauina e le nusipepa po o le tusitala se lipoti o taualumaga ua manatu le Fofoga Fetalai e le tonu, le tatau ai po o le le sao, po o pe afai ua i ai i le taofi o le Fofoga Fetalai ua faia e le sui se amioga le tatau i totonu o tuaoi o le Fono Aoao e mafai ona soloia sea faatagaga.

VAEGA XXXV
TULAGA ALOAIA MA AMIO TAUALOA

177. Komiti o Tulaga Aloaia ma Amio Taualoa:

- (1) O le a i ai se Komiti o Tulaga Aloaia ma Amio Taualoa e aofia ai:
 - (a) le Taitai o le Maota po o se Sui Usufono o le Palemene e filifilia e le Taitai o le Maota mai lea taimi i lea taimi;
 - (b) le Taitai o le Itu Agai po o se isi Sui Usufono o le Palemene e filifilia e le Taitai o le Itu Agai mai lea taimi i lea taimi, ma i le tulaga e le o i ai se Taitai o le Itu Agai, o se sui usufono aupito i sinia e filifilia e le Fofoga Fetalai; ma
 - (c) o ni sui usufono se toafitu (7) e le o ni minisita, e tofia i luga o se lafo i se taimi vave lava e mafai ai, i le tuanai ai o le amataga o Palemene taitasi.
- (2) E toalima (5) le fuainumera o sui auai e mafai ai ona usuina se fonotaga. O le a i ai i le Komiti le pule e filifilia ai lana Taitaifono ma se Sui Taitaifono mai i ona sui usufono e toafitu (7). O le Taitai o le Maota ma le Taitai o le Itu Agai; po o i le tulaga e le o i ai se Taitai o le Itu Agai, o le sui usufono aupito i sili ona sinia o le Itu Agai e tofia e le Fofoga Fetalai, e le tatau ona avea ma Taitaifono.

178. Lagaina o se Mataupu Tau Tulaga Aloaia:

- (1) So o se sui usufono ua ia manaomia e na te lagaina se mataupu tau tulaga aloaia, e ao ona ia tuuina atu i le Fofoga Fetalai i se faamatalaga tusitusia i se taimi e sili atu ona vave a o le i amataina taualumaga e sosoo ai, po o le tuuina sao loa i le Fofoga Fetalai lea faamatalaga pe a fai na tulai mai sea mataupu a o faagasolo taualumaga a le Fono Aoao. Ae vagana ai e faapea o ni mataupu tau tulaga aloaia e faasino i amioga a ni tagata ese o lo o i totonu o le faataamilosaga o le fale e mafai ona laga loa ma tagofia i se faiga e pei ona o le a fuafuaina e le Fofoga Fetalai.
- (2) O le a iloilo e le Fofoga Fetalai le tulaga o le faitioga po o le mataupu ua molimauina ma faia i ai sana faaiuga po o ua aafia tulaga aloaia o le Palemene i le mataupu ua tuuina atu.

179. Fesiligia o Tulaga Aloaia:

I le iloilo ina po o le mataupu ua laga e tatau ona aafia i tulaga aloaia, o le a teena e le Fofoga Fetalai mataupu faatauvaava e le tatau ona saga iloilo e le Fono Aoao.

180. Sui Usufono ina ia Logoina i Tuuaiga Faasaga ia i Latou:

- (1) So o se sui usufono na te laga se mataupu e aafia ai tulaga aloaia faasaga i so o se isi sui usufono e tatau, i se taimi vave ina ua maea ona laga le mataupu, ona faamatala atoatoa i lea sui usufono e tusa ai ma le mataupu tau tulaga aloaia e pei ona laga.
- (2) E le tatau i le Fofoga Fetalai ona ia lipotia se mataupu e aafia ai se isi sui usufono i se mataupu e fesiligia ai tulaga aloaia e aunoa ma le uluai logoina o lena sui usufono e tusa ai ma lena faamoemoe.

181. Taulumaga pe a Maea ona Tuuina Mai le Faaiuga a le Fofoga Fetalai:

- (1) Afai ua i ai le faaiuga a le Fofoga Fetalai e faapea ua fesiligia tulaga aloaia i se mataupu sa laga e se sui usufono, e tatau loa ona lipoti atu lena mataupu i le Fono Aoao i se avanoa muamua lava e mafai ai.
- (2) So o se mataupu ua lipotia i le Fono Aoao e le Fofoga Fetalai e faapea ua fesiligia ai se tulaga aloaia, e tatau ona tuuina atu i le Komiti o Tulaga Aloaia ma Amio Taualoa mo se iloilogia.
- (3) Afai ua faia se faaiuga a le Fofoga Fetalai e faapea o sea mataupu e le o aafia ai le fesiligia o tulaga aloaia, o le a leai se lafo fesootai ma sea mataupu e tatau ona tuuina i ai le faamuamua.

182. Tuuina o le Faamuamua i le Lipoti a le Komiti o Tulaga Aloaia:

E tatau ona tuuina le faamuamua i so o se lipoti a le Komiti o Tulaga Aloaia ma Amio Taualoa i se mataupu e fesiligia ai tulaga aloaia na i lo isi galuega a le Fono Aoao. E leai se sui usufono e mafai ona tautala e sili atu nai lo le 10 minute i so o se felafolafoaiga e faia i se Lipoti mai le Komiti o Tulaga Aloaia ma Amio Taualoa.

183. Mataupu Tau Tulaga Aloaia ua Mauaina i Totonu o Pepa Aloaia:

So o se sui usufono e laga se mataupu tau tulaga aloaia e tusa ai ma se faamatalaga i totonu o se nusipepa, tusi po o isi faasalalauga, e tatau ona ia tuuina mai se ata o le nusipepa, tusi po o isi faasalalauga, o lo o i ai le faamatalaga ua fesiligia, ma e tatau ona sauniuni e tuuina mai le igoa o le tagata na lolomiina po o le tagata na faasalalauiina.

184. O Le sa Faia le Tuuaiga e Le Mafai ona Auai i le Suesuega:

So o se sui usufono ua faia se tuuaiga ua solia po o ua le usitaia ai tulaga aloaia e le mafai ona auai i se suesuega e faasino i lena tuuaiga.

185. Uiga Le Migao Faasaga i le Palemene:

E mafai e le Palemene ona avea ma uiga lemigao so o se aga po o le faia o se aga:

- (a) taofia ai po o le taofiofi ai le Palemene mai le faagaoioia o ona tiute tauave;
- (b) faalavelaveina, tetee po o le taofia o so o se sui usufono po o se ofisa o le Palemene i le tauaveina o tiute o sui usufono po o ofisa; po o
- (c) e faaono faaosofia, tuusao po o le faaalatua, e maua ai sea taunuuga.

186. Faataitaiga o Uiga Le Migao:

E aunoa ma le faatapulaaina o tulaga aoao o Tulafono Tumau 188, e mafai e le Palemene ona faia e avea o se uiga lemigao so o se tulaga e faapea:

- (a) le solia o se tasi o tulaga aloaia o le Palemene;
- (b) taumafai ma le mautinoa e taufaasese le Fono Aoao po o se Komiti i luga o se faamatalaga, molimau po o se talosaga;
- (c) faia o se gaoioiga faaletulafono po o le faatonuina o se gaoioiga faale tulafono ina ia tuuina atu i totonu o lotoifale o le Palemene e aunoa ma le pule a le Fofoga Fetalai, i so o se aso o lo o fonu ai le Fono Aoao po o ni fonotaga a se komiti;
- (d) aveeseina e aunoa ma se pule so o se pepa po o ni faamaumauga a le Palemene;
- (e) tau faasese po o le suia o so o se pepa po o faamaumauga e patino i le Palemene;

- (f) pe afai o se sui usufono, ua mauaina po o le faia o se faiga faaoloatauaina e aafia ai amio a sui usufono e tusa ai ma taualumaga i totonu o le Fono Aoao po o i totonu o se Komiti;
- (g) le ofoina atu po o le taumafai e faaoloatauaina se sui usufono ina ia aafia ai le amio a se sui usufono e tusa ai ma taualumaga i totonu o le Fono Aoao po o i totonu o se komiti;
- (h) osofaia, faamatau po o le faaosoina o se sui usufono po o se tagata ofisa o le Fono Aoao e avea ai ma sui na te faatinoina tiute a le sui usufono po o ni tagata ofisa;
- (i) taofia po o le faaosesa i se sui usufono po o se tagata ofisa o le Fono Aoao i le tauaveina o tiute o le sui usufono po o tiute o tagata ofisa;
- (j) e atagia ai le uiga masani po o amioga a le Fono Aoao po o se sui usufono i tulaga o sui usufono e avea ai ma Sui Usufono o le Palemene;
- (k) le amio le taupulea o se tasi i le auai ai i le Fono Aoao po o se Komiti;
- (l) le faailoaina atu o taualumaga po o se Lipoti a se Komiti Faa-Palemene a le Maota e ese mai ai i Tulafono Tumau;
- (m) faasalalauina o se faamatalaga sese ma le tau faasese taualumaga i luma o le Fono Aoao po o se Komiti;
- (n) le le usitaia e auai atu i luma o le Fono Aoao po o se Komiti ina ua uma ona tuuina atu i ai e le Fono Aoao po o se Komiti se tusi samania mo le auai ai;
- (o) le faamatauina, puiipua po o le taofia o se molimau mai le tuuina atu o se molimau i le Fono Aoao po o se Komiti;
- (p) le teena e tali atu i se fesili po o le tuuina atu o faamatalaga manaomia e le Fono Aoao po o se Komiti;
- (q) osofaia po o le faafefeina o se sui usufono e tusa ai ma amio a sui usufono i totonu o le Palemene;
- (r) osofaia, faafefe po o le faaleagaina o se tagata ona o se molimau na tuuina atu e lena tagata i le Maota po o i se Komiti; po o
- (s) se sui usufono o lo o auai i le iloiloaina o se pisinisi, ua le usitaia e faasilasila atu so o se manaoga tau tupe o lo o i ai lena sui usufono i totonu o lena pisinisi.

VAEGA XXXVI
FAASALALAUINA I LE EA O TAUALUMAGA

187. Faasalalauga i le Ea o Tualumaga:

- (1) O Tualumaga o Fonotaga uma a le Fono Aoao Faitulafono o le a faasalalauina i le leitia ma o le a tatau ona avanoa mo le faasalalauina e le televise.
- (2) O so o se faasalalauga o tualumaga a le Fono Aoao Faitulafono e tatau ona tausia tulaga sagatonu e pei ona o le a faatulagaina e le Fono Faitulafono mai lea taimi i lea taimi.

188. Faafaigaluegaina o Sui Usufono i Tulaga Tau le Poto Maoae:

E leai se sui usufono o le Fono Aoao o le a oo atu i luma o le Fono Aoao po o so o se Komiti o le Fono Aoao e avea ma Loia Faufautua mo so o se vaega po o, i so o se tulaga o le a maua ai e ia se totogi po o se tau i so o se mataupu o le a filifili i ai le Fono Aoao po o le Komiti.

189. E mafai e le Fono Aoao ona Tausalaina se Tagata ua Le Usitai i se Poloai, ua Nofosala i le Amio Faalemigao:

E mafai e le Fono Aoao i luga o se Lafo Faatu e aunoa ma se faaaliga ona tausalaina so o se tagata, ua nofosala i le amio faalemigao tusa lava po o se sui usufono pe leai, o ia lea ua na solia ma le loto i ai so o se poloai tatau e tusa ma le tulafono a le Fono Aoao pe ua ia faia so o se amio e le tusa ai ma tulaga aloaia o le Fono Aoao, tusa lava po o faatulagaina pe leai ia tulaga aloaia i Tulafono Tumau o le Fono Aoao po o lo o tausia e tusa ai ma le tulafono ma le masani a Palemene po o so o se tasi lava faiga.

VAEGA XXXVII
PULEA MA LE FAAFOEINA

190. Pulea ma le Faafoeina o le Matagaluega a le Fono Faitulafono, Maota o le Palemene ma Malae:

- (1) I le noatia ma fai fuafua i le aia tatau a le Malo na te pulea ai le tupe alu i le itu i le Matagaluega a le Fono Faitulafono ma Tala Faatatau o Tupe e faasino i ai, mai i tuutuuga o so o se Tulafono a le Palemene:
- (a) o le Failautusi o le Fono Aoaofaitulafono ma le Sui Failautusi o le Fono Aoaofaitulafono e tatau ona tofia taitoatasi e le O Le Ao o le Malo mo se taimi e tolu (3) tausaga i luga o le fautuaga a le Fofoga Fetalai o le Fono Aoaofaitulafono ina ua uma ona feutagai ma -
- (i) le Taitai o le Maota; ma
- (ii) le Taitai o le Itu Agai po o, i le tulaga e le o i ai se Taitai o le Itu Agai, o se sui usufono aupito sinia o le Itu Agai e tofia e le Fofoga Fetalai;
- (b) o isi tagata ofisa o le Maota o le a tofia e le Fofoga Fetalai i luga o le fautuaga a le Failautusi;
- (c) o totogi ma isi totogi faale tofi o le Failautusi ma le Sui Failautusi o le a faatulaga ma fuafuaina le tonu e le Palemene i luga o le fautuaga a le Fofoga Fetalai;
- (d) o totogi ma isi totogi faale tofi o isi tagata ofisa o le a faatulaga ma fuafuaina le tonu e le Fofoga Fetalai i luga o le fautuaga a le Failautusi;
- (e) o le pulea ma le faafoeina o le atoa o malae ma fale o le Palemene ma isi lava mea ua faatuina ai i luga o le a tuuina atu lea i le Fofoga Fetalai e avea ma sui o le Maota, tusa lava po o tauaofia le Maota i lea taimi pe leai.
- (2) E ese mai ai i tiute o le Failautusi o lo o ootoo ina mai i le Vaega X ma le XI o nei Tulafono Tumau ma tiute o lo o faatonuina mai i Tulafono, o le Failautusi o le a lafo i ai le avega tauave mo le faaliliuina ma le lomina o Tusi o Lafo ma Taulumaga a le Fono Aoaofaitulafono, Lipoti

Faamaonia o Felafolafoaiga, Lipoti a Komiti Faa-Palemene ma so o se isi lava Pepa ua tuuina atu i le Fono Aoa. O le a nafa foi le Failautusi ma le faaliliuina ma le lomina o Tulafono Tau Faaofi mo le tuuina atu i le Fono Aoa ma Tulafono Tau Faaofi e tuuina atu mo le maliega a le O Le Ao o le Malo ma Tulafono ua pasia e le Palemene ma ua tuuina i ai le maliega a le O Le Ao o le Malo ma o le a ia te ia le faatonuga aoao ma le pulea o le Matagaluega a le Fono Aoa Faitulafono ma tagata ofisa uma o lo o faafaigaluega ai i totonu.

VAEGA XXXVIII
TAIMI FAATAPULAAINA O LAUGA

191. Taimi Faatapulaaina o Lauga i le Fono Aoao ma Tulaga Faa-Komiti:

O le taimi faatapulaaina o lauga i tualumaga o le Fono Aoao ma Komiti o le Fono Aoao Atoa, ae vagana ai tulaga e pei ona aiaia i le Tulafono Tumau 89 (Faamutaina o le Fefaaaliaiga o Taofi) o le a faia e tusa ai ma tapulaa ua faaalua i le Fua Faasolo ua tuuina atu i lalo.

FUA FAASOLO		
I LE FONO AOA O	Itula	Minute
I luga o le Faamatalaga Tau Tupe	0	30
I so o se Lafo Faatu po o so o se lafo teuteu	0	20
I se Lafo Faatu ina ia tolopo le Fono Aoao ona o se Mataupu Faanatinati e Aafia ai Tagata Uma/Galuega	0	20
Minisita e muamua saunoa	0	20
So o se tasi lava sui usufono	0	10
I le Lipoti a se Komiti Faa-Palemene	0	15
I le iloiloga o so o se "Pepa" e tusa ma le Tulafono Tumau 53	0	15
I le filifilia o le Fofoga Fetalai po o le Sui Fofoga Fetalai	0	10
I le Igoa Puupuu, Fuaiupu, po o le Faamatalaga o se Tulafono Tau Faaofi, po o so o se toe teuteuga i ai	0	15
I LE KOMITI O LE FONO AOA O ATOA	Itula	Minute
So o se fesili ua i luma o le Komiti	0	15

O NEI TAPULAA I LE FONO AOA O MA LE

TULAGA FAA-KOMITI E LE AAFIA AI:

- (a) se Minisita po o se sui usufono o lo o i lana Pulega se Tulafono Tau Faaofi, Lafo Faatu po o se tasi mataupu;
- (b) se Minisita a o tuuina atu le Faamatalaga Tau Tupe;
- (c) se Minisita o lo o i lana tausiga se vaega o Tala Faatatau o le Tupe e faatatau i le aofai o ana lauga.

VAEGA XXXIX TULAFONO TUMAU

192. Faataatia Ese o Tulafono Tumau:

E mafai e so o se sui usufono ina ua muamua maua le maliega i ai o le Fofoga Fetalai ona ia faatu le Lafo faatasi ma le faaaliga po o le aunoa ma se faaaliga ina ia mafai ona faataatia ese so o se Tulafono Tumau po o se tasi Tulafono o le Fono Aoao i lona tulaga atoa po o se vaega:

Peitai, o sea lafo faatu o le a le faatuina mai e aunoa ma se faaaliga vagana o lo o aufaatasi ai le tolu sefulu (30) o sui usufono i le taimi na faatuina ai le Lafo.

VAEGA XL
MEA UA SOLOIA

193. Mea ua Soloia:

O Tulafono Tumau sa faamamaluina muamua ua soloia nei ma suia i Tulafono Tumau nei ua maea ona toe fetuunai ma faamaonia e le Palemene i le Aso Tofi, 28 o Ianuari, 2016.

**Lolomiina e le Failautusi o le Fono Aoaofaitulafono,
i le pule a le Fono Aoaofaitulafono.**